

UTL AT DOWNSVIEW



D RANGE BAY SHLF POS ITEM C  
39 12 05 11 08 016 1



PLEASE DO NOT REMOVE  
CARDS OR SLIPS FROM THIS POCKET

---

UNIVERSITY OF TORONTO LIBRARY

---

BP  
166  
.9  
B27

Baban, Mustafa Zihni  
Islamda hilafet







Digitized by the Internet Archive  
in 2010 with funding from  
University of Toronto



1896

12/126


# اسلامده خلافت

Baban, Muṣṭafá Zihni

İslāmda hılāfet

مؤلفی

اطنه والیسی سابق مصطفی ذهنی




قسطنطینه

۱۳۲۷


مطبعة ابو الضیا



BP  
166  
.9  
B27







## افادۀ مخصوصه

جنتمکان سلطان عبدالعزیز خانک انخلاعی و مراد خامسک حکومتدن حصول فراغی وشو فراغه ابتدا ایدیلان خاقان مخلوع عبدالحمید خانک جلوسنی تعاقب ایدن قانون اساسینک اعلانی زمانه بر نظر رجعی عطف ایتمک بو اثرمزی مطالعه ایچون لازمدر .

طقسان اوچ تاریخنده اعلان اولنان قانون اساسینک تأسیس ایتدیکی اصول مشورت اوزمانکی بعض رجال دولتیجه وبرچوق علماجه استصواب اولغامش و رسماً اعلانی متعاقب قانون اساسی علیهنده اداره کلام ایدن بعض ذوات واشخاص شورایه بورایه نفی وتبعید ایدلشیدی .

قانون اساسینک مقبولیت عامیه مظهر اولسیله برابر عددرلی محدوداولان خلاف کیرلری طرفندن مشروعیه موافقی تقدیر ایدلمدیکندن انبعاث ایدن قیل و قالک حائز اهمیت اولمدیگی مجلس مبعوثانک انعقادیله تبیین ایتمش وافکار منوره ملت مشورتک مشروعیتی نقطه سنده اجتماع ایلشیدی .

احمد مدحت افندینک تحریر ونشر ایتدیکی « اس انقلاب » نامنده کی اثر قانون اساسینک وانک نتیجه طبیعیه سی اولان پارلمنتو اصولک ترویجی و اوزمانکی افکار عمومیه نك قانونمزه قارشى منع تهیجی مقصدینه مبتنی اولدیغی حالده مع التأسف خلاف کیر اولانلر واستبدادی منافع عمومیه یی کافل اولان حریتیه ترجیح ایدنلر ایچنده « پادشاهی » کندی فکرلینی ترویجه اقتضایده بیه جک



ذواتك ده موجود اولديغى پارلمنتونك طاغيدلسليه و قانون اساسينك تعطيليه تحقّق ايتدى .

شرعاً و عقلاً مردود اولديغنده شبهه ايدلمان استبداد فكر باطلی برئث عصرلق زمان مديده امت اسلاميه ي ، ملت عثمانيه ي شدايد وفجايع ايله ازدي . دولت عثمانيه ي هئت اجتماعيه ي قاصدى قاوردى . داخلاً و خارجاً تلافيى پك چوق زمانلره محتاج اولان تدنيات عظيمه ي سبيت ويردى .

مقصدمن دور استبدادك مضرات بي نهايه سندن جيم ملته آچديغى التيام ناپذير جريحه لردن سراى پادشاهيه اتساب ايدن معدود اشخاصك بوملت معظمه باشنه كتيردكلى فلاكتدن اوتوز مليون نفوسك اوتوز سنه ده مساعى شخصيه ي و محصول مساعيسى يالكز برقاچ شخصك منفعتنه منحصر قالمق كې دنياده امثالى نامسبوق مناسبتسزلكلردن مؤاخذات شخصيه و عموميه دن بحت ايتكم اوليوب طقسان اوچ تاريخنده اصول مشورت عليهنده بولان اشخاصك درميان ايتدكلى عدم مشروعيّت ماده سنك و ياخود شمدي ده خلاف مأمول برى ميدانه چيقوب اويله برادعا و دعوا درميان ايلرسه او دعوانك حقايق اسلاميه ي منافي اولديغى شرعاً اثبات ايتكدر .

طقسان اوچ تاريخنده افكار عموميه عثمانيه نك حائز اكثريت عظيمه اولان قسم اهمي ده مشورتك مشروعيّتى و آنك دوامى لهنده بولنيوردى . افكار امت دائماً موقتاً محروم اولديغى قانون اساسينك عودتى طلبنده بولنيوردى . مقربين پادشاهى دخى او افكار عموميه عليهنده وارقوتى بازويه ويره رك استبدادى فعلاً مدافعه ده و قانون اساسى كله سنى تقوّه ايدنلرى نفى و تغريبه حبس و توقيفه ، افراد امتى خانمانلرى محو ايتكده اصرار ايدنيوردى .

نچه استبداد حرّيت ملته آرزوكش اولانلرى متصل يقالامقده ثقّت و شدت اداره قانون اساسى ، حرّيت كله لرني سويليانلرى دكل خاطرندن كچيرنلرى ازمكده ايدى .

بو تضيقلر ، بوشدتلر ينه افكار امتك مجراسنى او مجراى حقيقتى محو ايدميوردي . داخل مملكتده سويليه ميانلر اوروپايه ، خارجه فرار ايدوب



اورادن ندای حریتی مملکتک داخلنه اسماع غیرتنده بولنه یورلردی (۱). تقریباً اون ایکی سنه اول تابعیت دولت علیه ده بولنان ارمنی تبعه عثمانیه طرفندن آناتولیده درسعادتده ایچه وقایع اغتشاشیه اظهار اولندی. میدان چیقاریلان بو اغتشاشات وعلی الخصوص مرکز خلافت عظمی اولان پایتخت سلطنت سینه دهکی وقایع مکرره ایله افکار عمومیه یه ایقاع ایدیلن تشویشات شایان نظر دقت و مستلزم عبرت احوالدن اولوب ارمنیلرک وجوده کتیردکلری بو اغتشاشات، میدان چیقاردکلری داخلی اختلالاتدن مقصدلری اورویانک نظر تنقیدینی ممالک عثمانیه یه جلب و دعوت ایتمکدن و قانون اساسینک تکرار تأسیسندن عبارت ایدی.

ارمنیلرک بو فکرینه وعلی الخصوص صورت حرکته قانون اساسی طلبنده بولنان ژون ترکلر اشتراک و متفقاً حرکت ایتدکلرندن اوزمان ارمنیلرک پلانلری ثمره سی ظهور ایتدی. اورویانک وعلی الخصوص انکلتزه دولتک ارمنی وقایعی، آناتولی ودرسعات اغتشاشاتی وسیله سیله سلطنت سینه ک امور داخلیه سنه عطف ایتدیکی نظر تنقید و دقت و دیپلوماسیجه کوستردیکی شدت بالنسبه زیاده جه ارمنی ساکن اولان ولایات معلومه سته ده اصلاحات معلومه مقررهنک اجرایی لزومی اعلانه سبب اولدی.

ولایات سته ده تقرر ایدن بو اصلاحات ذاتاً سلطنت سینه جه ده اوللری تدریجاً تقرر ایدوب حتی طبع و نشر ایدلمش و دولتک مجموعه قوانینی اولان دستورلرده درج اولنمش اولدینی حالده دور سابقده شدتله تعقیب و محافظه ایدیلان تمرکز معاملاتنه مخالف اولدینی جهتله موقع تطبیق و اجراییه وضع ایدیلان برچوق نظامات و تعلیماتک بر قسمندن هم ده بر قسم قیلندن عبارتدر. ذاتاً مداخلات واقعه دن اول اعلان ایدلمش و فقط دور استبدادک کل قوتله مدافعه ایتدیکی تمرکز معاملات اصولنه مخالف بولنمش اولان اصلاحاتک ارمنی ساکن بولنان یالکز ولایات سته ده قسماً قبولیه اورویانک ارمنی مسئله سنده کوستردیکی شدتک اوکی انیشیدی.

(۱) مجرد قاجدینی وسیله استفاده اتمک ویا منفیاً معاش و مأموریت المی ایچون اورویایه کیدنر ویا خود حکومت مستبدنه ک حدتی حلب ایدنر بو غیرتپوراندن مستشارلر.

ارمنی مسئله سنده اوروپا نك بداية كوسترمك ايستديكي و كوستردكي شدت پك بيوك ومهم نتايجه سبب اوله بيله جك درجه ده ايكن دولتجه ذاتاً اسكيدن برى تقرر ايتمش بولنان اصلاحاتك قسم اقليه اكتفا اولنمى وانك ده ولايات ستهيه حصر وتخصيص قلمسى قانون اساسى طلبنده بولنان افكار عموميه قارشى دور استبدادك بيوك بر موفيقى عد اولنه بيلور . او قدر كه عصر لردن برى سلطنت سنيّه عثمانيه اوروپا نك بوقدر نظر مساحه سته مظهر اولمامشيدى .

ولايات ستهيه عائد مقررات اصلاحيه اوصرده بالعموم ولايات شاهانديه ده تعميم ايدمك ايستلدى و حتى تشكيل نواحى ايجون طشره مأمور لرينه پك چوق اوامر دخی يازلدیسه ده نهايت بوقدر جق بر غنايت حریت بخشا دخی استكشار اولنه رق اندن ده صرف نظر اولندى و اولبايده كى مخبرات ابتدائيه واوامر متقدمه نك ثمره سى كورنمدى . هيچ برشى ياپلدى قالدى .

اناطولىده ولايات ستهيه ياپيلان بواصلاحات ناقصه روم ايلي جهتنده هيچ ده تطبيق اولميه رق اوراجه ده روم ، بلغار ، صرب ، اولاح ، عنصر لرينك افكار متخالفه سندن وتضاد مسلكرندن متولد مشكلات سياسيه اوروپا نك مداخلات شديد سنى دعوت ايدرك نهايت « ولايات ثلاثه » ناميله روم ايلیده دخی اناطولىده كى ولايات ستهيه مشابه ومقياسى ده واسع بر اداره تشكيل ايتدى . ده صكره لرى عماره سنجاغنده كى اراضى اميريه اعشارى التزامتدن وباخصوص خزينه خاصيه عائد حاصلاتدن طولايى عماره سنجاغى عشاير نجه وسوء اداره عموميه دن ناشى متفك سنجاغنجه وعراقك سائر محللر نجه كرك بين العشاير اجراى انتقام واغراض ايجون كرك سوء اداره سببيله حكومه قارشى قويمق ايجون عربرك پيديرى ظهور ايدن سلاح صدارى حكومت سابقه نك صماخ اطلاعاته واصل اولدى .

بغداد ، موصل ، بصره ولايات ثلاثسى ايجون ده بر اصلاحات تعليماتى ياپيله رق غايت واسع بر ماذونيت ايله عراقه بر وزير رياستى تختنده بر



هیئت کوندزلدی . کرک اناتولیده وروم ایلیده کرک عربستان و کردستانده اداره سابقه‌دن حاصل اولان خوشنودسزلق اوقدر تعمم ایتدی که ولایات سته وولایات ثلاثه عنوانیه ارمنیلرک وروم وبلغار اقوامنک تمرء مطالب شدیدسی بولنان اصلاحات نظر عمومیده کافی کورنموردی وکورنمدی . هله اصلاحات عراقیه مادهسی باشلامدن مقام صدارتک بغداد و بصره والیریله اصلاحات مأموری اراسنده تأسیس ایتدیکی و سبیت ویردیکی اختلافات اثریله جنین صلاح مادر اداره‌دن طوغمهدن وفات ایتدی .

ولایات سته وولایات ثلاثه‌دهکی اصلاحاتک تقرریله اولبایدهکی غوائل بر درجه‌یه قدر نتیجه‌پذیر اولمش ودها طوغریسی قانون اساسی طلبی رماد سکون تحتنده کزلمان آتش کی عنودن عاری کی کورنمش ایسه‌ده طلب محق حریت افکار امتدن برکون بیله دور قالماشدر . ونهایت حمد اولسون بیک اوچیو ز یکریمی درت سنه‌سی تموزینک اونجی کونی جهله‌جه معلوم اولدینی صورتله بر ثلث عصردن بری اکثریت عظیمه ملت طرفندن آرزو وطلب اولدینی وجهله حریت عمومی استحصال قلمشدر .

طقسان اوچ تاریخنده نشر اولنان قانون اساسی علیهنده بولنان فکرلر بوکون یا کلیاً نابود و مفقود ویاخود پک محدود بر درجه‌ده ایسه‌ده هر حالده قانون اساسینک و اصول مشورت و مشروطیتک احکام جلیله اسلامییه موافق و مطابق اولدینی شرعاً و نقلاً اثبات ایتک بقای حریت عثمانیه ایچون اهم و الزم اولدیغندن و حکومت عثمانیه خلافت اسلامییه مقامنه قائم بولندیغندن بوقضیه مهمه‌نک واضح و غیر قابل‌الاعتراض بر صورتله اثبات ایدلمسی وجودیله مفتخر اولدینم دیانت جلیله اسلامییه وافراندن بولتمقه مباحات ایتدیکم تابعیت عثمانیه سوقیه تنسیب اولنهرق « اسلامده خلافت » نامیه شو رساله‌نی تحریر ایتدم .

ومن الله التوفیق



اسلامده خلافت

مبحث

۱

بسم الله الرحمن الرحيم

بعد ادای ماوجب علینا

حکومتلرک تأسسی و جایب عقلیه دن میدر و جایب شرعیه دن میدر ؟  
بر هیئت اجتماعیه نك مرکب اولدیغی افرادك كندی اره لرنده کی حقوق  
بین الافرادینی و او هیئت اجتماعیه نك دول و ملل خارجیه ایله و قوعی طبعی  
اولان هر نوع مناسباتی محافظه ایتمی و بالخاصه افراد هیئتك یکدیگری حقوقه  
تجاوز و شو واسطه ایله هیئت اجتماعیه نی راحتسز ایده مامسیچون عقلاً  
حکومتك وجوبی غیر قابل انکاردر .

حکومت و تشکیل حکومتیه متعلق اولان حقوق سیاسیه موجود اولمز  
ایسه افراد ملتدن قدرتی ، کوچی یتیشانلرک کوجسز ، قدرتسز اولانلره  
تجاوز نری غالبلرک ؛ مغلوبلرک حقوق شخصییه و مشروعهلرینی اخذ و غصب  
ایتملری طبعیدر .

افراددن کوچی قدرتی مساعد اولانلر مادونلرینی بالتجاوز اضرار  
ایستکلری کی انلردن زیاده قدرتی بولمیلرده بولمیلرکدن بولمیلرکده  
دها قوتلیر طرفندن مغلوب و متضرر ایدملری امر جلی اولدیغندن حکومت  
و حکومتك لوازم طبعیه و ضروریه سندن بولنان حقوق سیاسیه موجود اولمز



ایسه هیئت اجتماعیه‌نک اداره‌سی دائرة انتظامدن چیقار عدل و حق یزینه حقوق بین‌الافرادده «الحکم لمن غلب» قابعدۀ مضره‌سی قائم اولوز . جور و ظلم ایله انتظام نوع بشر «هرج و مرج» برحاله کلور .

بوقاریشیقلاقلره محل قلاماق ، افراد ملتک و هیئت اجتماعیه‌دن هر برینک حال و شاننه ووسع واقتدارینه کوره حقوق شخصیه‌سنه مالک اوله‌بیلیمک اوزره حکومتک و حقوق سیاسیه‌نک وجوب وجودنی هر عقل سلیم اعتراف ایلر بوکا مبنی حکومتک وجودی واجبات عقلیه‌دندر .

مسکن نوع بشر اولان کرۀ ارضک هانکی کوشه‌سنه سوق نظر تدقیق اولنسه ، خلقت آدمدن بوکونه قدر دنیاک هر هانکی زمانی تأمل و تعمیق ایله تتبع ایدلسه حکومتک موجبات عقلیه‌دن اولدیغنی اثبات ایده‌جک احوالک وجودی در حال هیاکل سیاسیه‌سیله ، هیئت عظیمۀ اجتماعیه‌سیله برابر مشاهده اولور . بو وجوب عقلی انکاری هیچ بر زمان قابل اوله‌میان حقایق محضه‌دندر .

حکومتک وجاب عقلیه‌دن اولدیغنی رأینده بولنان عقلا اسباب مبحوثنی و الحاصل هم عدالت دائرة سنده حفظ حقوق بین‌الافرادنی همده هیئت اجتماعیه‌نک خارجه قارشنی حفظ حقوق عامه‌سی مطلقا حکومته محتاج اولدیغندن شو محافظه خدمت مهمه‌سنده‌کی وجوبی بوبابده‌کی رأی و مطالعه‌لرینک صحتته حجت و دلیل اتخاذ ایتمشلردر .

فی الحقیقه شو حجتلرک صحتته ، قوتنه هیچ بر صاحب عقلک اعتراض ایتسی امکانی‌ده یوقدر . دیانت جلیله‌ اسلامیه‌ده ایسه حکومتک یالکز وجاب عقلیه‌ دائرة‌سی کی بالنسبه محدود بر محیطده قالمیوب اولبایدکی وجاب عقلیه‌نی بالتوسیع وجاب شرعیه‌ دائرة منجیه‌سنه ادخال ایتمشدر . یعنی حکومت اساساً وجاب عقلیه‌دن اولقله برابر وجاب شرعیه‌دن بواندیغنی‌ده دیانت مقدسه‌ احمدیه طرفندن کمال اهمیته قبول و تصدیق بیورلمشدر . بوکا مبنیدرکه دین اسلامده خلافت الک مهم بر امر دینی اوله‌رق وجوده کلشدر .

ملت اسلامیه نك كرك حقوق بين الافرادى كرك خارجه قارشى حقوق عامه سى اك موافق وناچيز اولان مفردات جزئيه سندن معظمات كليسه سنه قدر شرعاً تقدير وتبيين و حقوق اداره داخليه و حقوق سياست خارجه وضريح و صريح بر صورتله تعيين اولنديغندن دين مابين احمديجه ، عالم اسلاميتجه حكومت و جاياب شرعيه نك اك مهم بر ركنى اولمق اوزره ميدانه كمشدر .

ديانت جليله اسلاميه نوع بشرجه شمدى يه قدر مشاهده اولنان كافه ترقيات مدنيه اعتباريله معقول و مستحسن كورينان و بوندن صكرده مدنيته قدر ترقى ايدرسه ايتسون كائناتك دوامنه قدر ازمنه مختلفه مستقبليه معقول و مستحسن كورنمى ممكن اولان پالمله احوال و خصوصيات اداره و سياسيه ينى جامع و شامل اولمسه و بين البشر حكومتك وجودندن مقصود اولان بى نوعمى حسن اداره ايچون اك نافع واك الزم اصول و قوانين مدنيه ينى حائر بولمسه مبنى و جاياب شرعيه دن بولنان حكومت و خلافت اسلاميه نك اك معقول بر حكومت اولديغى و حتى حقايق اداره سنه دقايق سياسيه سنه كسب و قوفدن صكره ناجا عنادله مناسبتن اصرارله اولمسه بو حقيقتك غير مسلم كافه اقوام و ملل طرفندن دخى تصديق اولنه جنى مسلمدر .

حاصلى حكومت بين العقلا هر نه قدر و جاياب عقليه دن ايسه ده دين مابين مصطفىويجه و جاياب شرعيه دندر . بو دين على اهم امور دنيويه دن اولان حكومت مسئله سنه دخى بالمله معقولاتى شمول تام ايله محيط اولدقدن بشقه حكومت اسلاميه جه اجرا و انفاذى فريضة دن اولان بر چوق حقوق الهيه نك ايفاسنى ده ضامن و متكفلدر .

اساساً حكومتك و جاياب عقليه دن اولمى خصوصنه قصر مطالعه ايدلسه بيله بويله بر حكومت معقوله حقوق بين الافرادى و حقوق جمعيتى حسن محافظه مقصد عاليه سنه مبتيدر . افرادك يكدى كرى حقوقه رعايتى حقوق سياسيه جه و قانون حق و عدل نظارنجه تحت مجبوريته و دائره ضرورته اولديغى هر كس اعتراف ايدم بيلور . حقوق سياسيه بشريه ره رعايتك وجوبى قدر و بله آندن



يك چوق زياده اوله رق نوع بشري خلق و ايجاد و نعمت حياتيه وعد و احصاسي قابل اولميان نعم عاليه و متنوعه سائر ايله قرين اسعاد ايدن جناب واجب الوجودك حقوق خالقيت و ربوبيته ده رعايت و حرمت دخي مجبوريت تحتده در . بزم شو رساله مز مجرد خلافتك دين اسلامده صورت تأسسي ماده سندن باحث اولديغنه و خلافت و حكومت اسلاميه نك وظائفي جملهدن اولان تبعه مسلميه ي عباداته سوق ايتك قضيه سي رساله مزك مسلك و موضوعي خارجنده طو تدليغنه . بني عبادات و ديانات امورينه متعلق خصوصاتي كتب فقهيه يه بالحواله رساله مزده يالكز خلافته و خلافتك دخي يالكز صورت تأسسنه و مشورتك مشروعيته دائر ايضاحات لازمه درج اولنه جقدر .

خلافتك امور مهمه دينيه مزدن بولنديغي حكمتنه مبني دركه ديانت عليه اسلاميه « حكومتي » خلافت و امامت لقب مستوجب المفخر تيله توسيم و مسلم و غير مسلم كافة افراد ملتي خلافت و حكومت اسلاميه نك تحت رأيت عدل و انصافده جمع و اطمين ايتشد .

حكومت اسلاميه ده خليفه يه يعنى مشروعاً مقام خلافتده بولنان ذواته اطاعت و جايب شرعيه دندر . چونكه دين مبين احمدى داخلاً حقوق بين الافراد ايچون خارجاً حقوق عموميه ملت ايچون مفرداتي تعداده لزوم اولميان لا يعد ولا يحصا قوانين و اصول عادله يي امرو وضع و بو اوامر شرعيه و دينه نك اجرا سنده مقام معلاي خلافت و امامته توديع ايتشد . قوه تشريعيه و قوه اجرائيه نك اس الاساسي اشته بو قضيه مهمه تشكيل ايد بيلور .

امامت و خلافت اسلاميه نك صدر اسلامده و برنجي خليفه بولنان ضديق اكبر زماننده تأسسي مشورته و اجماع امته مستند اولديغنه و بو جهته احكام قطعيه دينه دن بولنديغنه شبه اولمديغندن بو جهتي ديناً و شرعاً توضيح ايدم :

(\*) ديانت اسلاميه حقوقده مساوات كامله يي امر ايتكله برابر مسلمانلري غير مسلملك حقوقي محافظه دخي يك شدله مأمور ايتش اولديغي احكام دينيه مزك تبعه عنايت ايدن لرجه معلوم و مبرهن در .

فخر عالم صلی الله علیه وسلم افندمز هیچ بر کیمسه بی تعیین اسم ایله رسماً تخلیف ایتماشلر ایسه ده پک چوق حکم سیاسیه به مبتنی اولان بو عدم تصریح خلافتک امور مهمه دینه دن اولدیغه مانع دکلدر .

مبنای دیانت جلیله اسلامیه بازاستثنا عموم موحدینک معلومی اولدیغی وجه ایله ذرت اصل واساسه مستنددر .

برنجیسی کتابددر . کتاب کلامه اولان فرقان عظیم الشاندر .  
ایکنجیسی سنتدر . سنت سنیه فخر کائنات علیه افضل التحیات افندمز حضرت تهرینک صورت قطیعه ده ثابت اولان اقوال و افعال قدسیه و علویه رسالت پناهیلریدر .

اوچنجیسی اجماع امتدر . اجماع امت مؤسس دیانت و واضع شریعت احمدیه اولان خاتم النبیین علیه صلاة الملك المعین افندمز حضرت تهرینک شرف صحبت و رؤیتنه مظهریتله کامران اولمق بختیارلغنده بولنان اصحاب کرام رضی الله تعالی عنهم حضرتانک کتاب و سنتدن استخراج ایتدکلری احکامه کوره مسائل دینه ده وقوع بولان اجماعلریدر .

دردنجیسی قیاس فقهدار . قیاس فقها کتاب و سنته و اجماع امته مستند اولان مسائل و مواد دینه و شرعیته نک قیاس اتخاذیله او مواد و مسائله مماثل خصوصات فرعیته نک اصلرینه بالارجاع استنباط احکام اولتمسیدر .

تأسس خلافت فی الحقیقه بوجه مشروح « بن فلان ذاتی خلیفه ایتدم » صورتنده صراحت جلیله نبویه به اقتران ایتماش ایسه ده شو عدم تصریح اسم و شخصه عائد اولوب خلافتک لزوم و وجوب وجودینه تعلق اولدیغندن امر خلافت و امامت اساس اربعه دیندن ایکنجیسی بولنان اقوال سنیه رسالت پناهی و اوچنجیسی اولان اجماع امته حاصل اولمش و فضلائی اسلام دخی حضرت صدیقک خلافتی ماده سنی قرأندن صراحة استخراج ایتمش اولدقلرندن امر خلافت اساس اربعه دیندن برنجیسی اولان قرآن ایله ده مؤید بوخنس و بنابرین « خلافت » دیمزک اساسلرندن کیمهی بولنانلره ابتناء شکل ایتمیدر .



مقتدای کافهٔ مرسلین خاتم‌البین افدمز حضرتلرینک زمان سعادت  
 نشان نبوت‌پناهیلری قرین اختتام وروح پر فتوح رسالت‌پناهیلری عازم کلشنسرای  
 علین اولدینی زمان اونبی محترم اورسول مکرم افدمزک اصحاب کرام معالی  
 اتساملری تدفین وجود سعادتلرندن مقدم خلیفه وامام نصبی مسئله‌سیله اشتغال  
 ایتدکلری معلومدر .

تدفین قدسیت قرین حضرت نبوی‌یه تقدیم اولنمندن مستبان اوله‌جنی  
 وجهله اسلامده تأسیس حکومت و تعیین خلافت اجماع امتله هر درلو وجایب  
 وفرائض دینی‌یه تقدیم اولنمش وحقی وفات جلیل نبوی بتون اصحاب کرامی  
 مبهوت ایتمش وعادتا سرسماتمش اولدینی بر زمانده صدیق اکبر قیام ایدهرک  
 بین‌الاصحاب ایراد ایتدیکی نطقده

« ایها الناس من کان یعبد محمداً فان محمداً قد مات و من کان یعبد الله  
 فاناه حی لا یموت لابد لهذا الامر (۱) من یقوم به فانظروا وهاتوا رأیکم »  
 دیدیلر .

### بو نطقک مال عالیمی

« ای ناس ! محمده عبادت ایدنلر وار ایسه محقق بیلسونلرکه محمد وفات  
 ایتدی . جناب حقه عبادت ایدنلر بیلسونلرکه جناب واجب‌الوجود حی  
 ولایموتدر . امر خلافتی اداره ایدهرک بر ذاتک نصب و تعیینی لابددر مسئله‌نی  
 نظر عمیق ایله تدقیق ایدیکز رأیکزی میدانه قویکز . »

حضرت صدیقک شو نطقی فخر عالمک وفاتندن صکره اسلامده حکومت  
 و خلافتیه دائرک اول سویلنمش اولان بر نطقدر . مباحث عظیمهٔ خلافت  
 وامامتده برنجی سوز ایشته بودر . قارئین کرام دقت ایدرلرکه بو نطقده خلیفه  
 وامام نصبی ایچون منصب عالی خلافت و امامتده مقتدای اقدم و برنجی خلیفه

مؤمنین اولان حضرت صدیق اعظم اداره امور حکومت و تدویر شؤون خلافت شویله طورسون بالذات نصب و تعیین خلیفه ایچون امتی انتخاب اصولنه و ایضای وظیفه مشورته دعوت بیورمشلردر .

بتون اصحاب کزین حضرت صدیق طرفدن او مدهش زمانده وقوع بولان بو افادات و ایضاحاتک صوابه اقتراعی اعتراف و تصدیق ایلدیلرکه حکومت و خلافتک و جابب شرعیه دن اولدیی و شؤون اسلامک مشورته مربوط بولندیغی بو اجماع امتله رهین رتبه ثبوتدر . یالکز شو فقره حکومت اسلامیه ده وجوب مشورتی قطعی بر صورتله اثباته کافی اولدیغی وارسته احتجاج و دلائل سائره ابرازینه غیر محتاج ایسه ده بز رساله مزده بوبابده دلائل کثیره شرعیه نی پی در پی ایضاح ایدرز .

حکومتک و جابب شرعیه دن و مشورته تابع اموردن اولسی علم اسلامده تأسس ایدن امامت و خلافتک بروجه محرراجماع امته و شو اجماع امتک دخی سماع و تواترله « عصرأ بعد عصر » اهل سنت و جماعت نندند ثبوتنه مبنیدر . شارع شریعت احمدیه مؤسس دیانت علویه اسلامیه اولان نورهدایت و ماحی ضالالت صلی الله علیه و سلم افندمر حضرتلری حدود شرعیه نک اقامه سنی حدود و سنور اسلامینک محافظه سنی تجهیز جیوش و جنود ایله اجرای جهاد اولمسنی و بیضة اسلامک (۱) حفظ و صیانتی و الحاصل و جابب دینیهنک و حقوق سیاسیهنک و حقوق بین الافرادک استکمال اسباب حصولی امر و فرمان بیوردقلری جهته بو اوامرک انفاذ احکام منیفه سی مطلقا تأسیس حکومت و خلافتنه متوقف

(۱) بیضة اسلام جاده شریعت دیمکدر . شریعتک اصل معناسی بولدر ، طریقدر پک چوق مستعمل و ایشلک اولان یوللرده نباتات و سائر ثبوت ابدیه جکندن اوکی جاده لر دائماً بم بیاض کورینور و طریق اولدیغی اکلاشیلور فقها و علمای اسلامک دیانت جلیله احمدیه بیضة اسلام دیملری شریعت محمدیه نک و طریق حقک آتیق و ظاهر یولر جاده لرکی بم بیاض کورنمکده اولدیغنه اشارتدر . انا طولی ده شوسه یاپیلان (۲) جاده لرده سیاحت ایدنلرک اوزاق یرلردن شوسه لری کوردکاری کبی طریق هدایتی کورمک آرزوسنده بولنلرده دین احمدی بی اول صورتله عیان بیان کوره بیلورلر .

(۲) مع التأسف پک آز یابیلشدر .



اولسی ده حکومتک و خلافتک امور معظمه دینه دن اولدیغی مبتدر . حکومت  
و خلافتک تاسسی ملت اسلامیة ایچون عد واحصاسی غیر ممکن اولان منافع  
عظیمه یی جالب وینه حد و انتہاسی غیر معین بولنان مضرات و مہالک جسیمه یی  
دافع و سالب اولسیله حکومت اسلامیہ نك اساسی مشورته مستند اولان خلافت  
اولدیغی اظہوردر .



## حکومتلرک صورت تشکلی - خلافت اسلامیہ نک صورت تاسسی

اک عادی واک بسیط اولان حکومت ، حکومت پدرانہ در . اک اوفق بر قبیلہ و عشیرت ریاستندن درجات و مراتب مختلفہ و متنوعہ بی شامل اولان حکومت مشروطیہ واک مستبد و استبداد ایله اک قوی الشکیمہ بر درجہ یہ واصل اولان حکمترلہ وارنجہ یہ قدر کرء ارض اوزرنده تشکل ایتمش بولنان حکومتلرک همان عمومی غالبک مغلوبی پنجه قهر و اطاعتی التسه المق صورتیہ تأسس ایتمش اولدقلرنده شبهه ایدیله من . واقعاً نوع بشر ایچون بر هیئت اجتماعیہ ایچون بر حکومتک وجودی عقلاً واجبدر . اختلاف ادیان و مذاهبہ برابر کافئ ملل واقوام بو وجوب عقلی تصدیق و اعترافہ بالضرور مجبوردر . شو قدرکہ ملل و اقوام غیر مسلمہ ده « کیم حاکم اولسون کیم محکوم اولسون کیملر تابع کیملر متبوع طانسون » مسئلہ سی میدانہ چیقنجه در حال اومستلہ یہ توأم اولمق اوزره « الحکم لمن غلب » و « غالب مغلوبک متبوعیدر » اصولی ده اورتہ یہ کلشدر . نوع بشرده حالا اردی ارده سی کیلیمین بونجه محاربات ، بونجه مقاتلات هپ « تابع کیم اولسون متبوع کیم بولسون » مسئلہ سندن تولد ایتمش ودائماده « الحکم لمن غلب قاعده سی هر اصولہ هر حقوقه مع التأسف غالب مطلق اولمشدر .

دنیاده تشکل ایدن حکومتلرک همان عمومی بروجہ محرر بر وجیہ عقلیہ اولمق اوزره تأسس ایتمش اولدیغندن حکومتی و جابب عقلیہ دن بیلمش اولان اوکی مملکتلرده « بو صنف خلق حاکم اولسون و شو صنف افراد محکوم اولسون » دیه عادلانه ویا بر اساس محقه مستند مقررات



دائرہ سندنہ تشکیل حکومت ممکن اولیوب «الحکم لمن غلب» قانون لایستغیرینہ توفیقاً قوی و غالب اولانلر حاکمیتی اجرا و حکومتلرینی تأسیس ایتمشلر و مغلوب وضعیف بولنانلر بالاضطرار آنلرک ربقہ اطاعتی آلتنه کیرمشلردر .

نهایت اشبو «الحکم لمن غلب» قاعده سنه تطبیقاً تشکل ایدن حکومتلرک اربابی افراد محکومہ نی و تبہ نی اطاعت جبریہ بونیدروغی آلتنده اداره ایتمک اوزره اداره «سیاسة» وقوعه کثیردکاری معاملات و حرکاتک انصاف و عقاله و باخصوص عدل وحقه اقترا ن ایدہ مامسندن متولد منازعات و حاکم ایله محکوم آرمسندنہ وقوع بولان محاربات و مقاتلات کرء ارضک بعض قطعہ لرندہ واز جملہ اوروپاده محکوملرک استحصال حقوق حاکمیتنه باعث اولمش و شو صورت حکومت مشروطه و جمهوریه نك تشکل و تأسیسنه و ملل و اقوام محکومہ نك اولوجہلہ حقوق حکومت ملیہ و قومیه لرینہ اشتراک ایله منافع عمومیه لرینک تأمین ایدلسنه و بواشترا کدن ایوم اوروپاده و اوروپا خارجندہ بعض محللردہ پارلمنتو دنیلان اداره نك و حاکمیت ملیہ نك ظہورینہ سببیت ویرمشدر .

بو حکومتلردن جمهوریت قسمی اولانلری کلیاً حکومت عوام دیمک اولوب مشروطاً اداره اولنان حکومتلر دخی کاه کافہ عوامدن وکاه عوام وخواصدن متشکل حکومت مشترکدن عبارتدر .

پارلمنتو اصولنک اداره « و سياسة » بعض مضراتی وشیان مؤاخذہ و تنقید حالاتی و پارلمنتولرک منسوب اولدقلری دولتر و ملترجه موجب شین اوله جق پک چوق رذائللری وارسهده دنیاہ ہر ایش نسیدر . وشمیدی حالہ بو اصول اداره نك اداره مستبدیه نظراً فوائدی حددن افزوندر . اساساً بوبحث اثرمنک صددی خارجندہ بولندیغندن بوبایدہ دہا زیادہ تدقیقات و تعمیقانہ لزوم کورمیز .

مع مافیہ شوراسنی دہ بیاندن کندیمزی آلامیزکہ اوروپاده حکومت مشروطه اصولنک ممالک شرقیه نظراً دہا قدمی اولمی اورالرجہ حکومت مطلقہ نی تقید ایدہ جک احکامک بستیون معدوم بولمنسندن و ہیئت حکومتک

بو اطلاق و عدم تقیددن بالاستفاده صنوف تبعه‌نی تحمل ایده‌یه‌جک بر درجه‌یه کتیرمسندن ایلری کلشدر . کرچه شرقده دخی حکومت مستبده کیف مایشاء حرکت و اطلاق عنان شدت ایتشلسده اهالی اسلامییه یونان اولدقلری کرداب جهالته رغماً میدانده اولیای اموری و حکمدارانی ضبط ایده‌جک بر عدالت شرعیه موجود اولدیغنی فرض ایتشدر و بوکده کووه‌نهرک مدت مدیده دوچار اولدقلری فلاکتلرک اشخاص معدوده مستبدنک حیاتلریله قائم اولدیغنی بیلدکارینه مبنی حقیرنی آرایه‌مامشدر . غریبه‌بو امید اولمینجه همان سلاح عصیان صارملق مجبوریتی حاصل اولمش شرقده ایسه احکام شرعیه کبی بر مانع استبدادک وجودی بو مجبوریتی ده‌ا کج احساس ایتدیرمشدر .

فی‌الحقیقه پارلمنتور نه صورتله نه سببه مبنی تأسس ایتشدر یوقوروده بیرن اولندیغنی وجه ایله بر مملکتی ، بر ملتی حکومت غالبه و مستبده‌سی التنده ازمش و اراده کیفه‌سندن بشقه بر قید دینی و شرعی و یاخود — افرادک انضمام رأینیه مبتنی — بر قید قانونی ایله مقید بولنماش اولان بر حکومتک اداره غیرعاده‌سنی مصلحتلرینه ، منفعتلرینه ، محافظه حقوق افرادیلرینه موافق کورمیانلر حکومتک او استبدادیجی منع ایتک اسبابی تحصیل و تکمیل و ارباب حکومت طرفدن تأیید و تشیید نفوذ و سیاست نقطه نظرینجه تأسیس ایدلمش اولان اصول و نظاماتی تغییر و یا تعدیل طلبیه و بو طلب یولده قانلر دوککله نهایت اوزویا حکومت مستبده‌سی حکومت مشروطیه منقلب و پارلمنتو اصولی اداره کیفیه و مطلقه‌یه غالب اولمشدر .

ملل و اقوام غریبه‌نک افراد و عوامی طرفندن وقوع بولان بوادعالردن میلیونرجه قان دوککدن مقصد هیئت اجتماعی‌نک مدارادارمه‌سی بولان حقوق سیاسیه‌ده عموم افرادملتک رأی و تنسییه اصول و قوانین مقتضیه و عاده تأسیس اولمنی و حکومتکده اداره کیفیه‌سنه تابع اولیه‌رق او اصول و قوانینه تابعیت مجوریتنده بولندیرلمسیدر یعنی حکومتک حقوق سیاسیه و حکمرانی‌سی اهالی



طرفدن بخش ایدلمش بر حقدن عبارت اولق اوزره دائره محدوده ومعینه ایچنده قالمسیدر .


ایضاحات محرردن مستبان اوله جفی وجهله واقعا پارلمتو اصولی بو مقصدی تمامیه استیصال ایدمالمش ایسهده هر حالده مهم بر درجهده قسماً حاصل اولدیغنه یعنی حکومت مستبدنك اداره کیفیه و مضره سنی ختامه ایردردیکنه شبهه یوقدر .

اوت ، بو مقصد تمامیه حاصل اوله مامشدر . حد ذاتندهده حصولی امکانسزدر . چونکه برملتک بر هیئت اجتماعیه افرادینك کاملاً رأینی مطالعه سنی بر نقطه یه جمع اتمک و جمع آراء عمومیه بولنان او نقطه یه استناداً قانون یامق البته امکان خارجندهدر . حتی جمهوریتله اداره اولنان حکومتلرکه بعض حکومت مشروطه کبی اولیوب صرف حکومت عوامدن عبارتدر انلرده بیه تمامیه افکار و آراء عمومیه یه توفیقاً قانون یاییله مامقده ونهایت تنظیم قوانین وظیفه و صلاحیتی آراء عمومیه ایله منتخب و منصوب اولان پارلمتویه تودیع مجبوری کور نمکدهدر .

پارلمتو اصولی شو حالده نه نتیجه یی انتاج ایتشد بر حکومت طرفدن بر مجلس مخصوصه و یا خود اشخاص معینه رأینه توفیقاً حقوق سیاسی و اداره یه متعلق تنظیم قلنان اصول و قواعدک و نظامات مرعیه نك پارلمتو اصولی جاری بولنان ممالکده او حقک پارلمتو دینلان بر قایچ یوز شخصی تودیعندن بشقه برشی یاییله مامشدر .

مسئله یی عقلاً موازنه ایدلم ، معقولانه تطبیقاً براز محاکمیه چکلم : بر حکومت مستبدنك اراده و اداره کیفیه سنی محو اتمک و استبدادی قزمق او حکومت طرفدن تنظیم نظامات درایت و اهلیتیه معروف اولان و هر کسجه حال و شانی کسب تمیز ایدن یتمش سکسان ذاتک مثلاً بر شورای دولتک و یا بر مجلس مخصوصک فطانت و کفایتیه حواله تودیع اولنمشیکن پارلمتو اصولنك جاری بولندیغی مملکتلرده اشبو یتمش سکسان ذاتک تکثیر عددندن و مجلس

مبعوثان نامیہ درت بش یوزہ ابلاغندن بشقہ برشی دکدر . حال بوکہ دین اسلامده خلافت رسول اکرم صلی اللہ تعالیٰ علیہ وسلم افدمنز حضرتلرینک امت اسلامیہ اوزرنده اجراسنه مأمور اولدقلری حقوق الہیہ و حقوق سیاسیہ بشریہنک قوانین الہیہ دائرہسندہ انفاذی ایچون تأسس ایتمش بر مأموریت مقدسه و معظمه اولدیغندن و عظمتیہ برابر اساسی دخی مشورته مستند بولدیغندن بزجه مشورتی تأسیس مقتضیات دینیہ مزنددر . اوروپالیرک کی کبی یالکز معقولاندن ایلری کله برشی دکدر .





خلافت و امامت اسلامیه بدایه نه صورتله تأسس ایتمش و نه سبیه مبنی دیانت  
جلیله اسلامیه نك ارکان مهمه سی جمله سندن بولمشددر ؟

دین مبین احمدینك بنای قدسیت انتماسی برنجی مبحثده بیان اولندیغی  
وجهله کتاب و سنت و اجماع امت و قیاس فقہان عبارت اولمق اوزره درت  
رکن و اساسه مبتنیدر .

مقصدمز دیانت جلیله اسلامیه نك بناسی اولان شو درت اساسه متعلق  
ایضاحات مفصله اعطاسیله فقہه دائر بر رساله تنظیمی اولیوب خلافت و امامتک  
اشبو درت اساسدن هانکیسنه مستند اولدیغی و اك اول خلافت و امامتک  
نه صورتله تأسس ایتدیكنی و بودین علونك او خلافت و امامته نه نظرله باقدیغی  
توضیحدر .

امامت و خلافت اسلامیه ارکان اربعه دینیه نك ایکنجیسی بولنان سنت سنیه  
ایله و اوچنجیسی بولنان اجماع امتله تأسس ایتمش و معلوم اولدیغی وجهله سنت سنیه  
احکام جلیله قرآنیه یی و اجماع امت دنیلان اقوال اصحاب کرام ده سنت سنیه یی  
مفسر اولدیغندن حضرت فرقان عظیم الشاندن و سنت سنیه نبویه دن استنباطاً  
و دلالة حاصل اولان اجماع امتک بو حکمی تأیید ایلمش اولدیغندن بورلری  
موضیحا و مدلالاً اثبات اولنه جقدردر .

« اليوم اکملت لکم دینکم » آیت کریمه سی منطوق منیفنه کوره فرقان  
عظیم الشان دیا تی و فخر کائنات علیه اکمل التحیات افندمز حضرتلری ده امر الہی  
دائر سنده تمامیه و حقیقه و طیفه مقدسه نبوت و رسالتی اکمال ایتدکدن صکره  
سبب خلقت عالم او رسول مکرم و محترم افندمز حضرتلرینک عازم کلشنمرای  
علین اولدقلری زمان اصحاب کرام ذوی الاحترامک اولجه اشارت اولندیغی

وجهله ايلك اجراءات عاليه لري بالمشاوره امت ايچون امام و خليفه نصب و تعييني خصوصندن عبارت بولمئش و شو مسئله مهمه دينيه معاملات سائر دنيه نك جملة سنه ترجيح و تقديم قلمشدر.

خاتمة شرفنامه رسالت افندمن حضرتلري عازم كلزار عقبا اولدقلى كون مدينه منورده اصحاب كرامدن طائفة انصار فضيلت شعار « بنى ساعده سقيفه سنده » اجتماع و رؤساي انصار دن خسته اولدينى خالد « سعد بن عباد » رضى اه تعالى عنه حضرتلرينى مقام خلافته اجلاس ايچون اورايه احضار ايتديلر .  
حضرت سعد بن عباد اوقدر مهم و نازك بر زمانده او موقعده امر خلافته دائر شو نطقى ايراد ايتدى :

### حضرت سعدك نطقى

جناب حقه حمد و ثنادن صكره « اى معشر انصار سزده اولان سابقه اسلاميت و فضيلت اقوام عربك هيچ برنده يوقدر . فخر رسل صلى اه عليه وسلم افندمن حضرتلري مكه مكرمه ده بونجه سنه كندى قوم و عشيرتى آره سنده قالديلر . خلقى اسلاميته دين حقه دعوت بيورديلر . بومدته وقوع بولان دعوت جليله رسالت پناهيلى ثمره سيله كندى قومندن كندى عشيرتندن پك آز آدملىر نبوتى تصديق ايله اسلاميتى قبول ايديلر نبوتى تصديق اسلاميتى قبول ايدن بومؤمنلر بو مسلمانلر اوقدر آز ايديلر كه عليه الصلاة والسلام افندمن حضرتلرينى تقويه دين مكرمى تعزيره موفق اوله مادقن بشقه علمينده وقوع بولان تجاوزات و تعدياى بيله دفته غير كافى وغير مقتدر ايديلر . وقت كه جناب ذوالجلال لطف سبحانيسيله سرك (۱) اوج اعلاى فضيلته صعود دكزى مراد ايتدى . فضيلت و كرامتى سزده سوق و احسان ايتميسيله وحدانيت الهيه رسالت جليله نبويه ايمان و حبيب خدايى اصحاب كرامتى تقويه و كندوسنى و دين مبین احمدىنى اعزاز همت و امر جهاده صرف جل مقدرتله شوكت

اسلاميه ي اعلا و اعلان ايتديكز . دشمنلری علیهنده الكشدتلی مهاجمات و محارباتده بولنديكز بر درجه ده كه عربلر كاملاً طوعاً و كرهاً امر جليل الهی به مطيع و منقاد واك اوزاقده بولنلر دخی اثر جهاد و محارباتكز اولمق اوزره ویركو و جزیه ویرمكه قرین افتخار و اسعاد اولدیلر . سزك سيف صارمكزله بتون عربلر نبی ؑ ذیشانه باش اكدیلر . بوجه ايله برابر خاتم النبیین علیه صلاة رب المعین افندمن حضرتلری ده سزدن راضی و خوشنود اولدیغی حالدده بولكون سزى ترك ایدرك عالم عقبایه رحلت بیوردیلر . بناءً علیه امر امامت و خلافتك سزك بشقه لردن احق اولدیغكزده شبه اولدیغندن استبداد ايله خلافتك كندوكزه حصر و تخصیص ایديكز . خلافتك سزدن بشقه كیمسه عائد اولمیه جغنی بلله يكز .

انصار كرامك عمومى حضرت سعدك بوفكر و قولى قرین اصابت و افادات واقعه سنی نظر دفته آلمق بادى حسن موفقیت اولدیغندن و خلافت و امامتك كندوسنه توجیهی لازم بولنديغندن بحث ايله اولوجهله اجرای ایجابی مقتضى بولنديغنه دائر جواب ویردیلر .

بووقعه فاروق اعظم امام عمر رضی الله تعالى عنه حضرتلرینه اخبار اولور اولنر سعادتحائنه جناب نبیه یده بولان ابوبكر صدیق رضی الله تعالى عنه حضرتلرینه كلریچون خبر كوندردی . حضرت صدیق « مشغول اولدیغی » جوابی ویرمكه كلوب حضرت فاروق ايله ملاقاته شتاب ایتدی .

حدوث و ظهور ایدن بر مسئله دن طولانی همه حال حضورلری و ملاقاتلری لازم و لابد اولدیغی متضمن فاروق اعظم طرفندن كوندریلن ایکنجی خبر اوزرینه حضرت صدیق سعادتحائنه قدسیت آشیائنه جناب پیغمبریدن چیقیدیلر و امام عمر حضرتلریله کوریشوب انصار كرامك نصب امام و خلیفه حقنده کی مذاکره و قرارلرینی اوکوندیلر . در حال یانلرنده امین الامه حضرت ابی عبیده رضی الله تعالى عنه اولدیغی حالدده سقیفه بنی ساعدهیه کتدیلر .

اوراده اجتماع ایتمش و سعدبن عبادده حضرتلرینه بیعتی همان همان



قرار شد یرمش اولان انصار کرامه قارشو حضرت صدیق ترجمه سی زیده  
مندرج نطقی ایراد و بیان ایلدی .

### حضرت صدیقك نطقلى ترجمه سی

جناب حقہ حمد و ثنادن صکره « خالق الکائنات بزدن [۱] بریغمبر ذیشان  
بعث وارسال بیوردی . عبادالله جناب حق طائیدقلى وذات واجب الوجود  
یرینه طاشدن اغاجدن معمول و مصنوع مختلف و متنوع الهله طاپندقلى  
خالده انلری وحدانیت و عبادت الهیه دعوت ایچون اونئی ذیشان محترمی  
اوماحی کفر و ضلالی مأمور ایتدی . حضرت فخر رسالت وظیفه مقدسه  
نبوت و رسالتلری ایجابجه خالق توحید باریه و عبادت جناب کبریاه دعوت  
ایلدیهده ابا واجدادینک دینی ترک ایتمکدن ، دیانت جلیله اسلامیه و جدیدیه  
قبولدن عبارت اولان بودعوته اجابتی قوم عرب پک زیاده استعظام و مخالفت  
واکا کوره مقاومتیه زیاده سیله جد و اقدام ایتدیلر . حبیب خدا داعی طریق هدا  
اولان نبی امی عربی صلی الله علیه وسلم افندمک دعوت قدسیه سنه قارشو  
حق جلیل نبوتیناهیلرنده اذا وجفایه و نبوت و رسالتلرینی تکذیبه اجتسار  
ایدنلره مقابل نبوت و رسالتنی تصدیقه و کندوسنی تقویه و اقداره و دیانته قارشو  
کلان شدتی صبر و متانتله دفع و تحمله جناب حق مهاجرین اولینی تخصیص  
ایلدی . نبوت و رسالتنی اک اول تصدیق و هر درلو اذا وجفایه صبر و تحمل  
ایدن اشبو مهاجرین اولینک قلت نفوس و عددلریله برابر بتون عالمک کندولرینه  
قارشو وقوع بولان مخالفتلرندن متوحش و خائف اولدیلر . قلت عددلرینه رغماً  
کمال صبر و متانتله بتون معاندینه و کفار قارشو مقابلهده بولندیلر . ارض  
اوزرنده اک اول جناب حقہ عبادت ایدنلر ایشته بو مهاجرین اولیندر .  
وحدانیت الهیه نبوت رسالتیناهییه اول بول ایمان ایدنلر ینه آنلردر .  
علیه الصلاة والسلام افندم حضرتلرینک اک اولکی معاونلری . محبلى آنلردر .

انلر رسول اکرم افندمزك كندى عشتيرتيدر . بناءً عليه مؤسس دين مبین اولان فخر کائنات افندمزدن صکره خلافت وامامته احق الناس شبهه سزینه آنلردر . ظالم اولميانلر بوخصوصده آنلرله منازعه چيقاره مزلر . ای معشر انصار سزه کلنجه : سزك دینده فضلکمز ، اسلامده سابقه کز هیچ بروجهله انکار اولنه مز . حق سبحانه وتعالی حضرتلری دینه رسول اکرمه نصرت ایتمک اوزره سزی مأمور وعلیه الصلا افندمزك هجرتی ایچون ملککتکز اولان مدینهیی انتخاب ایتمسیه هجرت جلیله نبویه ایله سزی مفتخر ومسرور ایتدی . نبی مکرم سزه هجرت ایلدی . مهاجرین اولیندن صکره سزك قدر ومزتلکیزه یتیشه جک کیمسه یوقدر . بناءً عليه بز امرا ، سز وزراسکز هیچ برمصاحفده مشورتکزه (۱) مراجعتدن کیری قانیه بقدر . رأیکز منظم اولمادجه هیچ برایش کوريله میه جکدر .

حضرت صدیقک بونطقه مقابل انصار کرامدن « حباب بن المنذر بن جموح » رضی الله تعالی عنه قیام ایدوب وجه آتی اوزره ایراد نطق ایلدی .

« ای معشر انصار ! کندی امرکزه مالک اولکمز . چونکه خلق (۲) سزك سایه نباهتکزه درلر هیچ بر کیمسه رأیکز خلافتده حرکتیه جرأتیاب اوله مز . سزك رأیکزدن چیقماز . سز عزت وکثرت عدد و شوکتله برابر صاحب بأس وشدت سکز . خلق سزك ایده جککمز معاملیه ویره جککمز قراره ناظر ومنتظر درلر . اراکزه رأیکزه ظهور اختلاف مصلحتکمزجه مستوجب وهن وفساد اولور . بونلر (۳) سزك خلافت وامامتکزی

(۱) بك واضح وغیر قابل التأویل بر صورتله کوريله بورکه حضرت صدیق خلافتک مهاجرین کرامه تخصیصی ایچون انصار کرامه قارشو ایراد ایتش اولدیغی شو نطق ممدہ دخی هیچ بر مصلحتک مشورتسز کورنیه جکمی مؤسسات اقتناعیه دن اولمق اوزره بیان وتصریح بیورمشلردر . آرتق خلافت اسلامیه نك مخالف مشورت اولدیفته دائر هیچ بر کیمسه نك برسوز سوبلیکه حقی قالوری ؟

(۲) خلقدن مقصد مهاجریندر .

(۳) بواشاردن مقصد ینه مهاجریندر .

مطلقاً قبول ایتدکلی تقدیرده بزدن برامیر انلردن برامیر [۱] انتخاب و تعیین اولنسون « حباب بن المنذر حضرتلرینک صوگ افادهسنه حضرت فاروق جواب ویردیله .

### حضرت فاروقک جوابی

« هیات ایکی امیر قطعاً اجتماع ایده من . قوم عرب ایسه علیه الصلاة والسلام افدمن حضرتلرینک سزدن بولنامسی و عشرتکزه منسوب اولمامسی جهتله امارتکزی قبول ایلیمه من . »

بوندن صکره حضرت حباب ایله حضرت فاروق اراسنده شدتلی و موجب نزاع بعض سوزلر تعاطی اولندی . او صروده امین الامه لقب عالیسیله مفتخر اولان ابو عیمده رضی الله تعالی عنه حضرتلری « ای معشر انصار اک اول دین مبین احمدییه و فخر رسل افدمن حضرتلرینه نصرت ایدن سزاوادیکنز اک اول تغییر نصرتیه سز سبب اولمیکنر . » اخطارینی درمیان ایدنجه رؤسای انصاردن « بشیر بن سعد » رضی الله تعالی عنه حضرتلری قیام وشو صورتله افاده مرام ایلدی .

« ای معشر انصار مشرکین ایله جهادده ارباب فضیلت و دین مبین احمدییه اصحاب مسابقت بزم عشرتقمر اولدیغنده شبهه یوغیسهده دینده کی مسابقتقمردن امر جهادده صرف ایتدیکنز قدردن مقصدمن و ارزو و اراده من جلب رضای باریدن و پیغمبر افدمنزه اطاعتدن عبارتدر . مرادمن کندی نفسمن ایچون بر سعی و کوشش اولمامسیله نائل اولدیقمز بو خدمت و فضیلتی خلق اوزرنده استعلایه و طلب دنیایه وسیله اتخاذ ایتکه حقمن یوقدر . بیلورسکنز که رسالتپناه افدمن حضرتلری قریشدنذر . بئاء علیه امر خلافت و امامته انک قوم نجیبی

[۱] امر خلافت ایچون مهاجرین و انصار کرام اراسنده سقیفه بنی ساعدهده جریان ایدن « منا امیر و منکم » قول مشهوری « حباب بن المنذر حضرتلرینک ایشته بو خطبه بلیغه سنده کی شو افاده در » افاده واقعه اصحاب کرامجه رد اولدیغنه و بورک اجتماع امته اقتران ایتدیکنه منی اسلامده ایکی خلیفه نک وجودینه عدم جواز قاعده عظیمه سی ائس اعشدر .



تأثر لینه احق وار جحدر انلرله امر خلافت ایچون منازعه ایتمکدن جناب حق  
ی محافظه بیورسون. اللهدن خوف ایدیکز مهاجرین ایله منازعه ایتمکیز. »  
حضرت بشیرک شو قول حاسمی فرصت عد ایدن حضرت صدیق یمین  
یسارنده جالس اولان حضرت فاروقی و ابو عبیده ی حاضر ونه ارائه ایدرک  
ولردن برینه بیعت ایتملرینی بیان وافاده ایتمیسه ده حضرت عمر و عبیده متفقاً  
بو مدافعه ده بولندیلر .

### مشار الیهمانک بیاناتی

« سز افضل مهاجرین اولدیغکز و دین اسلامک افضل اموری بولسان  
مازده رسول اکرم صلی الله علیه و سلم افندمز حضر تلرینک خلیفه سی بولندیغکز  
خالده وجود عالیلرله قبول امامت و خلافت بزم ایچون امکانشز اولایغندن  
مره بیعت ایتمکلیکمز ضمننده الکزی اوزادیکز . »

حضرت ابو عبیده و حضرت فاروق طرفلرندن وقوعه کلن شو افاده  
مدافعه یی متعاقب هان حضرت صدیقه بیعت ایتمک ایچون ده طور اندیلرایسه ده  
شیررضی الله تعالی عنه حضرتلری انلردن اول طورانه رق و مشار الیهمایه مسابقت  
بددرک اک اول اجرای بیعتیه موفق اولمش و اندن صکره دیکر لری طرفلندن  
بیعت اولمشدر .

بشیر بن سعدک حضرت صدیقه بیعت خصوصنده وقوع بولان مسابقتندن  
نفعال ایدن مشار الیه حباب بن المنذر افاده آتیه ایله بشیره عتاب ایتدی .  
حباب — عمی زاده کز سعد بن عباده حضرت تلرینک امارته حسد ایتمکک  
ایچون حضرت صدیقه بیعت ایتدک .

بشیر بن سعد — الله بیلورکه او یله دکادر. مهاجرینک حق صریحی اولان  
مر خلافتده کندیلرله منازعه یی مکروه کوردیکم ایچون بیعت ایتدم .

معلوم ارباب سیردرکه انصار کرام قبل الاسلام یکدیگر یله مخالف و محارب  
ولان ( اوس ) و ( خزرج ) قبیله سندن مرکب اولوب خزر جیلرک سعد بن

عباده حضرت تیرینی امارت و خلافته نصب و تعیین ایتمک خصوصنده کی طلب و اصرارینی و بشیر بن سعدك ابو بكر صديقه بیعتی مشاهده ایدن « اوس » قبیله سی رؤسای « اسید بن خضیر رضی الله تعالی عنه حضرت لری دخی داخل اولدینی حالده « خلافت و امامت بر کره خزرچ عشیرته انتقال ایدرسه بزه قارشو دائماً ادعای فضیلت و رجحان ایده جک لرنده و ارتق بزه امر خلافت و امارتدن قطعاً حصه و یرمیه جک لرنده شبه اولدیغندن هان حضرت صديقه اجرای بیعت اولنسی لازم کله جکنی » یکدیگرینه سویلدیلر .

اوسلیم لرك وبا خصوص رؤساندن بولنان حضرت اسید بن خضیرك بو افاده بی تعقیماً وقوع بولان بیعتلری خزر جلیلرك سعد بن عباده حضرت تیرینی بیعت ایتمک خصوصنده کی قرارلرینی بتون بتون اخلاص ایتسیله طرف طرف حضرت صديقه بیعت اولندی . امر مهم بیعت هان اوراده و اول صورتله قرین ختام اولدی .

حضرت سعد بن عباده اوراده حضرت صديقه بیعت ایتیمه رك خانه سنه کتیدی حضرت سعدك بر مدت بیعتدن تأخیری جهتله اجرای بیعت ایتسی لزوم دایر کندوسنه وقوع بولان امر و اخطاره « علمیکزده اولقرمی تمامیه صرف و استعمال ایتدکجه و سیف و سنائی قانلریکزله بویامدکجه اهل و عشیرتمله بک اطاعت ایدنلرله برابر سزکله محاربه ایتدکجه بیعت ایدم » جوابی و یردی .

حضرت سعد بن عباده نك غایت موقت بر انفعال اثری بولنان شو افاده تهدید کارانه سنه مبنی بیعتله اجباری لزومی حضرت فاروق طرفندن درمیان اولندیسه ده بیعت ایتماک خصوصنده کی اصرارینه نظراً قتل اولمادکجه اطاعت ایتیمه جکی و عشیرتندن ، اقرباسندن بر چوق ذوات قتل ایدلمکسزین کندوسنك قتل ده ممکن اولمه ییغنی و یالکسز بر شخصك عدم بیعتی حضرت صديقك خلافتنه امامت ابراث تأثیر و خلل ایدمه ییجکی جهتله شم دیلک حالیه ترك اولنسی مناسب و مصلحته موافق اوله ییغنی ینه بشیر بن سعد حضرت لری افاده ایتسیله موجب بوقضیه ده بین الاصحاب منازعه چیقارلاماش و سعد بن عباده حضرت لری حالیه ترك

ولمشدرد. سقیفه بنی ساعده دنیلن موقعده حضرت صدیقه بیعت اولمزدن مقدم جریان ایدن مذاکراتده انصار کرامک جمله سی ویاخود بعضیلری مهاجرینه بیعت اولمق لازم کلسه بیله امام علی رضی الله تعالی عنه حضرتلرندن بشقه سینه بیعت ایتیه جککرینی افاده ایتمش اولدقلری بوبابده کی روایات موثوقه تاریخیه قلمه سندندر .

حضرت حیدر کرار ایله بنی هاشم وعشره مبشره دن زیر وطلحه رضی الله تعالی عنهما حضراتی ده جناب صدیقه بیعت ایتمک امرنده تأخر ایتدیلر . حتی بیر حضرتلری امام علی افندمن حضرتلرینه بیعت اولمقدقه قلمجی قینه سوقیه جغنی مقام تهدیده افاده ایتسنه مبنی النذن آلنوب باره باره اولنجیه در طاشلره اورلسنه حضرت فاروق اعظم طرفندن امر ویرلمشدر .

برروایته کوره سقیفه بنی ساعده ده وقوع بولان بیعتی متعاقب امام عمر ندمن بیعتدن تأخر ایدن ذوات مشارالیه حضراتی نزدینه کیدوب کندولرینی نناع و جلب ایتمش وجهه سی طرفندن هان بیعت اولمشدر .

دیگر برروایته کوره امام علی افندمن حضرتلری ابوبکر صدیق حضرتلرینه بیعت اولندیغنی استخبار ایتمکله برابر کیجهک البسه سیله هان قوشه رق بیعتیه سارعت بیورمشدر واوراده البسه لرینی کیمشدر .

اشبوذوات واشخاص معلومه ومعدودنک کیفیت وزمان بیعتلری ماده سنده لیدیکرینه بدرجه یه قدر مباین کوریلان بوروایتلر ایلروده ایضاح اولنه جق قیقات ایله بربرینه توفیق اولنه جقدر .

حضرت صدیقه ایدیلان بیعت خصوصنده ابوسفیان بن حرب رضی الله تعالی عنه حضرتلرینک کتب سیر و تاریخده محرر اولان سوزلری شایان کاردر .

حضرت صدیقه بیعت اولنور اولمز ابوسفیان حضرتلری شو صورتله ارده کلام ایتمشدر :

ابوسفیان : ای آل عبد مناف اورته لغی استیلا ایتمش برتوز بر غبار



کوره یورم که اوتوزی ، اوغباری انجیق قن ایله ییقامق محو ایتمک ممکن اولدینور .  
ابوبکری مقام خلافتنه نه ایچون اقامه ایتدیکیز . ذلیل وضعیف اولان علی  
وعباس نروده درلر . امرامت و خلافت قریش ایچنده اک ضعیف برشخصده  
نه سببه مبنی تقرر ایده یور . « امام علی به خطاباً » النی اوزات سکا بیعت ایده ییم .  
ارزو ایدرسه کز مدینه نی آتلو و پیاده ایله طولدیره ییم :

حضرت علی رضی الله تعالی عنه : الله بیلور که بوسوز که مراد ومقصودک ناز  
فتنه نی ایتاد ایتمکدر . اسلام ایچون خیر یرینه شر ایسته مکدر . سنک نصیحتکه  
احتیاجز یوقدر .

حضرت حیدر کرار ابی سفیان حضرت تترینک افادات واقعه سنی و تکلیفی  
بوصورتله رد وجرج بیورمشلدر . صورت و کیفیت جریانی ایضاح اولدینی  
وجهله ابوبکر صدیق حضرت تترینک اجماع امتله امامت و خلافتنه نصب وتعیین  
اولنمی خلافت وامامت اسلامیه نی تأسیس ایتمش و خلافت وامامتک عهداً  
« یعنی ولی عهد انتخاب ونصبیه » بر خلیفه دن دیگر خلیفه یه انتقالی ده ینه  
حضرت صدیقک امام عمر افندمز حضرت تترینه ولایت عهدی تفویض ایتلرندن  
وبوتفویض وتوجهله اصحاب کرام معالی اتسامک هیچ بری طرفندن برکونه  
اعتراض سرد و اتیان اولنماسندن ناشی خلیفه وامامتک ایستدیک ذاتی شرایط  
لازمه شرعیه نی حائز اولدینی حالدّه عهداً تخلیف ایتمی ده اولوجهله اجماع امته  
اقتران ایلشدر . حضرت صدیقک خلافتی ده حضرت فاروق اعظمی تخلیف  
ایتمی ده تأسس خلافت ماده سیچون اجماع امتک اس الاساسی اولدیغنه مبنی  
بوایکی جهت بشقه بشقه تدقیق واولملابده کی منقولات صحیحه وروایات موثوقه  
تعمیق اوله جقدر .

خلافت حضرت صدیقّه دائر بورایه قدر ویریلان معلومات مجمله روایات  
مؤثوقه تاریخیه دن عبارت اولوب حال بوکه بومسئله یوقوروده جان اولدینی وجهله  
خلافت اسلامیه نک اس الاساسی وامامتک منای مصنون الاندراسی اولمسئله کیفیت  
وصورت وقوعی فقهی و علمای اسلامیه طرفندن لزومی قدر تدقیق و تعمیق

اولمخس واحكام دينيه وعقائد اسلاميه صرہ سنہ داخل اولمخس بر مسئلہ عظيمہ ومهمہ اولديغندن فقہا وعلمائک تايجه تبعات وتدقيقات فوق العاده سی بولسان ايضاحاتی ده مفصلاً بيان و توضيح ايتک مقتضيدر .

خلافت حضرت صديقک صحت و حقيقتی اثبات ايدن

دلایل نقلیه و عقلیه

عموماً مسلمانلرجه معلومدرکه فرقان عظيم الشاندر صکره اک صحيح اولمق اوزره مجمع غايه اولان کتاب ائمہ حديثدن حضرت شيخ « بخاری » وحضرت « مسلم » طرفلرندن جمع و تصنيف اولمخس اولان « صحيحين بخاری و مسلم » کتابلريدر .

بو ايکی کتاب شريفک ايکيسنده دخی مسطور اولديغی وجهله خليفه ثانی حضرت فاروق اعظم خلافتلری زماننده فريضه حبی بالایفا مدينه منوره یه عودت لرنده حضرت صديقک خلافتنه وصورت وقوعنه دائر پک زیاده مشهور اولان خطبه سی ایراد ايتمشدر .

صديق اکبر حضرتلرينک امامت و خلافتلرينه متعلق ايضاحاتی متضمن فاروق اعظم طرفندن ایراد اولنان بوخطبه مشهوره نك احتوا ايتديکی فقراتدن « وقد کنت زورت مقالة » عباره سی کتب اعتقادیه مزده کلام نفسی یه دليل اتخاذا اولمخسیه و بناءً عليه متواتر اولان مذکور خطبه نك اهميت فوق العاده سی درکار بولمخسیه ترجمه سی ذیلاً درج اولنور :

حضرت فاروقک نطق مالی

عمر وفات ایدرسه فلان ذاته بیعت ایده جکی سزدن بری طرفندن افاده و بیان اولنديغنی خبر آلدیم . ابی بکر حضرتلرينه فيجأة بیعت اولنديغنه هيچ

برکیمسه آلدانسون. واقعامشارالیه حضرتلرینه بلاتدیر بقتة (۱) بیعت اولندی. فقط جناب حق ملحوظ اولان شردن، مضرندن او بیعت ایله هیئت اسلامیة مزى محافظه ووقایه ایلدی. بوکون آراکزده حضرت ابی بکر صدیق کبی عمومک کندوسنه سرفرو ایتکه مجبور اوله جفی برذات یوقدر. روح پر فتوح حضرت رسالتناهی عازم کلشنسرای علین اولدیغی زمان خلیفه مشارالیه حضرتلری ملئک اک خیری ذواتندن ایلدی. حضرت علی وزیر رضی الله تعالی عنهما برابرلرنده بولنان ذوات ایله کریمه مکرمه نبی ذیشان فاطمه علیه السلام رضی الله تعالی عنها حضرتلرینک سعادتخانه لرنده بزدن تحلف ایتدیلر. مهاجرین کرام ایسه حضرت صدیق یانه طوپلانیدیلر. اخوان اولان انصار کرامک جمعیتنه کتمک لزومنی صدیق اکبر افاده و تکلیف ایتدم. برابرجه یانلرینه کیتدک یولده صلحادن ایکی ذاته تصادف ایتدک. بوایکی ذات انصار کرام حضرتانک کندی آرالرنده ویردکلری قراری بزه آکلاتدیلر. و «ای معشر مهاجرین نرینه کیدیورسکنز» دیدیلر. انصار کرام قارداشلریمز یانه کیده جکمزى بوایکی ذاته خبر ویردک. بونلر «یوق اورایه کیتیمکیز، آنلره تقرب ایتیمکیز. ای معشر مهاجرین کندی ایشکزی کنديکیز تسویه ایدیکیز» جوابیله بزى کتمکدن منع ایتک ایتدیلر. بن مطلق کیتملی بزدن دیدیکمدن یوله دوام ایتدک. وقتا که سقیفه بنی ساعدهیه واردق. انصار کرام حضرتانک اوراده مجتمع اولدقلرینی کوردک. جمعیتک ایچمه اوزانمش اورتولمش برینی کوردیکمدن بونک کیم اولدیغنی صوردم. سعد بن عبادہ حضرتلری اولدیغنی سویلیدیلر. اوزانمشنک، اورتولمشنک سببی سؤال ایتدیکمه خسته اولدیغنی جوابنی ویردیلر. بوسؤال وجوابی و مجلسده قعودمزى متعاقب خطیلری قیام ایتدی. بوخطیب جناب حق لایق وجه ایله حمدونما ایتدکدن صکره شو وجهله افاده مرآمده بولندی. «اما بعد بزاللهک انصارى، اسلامک عسکری بز. ای معشر مهاجرین سز دخی بز ایلرو کلانلریمزدن بیوکلریمزدن سکنز. فقط سزدن



بر قوم بر جماعت بزه استعمال و ترفع و بزی دوچار خسران ایتمک ایسترسکزر.  
امر خلافتی کند و کز در عهد ایدرک بزی محروم براقق آرزو سنده سکزر  
استبداد ایدوب امامت ماده سنی کند و کزه حصر اید جکسکزر» دیدی.

خطیب لری نیک بونطقی قرین ختام اولنجه بکنیدیم بر مقاله یی تصور و تصمیم  
ایتمش بولند یغمندن حضرت صدیق و جودیه حضور یله برابر اوسوزلری بیان  
و ایراد ایچون در اتمق ایستدم. حالوکه مشار الیه حضرت لری بنندن زیاده حلیم  
و وقور اولدیغندن بدرجه یه قدر کندولرینه مدارا و رعایت ایدردم. افاده مرامه  
مباشرت ایتمک ایستدیمک زمان حضرت صدیق بنی منع ایتدی. صبر ایتمک لکمی  
امر ایلدی. کندوسنی کوجندیرمک ایسته مدیکمدن اختیار سکوت ایتمد.  
کندولری سوزه باشلا دیلر بنندن اعلم ایدیلر. حقیقه بنم تصور و تصمیم ایتمدیم  
سوزلردن. برینی ترک ایتیمه رک کافه سنی بیان و یاخود آندن اییسنی افضلنی  
بالداهه ایراد و اتیان ایتدی. آندن صکره « سز تفصیل و ایراد ایلدیکنز  
محاسن و فضایله و افعال خیریه حقیقه مالکسکزر و آنلره اهل سکزر فقط عربلر  
امر خلافتی قریش ایچون بیلورلر. بشقه لریچون طانیزلر. چونکه قریشلر  
نسباً و مملکته عربلرک و سبطده بولنیورلر. » بنم و ابو عبیده بن الجراح  
حضرت لری نیک اللری مزه یا پشهرق بو ایکی ذاندن برینی خلیفه و امام نصب ایتمک  
اوزره تعین و تقریر ایتمد. هانکی سنی آرزو ایدر سه کز اکا بیعت ایدیکز. «  
بموردیلر. حضرت صدیق افادات و ایضاحات واقعه سندن یالکز بوجهه  
اخیره کوجه کیتدی. زیرا عندمده بوینی اورمق حیاته اول صورتله خاتمه  
چکمک حضرت صدیق و جودیه برابر امامت و خلافته نصب و تعین اولمقدن  
احسن و اهون ایدی. حضرت صدیق افاداتی ختام بولمقدن و بکا و یاخود  
ابو عبیده حضرت لری نه بیعتی انصار کرامه تکلیف ایتدکن صکره انصاردن  
بر ذات (۱) ( بنم رأی و تدیرم مسئله یی حسم ایدر. ای معشر قریش  
بزدن برامیر سزدن برامیر نصب اولنسون ) دیدی. حبابک شو افاده سنی

متعاقب سوز چو غالدی . هر طرفدن بر سس ، بر صدا مرتفع اولدی . مذاکرات و مقالات او مرتبه کسب شدت ایتدی که ظهور اختلافدن جداً قورقدم . بناء علیه حضرت صدیقه خطاباً « یا ابا بکر النی ویر سکا بیعت ایدیم » دیدم مشارالیه حضرتلریده النی اوزاتدی بن بیعت ایتدم . اوراده کی مهاجرین دخی بیعت ایتدیلر . آندن صکره انصار کرام حضراتی ده بیعت ایدیلر . واللهی ایچنده بولندیغمز امور و خصوصاًتده حضرت صدیقه ایتدیگمز بیعت قدر موافق مصلحت برایش کورما مشزدر . بیعت ایتدیگمزین انصار کرامدن مفارقت ایتیش اولیدق بزدن صکره بر بیعت احداث ایتلری قویاً ملحوظ ایدی . او حالده رضا و موافقتمز اولقمسزین کندیلرینه بیعت مجبوریتنده و یا خود خلافلرینی التزام ایله فسادک ظهوری کبی بر فلاکت قارشو سنده بولمقندن خوف ایتدک . »

بیعت حضرت صدیقه دائر اولان حضرت فاروقک اشبو خطبه لری او قدر متواتر درکه بالجمله سیر و تواریخه درج اولمش اولدقدن بشقه « قدکنت زورت مقالة » فقره سی ده کتب اعتقادی ده کلام نفسی یه دلیل اتخاذا اولمسیله خطبه مجبوحه مسائل اعتقادییه داخل اولمش واک مهم مسائل دینییه واعتقادییه دن اولان کلام نفسی ماده سنده نظر دقت واعتباره آلمشدر .

رواة حدیثدن نسائی و ابویعلی و حاکم حضرت اتک اجله اصحابدن ابن مسعود رضی الله تعالی عنه حضرتلرندن تصحیح ایتدکلری روایت کوره مفخر کائنات افندمز حضرتلرینک وفات عالی نبوت پناهیلرنده انصار کرام « منا امیر ومنکم امیر » دیدیلر . عمر بن الخطاب حضرتلری یانلرینه کیده رک « ای معشر انصار بیلمز میسکیز که علیه الصلاة والسلام افندمز حضرتلری حال حیاتنده خلقه نماز قیلدیر مق و امامت ایتک ایچون حضرت صدیق مأمور بیوردیلر . سبب خلقت عالم افندمزک نماز ایچون کافه مسلمینه تقدیم بیوردقلری مشارالیه حضرتلرینه هانکیکیز تقدم ایتکی روا کوره جکسکیز . » دیدی فاروق اعظمک بو افاده سنه جواباً انصار کرام حضرت صدیقه تقدم ایتدکدن استعاذه ایتدیلر .

رواة حديثن ابن سعد وحاكم و يهقي حضراتنك ابني سعيد الحدری  
 رضی اللہ تعالیٰ عنہ حضرت تلرندن استخراج ایتدکری روایت دخی شودر :  
 « سعد بن عبادہ رضی اللہ تعالیٰ عنہ حضرت تلرینک خانہلرنده کی صفده (۱)  
 اجتماع ایدن انصار کرام حضراتنک خطیبلری حضرت صدیق و فاروق اعظم  
 دخی حاضر بولندقلری حالده قیام ایدوب نطقلر ایراد ایتدیلر . بو خطیبلردن  
 بری دیدی که « ای معشر مهاجرین علیہ افضل الصلاۃ افندمنر حضرتلری بر  
 مصلحتہ برماؤریتہ سزدن برنی تعیین بیوردقلری زمان بزدن ده برنی ترفیق  
 بیورمقدمه ایدیلر . بناءً علیہ امر خلافتہ بری بزدن دیکری سزدن اولمق اوزره  
 ایکی ذاتک تعیینی لازمدر . بوخطیبک شو افاده سندن صکره انصار کرامک  
 خطباسی بوفکر ومطالعہ بی ترویج ضمننده متعاقباً ایراد نطق ایدیلر . او ائفاده  
 زید بن ثابت (۲) رضی اللہ تعالیٰ عنہ حضرتلری قیام ایدهرک بو یولده اداره  
 کلام ایتدی .

« بیلورسککز که رسول اکرم صلی اللہ علیہ وسلم افندمنر حضرتلری  
 مهاجریندن ایدیلر . خلیفہلری ده مهاجریندن اوله جقدر . فخر رسالت  
 افندمنرک انصاری ایدک شمدی ده خلیفہ سنک انصاری اولمق لغمز مقتضیدر »  
 بو افاده بی متعاقب حضرت صدیقک الی طوتہرق « ایشته بو ذات خلیفہ کز ،  
 امام کزدر . » دیدی .

حضرت زیدک شو افاده و معاملہ سنی متعاقب حضرت فاروق در حال  
 و مهاجرین کرام انی تعقیماً بیعتہ مسارعت ایتدیلر . انصار دخی انلره بیرو  
 اولدیلر .

بیعتی متعاقب حضرت صدیق اکبر منبره چیقارق حاضر اولان احباب  
 کزین رضوان اللہ تعالیٰ علیہم اجمعین حضراتنه کوز کزدردی . زیر بن عوام  
 حضرتلرینی کورمدکلرندن مشارالہی ایستدیلر و کندولریله شو محاورده  
 بولدیلر :

[۱] سقیفہ خی ساعده در .

[۲] احله انصار کرامدندر .



حضرت صدیق . یازیر رسول اکرم صلی الله علیه وسلم افندمن  
حضرتلرینک تیزه زاده سی وحواری سی یم دیدیکزده شق عصای مسلمینی می  
اررزو ایستدیکز ؟

حضرت زبیر . ای خلیفه رسول الله لوم وسرزنش یوقدر .

زبیر حضرتلری بوجوابی متعاقب هان قیام ایدوب حضرت صدیقه بیعت  
دخی ایتدی .

بوندن صکره حضرت صدیق ینه اصحاب کرام حضراتنه عطف نظر دقت  
ایدوب امام علی رضی الله تعالی عنه حضرتلرینی کورمدکلرندن مشارالیه  
حضرتلرینی ده ایستدیلر . تشریفلرنده انکله محاوره آتیده بولندیلر .

حضرت صدیق . دیدیکزکه رسول اکرم صلی الله علیه وسلم افندمن  
حضرتلرینک عمی زاده سی یم . کریمه مکرمه لرینک زوجی یم ، نبی محترمک  
دامادی یم . شق عصای مسلمین ایتمک می ایستدیکز ؟

حضرت ابوتراب . یاخلیفه رسول الله لوم وسرزنش یوقدر .

جوابی ویرمکه برابر درحال بیعتہ مسارعت دخی بیوریلر .

رواة حدیثدن ابن اسحاق جناب زهریدن اوده انس رضی الله تعالی عنه  
حضرتلرندن وقوع بولان روایت دخی شووجهله در :

سقیفه بنی ساعده ده بیعت اولندیغنک ایکنجی کونی حضرت صدیق برخطبه  
اوقومق ایچون منبره صعود ایتدی . کندولری ایراد خطبه ایتزدن مقدم  
حضرت فاروق اعظم قیام ایدوب افادات آتیده بولندی :

حضرت فاروقک بیاناتی

جناب حقہ حدوثنایستدکن صکره « حق جل و علا حضرتلری امریکیزی (۱۱)

احسنکز اولان حضرت صدیقه تقویض بیوردیلر . حضرت صدیق جمه کزک احسیدر ، افضلیدر . رسول اکرم صلی الله علیه وسلم اقدمن حضرتلرینک غارده رفیق ، صاحبیدر . ثانی اثنین اولدقلری معلومدر . قالقمکز کندوسنه مبايعت ایدیکز »

فاروق اعظمک بیاناتی اوزرینه سقیفه بنی ساعدهده واقع اولان بیعتدن بشقه خالق طرفدن حضرت صدیقه تکرار بیعت عمومیه اجرا اولندی .  
اشبوبيعت عامه دن صکره حضرت صدیقک ایرادایتدکلری خطبه عیناشودر :  
جناب حقه حد و ثنادن صکره

اما بعد ایها الناس فأنی قدولیت علیکم ولست بخیرکم فأن احسنت فأعینونی وان اسأت فقومونی الصدق امانة والکذب خیانة والضعیف فیکم قوی عندی اریح علیه حقه انشاءالله والقوی فیکم ضعیف اخذالحق منه انشاءالله لایدع قوماجهده فی سبیل الله الا ضربهم الله بالذل ولا تشیع الفاحشة فی قوم قط الا اعمهم الله بالبلاء اطیعونی ما طعت الله ورسوله فاذا عصیت الله ورسوله فلا طاعة لی علیکم قوموا لی صلاتکم یرحمکم الله »

## بو خطبه نک مالی

« ایها الناس سزدن ایی اولمدیئم حالد امراداره کز عهدهمه تودیع اولندی . ایلیک ایدرسهم بکا معاونت ایدیکز کوتیلاک ایدرسهم بنی طوغرولدیکز . طوغریلاق امانت یلانجیلق خیانتدر . ضعیف اولاندلیکز انشاءالله تعالی حقنی استیفا ایدنجیه قدر نزدمة قویدرلر . قوی اولانلریکزی کندوسندن اخذ واستیقای حق ایدنجیه قدر نظرمدہ ضعیقدرلر . فی سبیل الله جهادی ترک ایدن هیچ برقوم یوقدرکه حق تعالی حضرتلری انلری تذلیل ایتسون ارالرنده فواحشک شایع اولدیغی هیچ برقوم یوقدرکه حق تعالی حضرتلری انلره بلایی تعمیم ایتسون . بن الله ورسوله عصیان ایدرسهم اطاعت اولنق استحقاقندن

محروم اوله جغمدن بکا اطاعت (۱) ایتمکیز . نمازه قالقکیز اللهک رحمتنه نائل اولکیز .

موسی بن عقبه نك « مغازی » نام کتابنده یازدینی و جناب حاکمکده عشره مبشره دن عبدالرحمن بن عوف رضی الله تعالی عنه حضرتلرندن تصحیح ایتدیکی روایتیه کوره ابوبکر صدیق حضرتلری شو خطبه یی ایراد بیورمشلردر :

عبدالرحمن حضرتلر نيك روایت ایتدکلری خطبه حضرت صدیقده بودر :

والله ما كنت حريصاً على الامارة يوماً ولا لئيلةً ولا كنت راغباً فيها ولا سألتها الله في سر ولا علانية ولكنني اشفت من الفتنة ومالي في الامارة من راحةٍ لقد قلت امراً عظيماً مالي به من طاقه ولا يد الابتقوية الله »

### بو خطبه نك مالی

« الله عليمدرکه بن نه برکون نه برکیجه امارته حریص اولدم . خلافته هیچ بر وقت رغبت ایتدم . نه سراً نه علناً هیچ بر زمان امامت و خلافته مظهریتی حق سبحانه و تعالی حضرتلرندن تمنی واستدعا ایلمدم . خلافت و امامتی قبول ایدیشیم فتنه ظهور ایتسی خوفندن منبئدر . اماره و خلافتده حضور و راحتم یوقدر . عهدمه بر امر عظیم تفویض اولمشدرکه جناب حق بنی تقویه ایتمز ایسه بوبار ثقیل خلافته تحمل و طاقتم غیر مساعدر . »

حضرت صدیقک بو خطبه نری امام علی وزیر بن عوام رضی الله تعالی عنهما حضرتلنک امر خلافت ماده سنده و سقیمة بنی ساعدهده وقوعه کلن مشورته بولنیدر لمذلرندن بحث ایله در میان ایتدکلری بر عتابه مقابلهدر .

حضرت صدیقک بو افاده اعتذار یه لرینه جواباً مشارالیهما امام علی وزیر بن عوام رضی الله تعالی عنهما بوجه آتی جواب ویردیلر :

(۱) امر اولوالامرہ اطاعتک لزوم و وجوبی اوامرک امر الهی و رسالتپناهی یه موافقتی شرطنه متوقفدر « لاطاعة فی معصية الله » قاعده کایه سیاسیه و دینییه مزدرندر .



حضرت علی وزیر. امر خلافت و بیعت ماده سنده مشورتدن تأخیر اولندیغمز ایچون منفعل اولدق. یوقسه بز حضرت صدیق خلافت و امامت ایچون خلقت احق اولق اوزره طانورز. شرفی، خیرینی بیلورز. صاحب غاردر. رسول اکرم صلی الله علیه و سلم افدنمز حضرتلری حال حیاتلرنده مسلمانلره نماز قلدیرمه کندوسنی مأمور بیوردیلر.

ابن سعدك ابراهيم التیمی جنابلردن استخراج ایتدیکی روایتدر :  
وفات جلیل حضرت نبویه امام عمر رضی الله تعالی عنه حضرتلری ابو عبیده بن الجراح حضرتلرینه کله رک « لسان معجز بیان حضرت رسالتپناهیدن شرف صدور ایتدیکی وجهله بو امثک امینی اولدیغندن بحثله کندوسنه بیعت ایده جکفی» افده ایتدی. حضرت ابو عبیده فاروق اعظمک تکلیف واقعنه بو جوابی ویردی :  
« دائرة ناجیه اسلامیه ده دخول ایتدیکنک کوندن بری سندن بویله برضعف رأی و تدبیر کور مامشیدم. ثانی اثنین اولان حضرت صدیق اکبر موجود ایکن بکا نصل بیعت ایده بیلورسک . »

امین الامه حضرت ابو عبیدهك شوانصافلرینه امت محمدیه حقندهکی بوشفتلرینه دقت اولنورسه علویتک حقیقی اصحاب کرامده نه درجه لرده متجلی اولدینی تبین ایدر .

ینه ابن سعدك استخراجنه کوره خلافت امامت واشبو بیعت ماده سنده حضرت صدیق ایله حضرت فاروق آراسنده شو محاوره جریان ایتشددر :

حضرت صدیق . عمره خطاباً . النی اوزات سکا بیعت ایده یم .

حضرت فاروق . سن بندن افضل سک .

حضرت صدیق . سن بندن اقواسک .

ارالرنده بو سوزلر مکرراً جریان ایتدیکندن نهایت حضرت فاروق « سنک کثرت فضلکله برابر بنمده قوتم سکا معاون اوله جقدر . دیمسیله حضرت صدیقه بیعت ایتشددر .

حضرت احمدك استخراجنه کوره صدیق اکبر رضی الله تعالی عنه حضرتلری

سقیفه بنی ساعده ده انصار کرامه قارشو ایراد خطبه ایتدیکی زمان انصارک شان علویاتی مین ازللق اوزره شرفنازل اولان آیات جلیله قرآنیهدن دینه نصرت و فضیلتلری متضمن و مبشر اوله رق لسان معجز بیان حضرت رسالتیناهیدن شرفصدور ایدن احادیث سنیه دن برینی ترك ایتکسزین کافه سنی برر برر ذکر و اتیان بیوردیلر. و بو افادانه زیرده کی ایکی حدیث جلیلی اخطار و بیان ایله سوزلرینه ختام ویردیلر .

افاده نك بزی :

« لقد علمتم ان رسول الله صلى الله عليه وسلم قال « لوسلك الناس وادياً وسلكت الانصار وادياً سلكت وادی الانصار . »

### بو افاده نك مالی

محقق بیلورسکزه رسول اکرم صلی الله علیه وسلم افندمن حضرتلری « بتون خلق بر درهیه، بر طریقّه و انصار دخی دیگر بر درهیه، دیگر بر طریقّه سالك اولسهلر بن انصارک سالك اولدقلری درهیه، طریقّه سالك اولوزم بیوردیلر .

ایکنجی افاده :

ولقد علمت یاسمد ان رسول الله صلى الله عليه وسلم قال و انت قاعد « قریش ولایة هذا الامر فیرالناس تبع لبرهم و فاجرهم تبع لفاجرهم »

### مالی

« ای سمد مجلس جلیل نبویه حاضر بولندیغک ایچون باخصوص سن محقق بیلورسک که فخر کائنات افندمن حضرتلری « قریش امر خلافتک

صاحبیدر لر . خلقك ایسی انلك ایسنه فاجری ده فاجرلرینه تابعدر لر »  
بیوردی . حضرت صدیق طرفندن ایراد اولنان صوك افاده ده کی حدیث جلیل  
نبوی سعد بن عبادہ حضرتلری طرفندن تصدیق اولمسیله « بزوزرا سز  
امزاسکز » دیدی .

بوزروایت اثبات ایدہ یورکه حضرت سعد بن عبادنك وفاتنه قدر حضرت  
صدیقه بیعت ایتمدیکنه دائر اولان « عبدالبرک » روایتی ضعیفدر .

حضرت احمدك استخراج ایتمدیکی روایتہ کوره حضرت صدیق اکبر کندوسنه  
تفویض اولنان امر خلافت و بیعتی قبول ایتملری معاذالله تعالی ارتدادی موجب  
اوله بیله جک بر فتنهك حدوث و ظهورندن خوف ایتمیکندن منبعث اولدیغی  
مقام اعتذارده بیان و تذکار بیورمشلردر . ابن اسحاقدن وسائرلرندن وقوع  
بولان روایتہ کوره بر ذات ایله حضرت صدیق اراسنده قبول خلافت ایتمدیکنه  
دائر بویه بر محاوره جریان ایتمشدر .

سئل اولان ذات . ایکی شخص اوزرنده بیله قبول امارت ایچون بی منع  
ایتمشیدك . نه کی بر محبوریته عمومك امر اراده سنی درعهده ایتمك ؟  
حضرت صدیق . ولایت و خلافتی قبول ایتمکدن بشقه بر چاره بوله مدم .  
چونکه نبی مکرم صلی الله علیه وسلم افندمزك امتی دوچار تفرقه اولمسندن قورقدم .

ینه حضرت احمدك استخراجنه کوره ابا بکر صدیق رض الله تعالی عنه  
حضرتلری مقام جلیل خلافته جلوسلرندن بر آی صکره « الصلاة جامعة » [۱]  
عبارده سینه و منادیلر واسطه سیله خلقی مسجد شریفه جلب و دعوت بیوردیلر  
و خلقه قارشو شو خطبه بی اوقودیلر :

ایها الناس و ددت ان هذا کفانیه غیری ولئن اخذتمونی بسنة نیکم ما طیقها  
ان کان لمعصوماً من الشيطان وان کان ينزل علیه الوحي من السماء :

[۱] صدر اسلامده خلفا و امرای اسلام خلقی طویلامق ایچون « الصلاة جامعة »  
دیه ندا ایتمدیرلردی . حضرت صدیقك بو معامله سی ذکر اولنان اصولك مبدئیدر .



## خطبه نك مالى

« ای ناس امر خلافتك عهدمه تفویض اولئامسنی و بر بشقه ذات طرفندن اداره اولئمسنی ارزو ایدردم . پیغمبر ذیشانمزر رسول اکرم صلی الله علیه وسلم افندمز حضرت تارینك سنت سنیه رسالتناهیله کی بدن معامله بکلورسه کز انك یابدیغی کی بدن ایش انتظارنده بولورسه کز بن بوکا طاقتیاب و متحمل اولهم ، فخر کائنات افندمزك کرک شر شیطاندن معصوم اولمزدن و کرک کوکدن کندولرینه وحی الهی نازل اولمزدن ناشی بالطبع بن انك کی اولهم . »  
ابن سعدك روایتنه کوره حضرت صدیقك اشبو خطبه لری بوجه آتیدر :

« اما بعد فانی قد ولت هذا الامر وانا له كاره والله لوددت ان بعضكم كفانيه الا وانكم ان كلفتموني ان اعمل فيكم بمثل عمل رسول الله صلى الله عليه وسلم لم اقم به كان رسول الله صلى الله عليه وسلم عبداً كرمه الله بالوحى وعصمه به الا وانا انا بشر ولست بخير من احدكم فراعوني فأذا رأيتموني استقمتم فأتبعوني واذا رأيتموني زغت فقوموني واعلموا ان الى شيطاناً يغريني فأذا رأيتموني غضبت فاجتنبوني »

## مالی

« بن امر خلافت و امامته تعیین اولندم ایسه ده بو وظیفه مهمه نك عهدمه تفویضندن ممنون و خوشنود دکل ایدم . واللهی سزدن بری طرفندن درعهدم اولنورسه قورتلقلغمی ارزو ایدرم . بیلکزرکه علیه الصلاة السلام حضرت تارینك اجراءت و اعمالی کی بکا اجرای معاملات و اعمال تکلیفنده بولنورسه کز اول صورتله ایفای وظائفه مقتدر اولهم . چونکه رسول اکرم صلی الله علیه وسلم

افدمز حضرتلری جناب ذوالجلالک وحی سبحانیسیله تکریم اولمیش ومعصوم بولمیش اولان بر عبد ایدی . بیلکیز که بن بشرم و سزک هیج بریکزدن ای دکم . بناءً علیه بکا رعایت ایدیکز . طریق مستقیمده حرکت و معامله ایتدیکمی کوررسه کز بکا تابع اولکیز او طریق مستقیمدن تمایل و انحراف ایتدیکمی مشاهده ایدرسه کز بنی طریق مستقیمه اعاده و ارجاع ایلکیز . ینه بیلکیز که بنم ده بر شیطانم واردر . غضبناک اولدیغمی کوردیککیز حالده بندن اجتناب ایتلیسکیز . »

حضرت صدیقک بو خطبه لرینی ینه ابن سعد ایله حضرت خطیب بروجه زیر روایت ایتشلردر :

« اما بعد فانی قدولیت امرکم ولست بخیرکم ولکنه نزل القرآن و سن النبی صلی الله علیه وسلم السنن فعلما فاعلموا ایها الناس ان الکیس الکیس التقی واعجز العجز الفجور وان اقوا کم عندی الضعیف حتی آخذله بحقه وان اضعفکم عندی القوی حتی آخذ منه الحق ایها الناس اکم تبع ولست بمبتدع فاذا احسنت فأعینونی واذ انازت فقومونی »

## مالی

« اما بعد ارزو ایتدیکم و خوشنود اولمادیئم حالده امر خلافت عهدمه تفویض اولندی . فقط فرقان عظیم الشان نازل اولدی و فخرکائنات علیه اکمل التحیات افدمز حضرتلری سنن سنیه نبوتناهی لرینی تقریر واکل بیوردی . بونلری بزده بیلدک اوکرندک . ای ناس بیلکیز که اک زیاده عقل و ذکا تقوادر . اک زیاده عجز و افتقار فخش و فجوردر . حقنی استیفا و ایفا ایدنجیه قدراک قوی اولان شخصکیز غندمه اک زیاده ضعیفدر . ای ناس بن متبوعم مبتدع دکم . ایلک ایدرسم بکا معاونت و اتباع ، طریق استقامتدن عدول و انحراف ایلرسم بنی طریق مستقیمه ارجاع ایدیکز »

یوقاروده بیان و توضیح اولنان روایتلر حضرت صدیقک انعقاد خلافت و امامتی خصوصنده اجماع امتک حاصل اولدیغنی و اصحاب کزین رضی الله تعالی علیهم اجمعین طرفدن مشارالیهک خلافتنده اتفاق اولدیغنی اثباته مدار اولور . شو حالده انصار کرام طرفدن اولجه بیعت اولمنسه قرار ویریلان سعدبن عبادہ رضی الله تعالی عنه حضرت تترینک بیعت حضرت صدیقدن تحلف، ایتدکلی حقنده اولان روایت تاریخیه ضعیف قالور .

حضرت صدیقک بیعتنده حصول اجماع امتی تأیید و تصریح ایدن روایتدن بریده جناب حاکمک « ابن مسعود » رضی الله تعالی عنه حضرت تلرندن استخراج و تصحیح ایتدیکی روایتدر .

### حضرت ابن مسعودک روایتی عیناً بودر

« ما رأه المسلمون حسناً عند الله حسن و ما رأه المسلمون سيئاً فهو عند الله سيئ »  
وقد رأى الصحابة جميعاً ان يستخلف ابوبكر

### مألی

مسلمانلرک ای کوردکلی شی جناب حق نزدنده دخی ایدر . مؤمینک کوتی کوردکلی حال نزد جلیل سبحانیده دخی کوتیدر . محقق اصحاب کرامک جمله سی حضرت صدیقک استخلافی تنسیب ایتدیلر .

ابن مسعود رضی الله تعالی عنه حضرت تلی اصحاب کرامک اکابرندن فقها سندن اک ایلری کلانلرندن بر ذات عالی صفاتدر جمیع اصحابک خلافت حضرت صدیقی تنسیب ایتدکلی خبر اولان بو روایت صحیحهلری حضرت ابوبکر صدیقک خلافت و امامتنه اجماع امت حاصل اولدیغنه دلیل قطعیدر .

زمانزدن اصحاب کرامک زمانسه قدر عطف اولنسه حق بر نظر رجعی

شو روایات موثوقه و صحیحیه کوره اثبات ایدرکه بالجمله اهل سنت و جماعت « عصرأ بعد عصر » حضرت صدیقک خلافتیه احق اولدیغنه و علی التحقیق خلیفه بولندیغنه اجماع ایتشلردر .

بواجماع یالکمز اهل سنت و جماعتهده منحصر دکلدردر . جمیع معتزله و اکثر، فرق سائرۀ اسلامییه دخی اهل سنت و جماعتک شو اجماعنه مشترک بولنشلردر . عصرأ بعد عصر وقوعی محقق اولان بواجماع و اتفاق امت حضرت صدیقک خلافتیه احق والیق و خلیفۀ بالحق اولدیغنه دلیل اعظمدر . بونکله برابر اهلیت و احقیت واقعہ لری نفس الامرده دخی اظهر اولمسیله حد ذاتنده دلایله ده غیر محتاجدر . عصر صحابهده حضرت صدیقک مقام مقدس خلافتیه نصب و تعیین اولندیغنی خبرینک بعض مواقعیه بالغ و واصل اوله مدینی و او کبی خبر خلافتی واصل و بالغ اولیان محلمرده کی خلمک کندوسنه بیعت ایتاملری و اظهار مخالفت ایللری محتمل بولندیغنی حقنده وقوع بولان بعض اعتراضاته قطعاً محل و امکان تصویری قابل اوله ماز . امر بیعت و خلافتی بدایتندن نهایتیه قدر مشاهده ایتمش اولان بعض اصحاب کرام طرفندن اجماع امتک حصولئه دائر اخبارات و روایات صحیحیه و مؤکده لری میدانده اولمسه « نفدر ضعیف اولورسه اولسون » بلکه شو اعتراضه اوفه جق بر میدان آچیلوردی . حال بوکله وقعییه بدایتندن نهایتیه قدر مشاهدۀ بیان و تشریح ایدن اصحاب کرام حصول اجماع امتی ده تبیین و تصریح ایتشلردر .

از جمله « ابن مسعود » رضی الله تعالی عنه حضرتلری کبی اجلۀ اصحاب کرامدن بر ذات عالی قدرک حصول اجماع امتیه دائر تحقق ایدن یوقاروکی روایت و اخبارلری میدانده بولندیغندن بو احتمالات موهومیه ذره قدر میدان قالمیه جفی بدیهیدر .

اعظم علمای دین علیهم رضوان الله تعالی اجمعین حضراتک خلافت و امامت حضرت صدیقۀ دائر اولان تبعات و تحقیقات عمیقہ و فوق العاده لری اجماع امتی غایت صریح و توضیح بر صورتله ساحۀ ثبوتیه چیقارملری سببمز ، حکمتسنزده دکلدردر .



بو مادهیه علمای اسلام طرفدن بو درجهده وقوع بولان اقدام و اهتمام جهت افراطی التزام ایدن بعض فرق اسلامیه نك امام علی کرم الله وجهه حضرت تترینك حضرت صدیقن افضل اولدیغنه و حق خلافت کندولرینه عائد و راجع اولوب حضرت صدیق طرفدن عادتاً غضب « معاذه تعالی » اولندیغنه دائر اولان افکار و ملاحظات غیر صائبه لری علمای امتك اشبو تدقیقات فوق العاده سنه واسع میدانلر آچمش و مسئله نك بو درجه لره قدر تعمیق و تحقیقنه ایشه بو اسباب دینیہ (١) و مذهبیہ موجب اولمشدر .

« دار قطنی و ابن عساکر و ذهبی و سائر لری منالو محدثیندن بر جماعتك استخراج و تصحیح ایتدک لری روایت کوره حیدر کرار کرم الله وجهه حضرت تترینك خلافت لری زماننده مشهور و معروف اولان وقعه ( جمل ) ی انتاج ایدن مسئله ایچون بصره یی تشریف لری ائزاده حضور نده بولنان جماعت مسلمیندن ایکی شخص قیام ایدرك خلافتنه دائر حضرت ابو تر ایدن بر سؤال ایراد ایتدیلر . بونلرك سؤالیه امام علی افندمن طرفدن ویریلان جواب حضرت صدیقك صحت جلافتنه دلیل اعظم اولدیغندن عیناً ایراد اولنور .

### ایکی شخصك سؤالی

« اخبرنا عن سيرك هذا الذي سرت فيه لتستولى على الأمراء و على الأئمة تضرب بعضهم ببعض اعهد من رسول الله صلى الله عليه وسلم عهد اليك فحدثنا فانت الموثوق به و المأمون على ما سمعت . »

### مفادی

امرای امته و امته مستولی اولوق اوزره بورای تشریفكز و امتك بر (١) دین و مذهب وسیله سیله میدانه چیقان خلاف و نزاع سیاست و حکومت اولدیغنده شبهه یوقدر .

قسمی دیگر بر قسمی علیهنده استعمال ایدوب محاربه ایتکز و ایتدیرمکز فخر کائنات علیه افضل الصلاة افندمز حضرتلری طرفندن سکا وقوع بولان بر عهدہ مستمدیدر ؟ بونی افاده و اخبار ایت . زیرا سن رسالتناه افندمز حضرتلرندن اجتماع ایتدیکک سوزی بیان و اخبارده حائر امنیت و وثوقسک .

### امام علی افندمز حضرتلرینک بوسؤاله ویردیکاری جواب

« اما ان يكون عندی عهد من النبی صلی الله علیه وسلم عهد الی فی ذلك فلا والله لئن كنت اول من صدقه فلا اکون اول من کذب علیه ولوکان عندی منه عهد فی ذلك ما ترکت احا (١) بنی تیم بن مره و عمر بن الخطاب یثوبان علی مزه ولقاتلتهما بیدی ولولم اجد الابردتی هذه ولكن رسول الله صلی الله علیه وسلم لم یقتل قتلاً ولم یمت فجأة مکث فی مرضه ایاماً ولیالی یأتیه المؤذن « او بلال » یؤذنه بالصلاة فیأمر ابا بکر فیصلی بالناس وهو یری مکانی ثم یأتیه المؤذن فیؤذنه بالصلاة فیأمر ابا بکر فیصلی بالناس وهو یری مکانی ولقد ارادت امرأة (٢) من نسائه تصرفه عن ابی بکر فابی وغضب وقال انتن صواحب یوسف مروا ابا بکر فلیصل بالناس فلما قبض رسول الله صلی الله علیه وسلم نظرنا فی امورنا فاخترنا لدنیانا ماریضه رسول الله صلی الله علیه وسلم لدیننا وکانت الصلاة عظم الاسلام وقوام الدین فبايعنا ابا بکر رضی الله عنه وکان لذلك اهلا لم یختلف علیه منا اثنان »

دیگر بر روایتده ابوتراب حضرتلری اشبو جواب عالی حیدر یلرینک صوکه فقره سنه افادات و بیانات آتیہی دخی علاوه بیور مشلردر :

« فاقام بین اظهرنا الکلمة واحدة والامر واحد لا یختلف منا اثنان »

(١) حضرت صدیقدر .

(٢) حضرت عائشة صدیقهدر .

دیگر بر روایت کوره حضرت شاه ولایتک بوجواب عالی علویت وحقانیت  
پروریلرینک فقرات اخیرہ سی بروجه آتی نقل اولنمشدر .

« فاخترنا لدنیانا من اختاره صلی الله علیه و سلم لدیننا فادیت الی ابا بکر حقہ  
وعرفت له طاعته واغزت معه فی جنوده وکنت آخذ اذا اعطانی واغزوا اذا اغزانی  
واضرب بین یدیه الحدود بسوطی فلما قبض ولاها عمر فاخذها بسنة صاحبه  
وما یعرف من امره فبايعنا عمر لم یختلف علیه منا اثنان فادیت له حقہ و عرفت  
طاعته وغزوت معه فی جیوشه وکنت اخذاذا اعطانی واغروا اذا اغزانی واضرب  
بین یدیه الحدود بسوطی فلما قبض تدکرت فی نفسی قرابتی وسابقتی وفضلی  
وانا اظن ان لا یعدل بی ولكن خشی ان لا یعمل الخلیفه بعده شیئا الا لحقه فی قبره  
فاخرج منه نفسه وولده ولو کانت محابة لا اثر ولده بها ویری بها لرحط الی احدھم  
وظننت ان لا یعدلوا بی فاخذ عبدالرحمن بن عوف موثیق علی ان نسع ونطیع  
لمن ولاء الله امرنا ثم بايع عثمان فنظرت فاذا طاعنی قد سبقت بیعتی واذأ میثاقی  
قد اخذ لغیری فبايعنا عثمان فادیت له حقہ و عرفت له طاعته وغزوت معه فی جیوشه  
و کنت اخذاذا اعطانی واغزوا اذا اغزانی واضرب بین یدیه الحدود بسوطی  
فلما اصیب نظرت فاذا الخلیفتان اللذان اخذاها بعهد رسول الله صلی الله علیه و سلم  
الیھما بالصلاة قدمضیا وهذا الذی قد اخذله میثاقی قد اصیب فبايعنی اهل الحرمین  
واهل هذین المصرین « یعنی الکوفة والبصرة » فوثب فیها من لیس مثلی ولا قرابته  
کقرابتی ولا علمه کعلمی ولا سابقته کسابقتی وکنت احق بهامنه « یعنی معاویه »

### حضرت شاه ولایتک شو خطبہ جواہر لری مالی

رسول اکرم صلی الله علیه و سلم افندمن حضرتلری طرفدن بکا احسان  
اولنمش بر عهد یوقدر . بر عهد جلیل نبوی بی حائر دکم . فیخرکائنات افندمن  
حضرتلرینک رسالت و نبوت جلیلہ لرینی الک اول بن تصدیق ایش اولدین

حالده خلافت و امامت حقنده بکا عهدی اولدیغه دائر نام عالی نبوتپناهیلرینه اک اول اختیار کذب ایدهم . اکر صاحب شریعت خاتمه شرفنامه رسالت افدمن حضرتلری طرفدن خلافت و امامت ایچون بکا بز عهد عالی احسان اولمش اولسیدی نه حضرت صدیق و نه ده عمر بن الخطاب مزجلیل نبوی به آتملرینه اورایه چیقمالرینه و خلافت و امامتی استیلا ایتلرینه قطعاً میدان ویرمن ایدم . بکا معاونت ایدم جک فرد واحد بولنه مدینی و شو اوزرمدهکی « نمازلقدن » بشقه یدمه بر شی بولمدينی حالده بیله اللرمه مشار الیها ايله محاربه و مقاتله ایدرک بکا اولان عهد جلیل حضرت نبوی بی انفاذ و اجرایه چالیشوردم .

فقط رسول اکرم صلی الله علیه وسلم افدمن حضرتلری قتل اولمديلر ، فجأة وفات ایتديلر ، بر چوق کونلر کیجهلر خسته اولدقلری حالده اسنیر فراش قالدیلر . او خسته لیکلری او مرضلری زماننده مؤذن یاخود « بلال » حضور عالی نبوتپناهیی به کلوب نماز قلديرمق ایچون استیذانده بولنیوردی . مؤذنک استیذانه جواباً مفخر رسالت ایفای وظیفه امامت ایچون حضرت صدیقه امر ویره یوردی . حضرت صدیق بو امر جلیل رسالتپناهیی به امتیالا ایفای وظیفه امامت ایدر و خلقه نماز قلديریوردی . حضر صدیقه تودیع امامت بیوردقلری زمان بن غائب دکل ایدم . اوراده حاضر اولدیغمی خاتم النبیین افدمن حضرتلری ده کوریورلردی . صکره ینه مؤذن کلور و ذات جلیل نبوتپناهیلرندن استیذانده بولنوردی علیه اکمل الصلاة افدمن حضرتلری ینه صدیق شو وظیفه مهمه دینهی ایفا ایتلری لزومنی تکرار امر و فرمان بیورمده ایدیلر . بو اوامر مکرره اثناسنده بن ینه حاضر ایدم . بو استیذانلر مکرراً ویریلن بو امرلر زماننده بن حاضر اولدیغمی ده علیه الصلاة والسلام افدمن حضرتلری کورمکده ایدیلر . حتی ازواج طاهرات نبویه دن بری ( ۱ ) شو وظیفه وکالت و امامتک حضرت صدیقدن تحویل و انصرافی ایسته مشیکن

( ۱ ) حضرت عایشه در .



فخیر رسل افندمن حضرتلری بوتکلیفی رد ایله برابر غضبناک اوله رق  
 مشار الیهامیه منفعل اولدی « انتن صواحب یوسف » خطاب عتاب آمیزیله انفعال  
 عالی نبوتپناهیلرینی اعلان و بیان وینه « ابا بکر خلقه نماز قلدرسون »  
 دیه اولسایده کی اراده قاطعه رسالتپناهیلرینی تأکیداً امر و فرمان بیوردیلر .  
 روح پر فتوح نبوتپناهیلری عازم کلشنه رای علین اولدقدن صکره امور اداره مزى  
 تودیع ایدیه جک ذاتی انتخاب ایتک اوزره مسئله یی تدقیق ایتدک فخر کائنات افندمن  
 حضرتلری طرفدن دینمز ایچون اختیار اولنان حضرت صدیقی امور دنیویه من  
 ایچون انتخاب و اختیار ایتدک . چونکه نماز دینک قوامی و ارکان اسلامیه نك  
 اعظمیدر . بناء علیه حضرت صدیقه بیعت ایتدک فی الحقیقه مشار الیه حضرتلری  
 خلافته اهل ایدی . بزدن ایکی آدم بیله مشار الیه حضرتلرینک خلافت و بیعتیه  
 مخالفت ایدن اولمای . ارامزده ایقای وظائف خلافت ایتدیکی مدتجه اسلامیتک  
 گلهسی واحد امری متفرد ایدی . امت ایچنده تشنت و اختلاف یوغیدی . بن  
 حضرت صدیقک خلافتنی بیلم و طاعتنی ایفا ایتدم . خلافتنده جنود  
 منصوره سیله جهاده کتدم . بکا ویردیکی احسانی آلوردم . جهاده سوق  
 و اعزام ایتدیکی تقدیرده امرینه اتباعاً غزایه عزیمت ایدردم . کندی المله  
 دکنکمله امرینه توفیقاً حضورنده تجلیدی لازم کلنلره حدود شرعیه یی ضرباً  
 اجراده بولنوردم .

حضرت صدیق ! وفاتنده امر خلافتی حضرت عمره تفویض ایتدی . حضرت  
 عمر دخی خلافتنده رفیقناک . صاحبناک ۱۱ طریقده . سنتیه توفیق معاهده و حرکت  
 ایلدی . حضرت فاروقه دخی بیعت ایتدک . ارامزده انک خلافتنده مخالفت  
 ایدن ایکی آدم بولنمدی . بن آنک ده حق خلافتنی ادا و طاعتنی ایفا  
 ایتدم . زماننده جنود منصوره سیله جهاده کتدم . بکا ویردیکی آلورده جهاده  
 سوق و اعزام ایتدیکی تقدیرده غزایه عزیمت ایدردم . کندی المله دکنکمله

امریںہ توفیقاً تجلیدی لازم کلنلرہ حضورندہ حدود شرعیہ بی ضرب و اجرا ایدردم .

حضرت فاروقؓ وفاتندہ علیہ ا کمل الصلاة افندمن حضرتلرینہ اولان قرابتی ، اسلامیتدہ کی سابقہ می ، فضیلت می دوشوندنم . حضرت فاروقؓ خلافتی بندن بشقہ کیمسہ یہ عہد و تفویض ایمیہ جگنی ظن ایتدم . مشارالیه حضرتلری عہداً تعین ایدہ جکی خلیفہنک کافہ اعمال و حرکاتندن متولد مسؤلیتک کندوسنہ عائد اولہ جغندن و تحلیف ایدہ جکی ذاتک بالجلہ معاملاتک قبرندہ کندوسنہ الیحاق ایدہ جگندن خوف و خشیتہ دوچار اولہرق بعدالوفات کندی نفسی ، ذاتی خلافت و امامتہ متعلق امور و احوال دن محافظہ و وقایہ ایتک فکریہ تبعاً بکا خلافتی عہد و تفویض ایتدی . بو فکر و ملاحظہ یہ مبنی کندی اوغانی بیلہ تحلیف ایلدی . اگر حضرت فاروقؓ کندوسندن صکرہ خلیفہ اولہ جق ذاتی محبت و التزام طریقہ انتخاب و تعین ایتمش اولسیدی کندی اوغانی نصب ایتمی لازم کلیردی . حال بو کہ کندی نفسی ، ذاتی کندوسندن صکرہ کی خلیفہ اعمالندن مسؤل ایتدیرمامک ایچون نہ بکا نہ دہ اوغانہ تفویض ولایت عہد ایتہرک ارالزندہ برنی انتخاب ایتک اوزرہ رؤسای قومدن بر قاچ ذاتہ تودیع امر خلافت و مشورت ایتدی . او ذاتلردن بری دہ بن ایدم . ذوات مشارالیمک دخی خلافتی بندن بشقہ سنہ توجیہ ایمیہ جکلری ظنندہ بولدم . عبدالرحمن بن عوف رضی اللہ تعالیٰ عنہ حضرتلری جناب حق طرفندن امر خلافت کیمہ نصیب ایدلمش ایسہ ا کا اطاعت اولنمی حقندہ وعد و میثاقزی استحصال ونہایت حضرت عثمانہ بیعت ایتمککہ وظیفہ سنی ا کمال ایتدی . اوزمان مصلحتہ و جریان حالہ نظر ایتدم . کوردم کہ حضرت عثمانہ اطاعتم بیعتمی سبقت ایتمش و بنم میثاقم بشقہ سیچون استحصال قلنمشدر . بنا برین حضرت عثمانہ بیعت ایتدک . بن حضرت عثمانک دخی حق خلافتی ادا و اطاعتنی ایفا ایتدم . رفاقتندہ جنود منصورہ سیلہ برابر جہادہ کتدم بکا ویردیکنی آلور و جہادہ سوق و اعزام ایتدیکی زمان غزایہ عزیمت ایدردم .

کنندی المله دکنکمله امرینه توفیقاً تجلیدی لازم کلنلر حقنده حضورنده حدود تهرعه بی ضرباً اجر ایلردم . وقتا که حضرت ذی النورین مصاب اولدیلر ایشی تدقیق ایتدم . باقدم که رسول اکرم صلی الله علیه و سلم افندمز حضرتلرینک عهد جلیل نبویلرله مقام خلافته جالس اولان اولکی ایکی خایفه ۱۱۱ ارتحال ایتمشلردر . کندوسینچون میثاقم اخذ و استحصال اولنان حضرت عثمان دخی مصاب اولمشدر ، اهل حره بین ایله کوفه و بصره اهالیسی ده بکابعت ایتدیلر . اندن صکره بری میدانه آتلدی . استحضال خلافت ایچسون هجوم ایتدی که بو ذات بنم کبی دکلدرد : نه قرابتی ، نه علمی نهده اسلامده سابقه سی بنم قرابت علم ، سابقهم درجه سنده بولنه میور . بناءً علیه خلافت و امامته بن اندن احق ایدم . (۲)

ینه « دارقطنی وابن عساکر وذهبی وسائرلرینک واسحاق بن راهویه » نک طرق سائرء رواتدن استخراج ایتدکلرینه کوره بصره ده امام علی رضی الله تعالی عنه حضرتلرینه « بورایی تشریفکیز بر عهد جلیل نبوی یه می یوقسه کنندی رأیکزه می مستنددر : « دیه وقوع بولان برسواله جواباً عهد عالی حضرت رسالتناهی ایله کلیوب کنندی رأی عالیلرله حرکت بیوردقلرینی ایراد ایتمشلردر .

رواة حدیثدن « امام ذهبی » حضرتلری اشبو روایتک بیان اولنان طرق مختلفه سی یکدیگرینی تقویه ایدن طریقلر اولدیغنی سویله مشدر .  
ائمه حدیثک منازی اولان امام احمد حضرتلرینک استخراج ایتدیکی روایته کوره « وقعه جمده » حضرت کرار رضی الله تعالی عنه طرفندن شوصورتله ایراد نطق اولمشدر .

(۱) « بوابی خلیفه دن مقصد حضرت صدیق وفاروق اولوب مشار الیهما حضرتانک خلافتلرینی عهد جلیل حضرت نبوی اولمق اوزره بیان و تصریح بیورملری حضرت صدیقک تازقلدیرمی حقنده کی امر و فرمان عالی نبوی به اشارتدر . حضرت فاروقک خلافتی ده عهد حضرت صدیقه مستند اولدیغندن بوده اولکی اصلاک فرعیدر »

(۲) بو ذات معاویه حضرتلریدر .

## نطق عالی حیدری

« لم یعهد لنا رسول الله صلى الله عليه وسلم عهداً فأخذ به في الامارة ولكن شيئاً رأيناه من قبل انفسنا »

### مألی

« خلافت و امارت مسئله منده فخر کائنات افندمن حضرت ترینگ مدار حرکت اوله جتی بزه بر عهد عالی نبویلی یوقدر . کندی رأینزه حرکت ای دیوروز »  
امام احمد حضرت ترینگ استخراج ایتدکلری بونطق سائی جناب حیدری « هروی و دارقطنی » طرفلرندن دخی مع زیاده استخراج اولمشدر .

امام ذهبی طرفندن روایت اولدینی وطرق عدیده ایله امام علی کرم الله وجهه حضرت ترینه ایصال روایت قلندینی وجهله خلیفه مشارالیه حضرت لری فخر رسل افندمن حضرت لردن خلافته دائر حدیث شریف آتی بی ده نقیل و روایت بیورمشدر :

« عن علی رضی الله تعالی عنه قال - قیل یارسول الله من تؤمر فقال تؤمروا ابابکر تجدوه امیناً زاهداً فی الدنیا راغباً الی الآخرة وان تؤمروا عمر تجدوه قویاً امیناً لا ینحرف لومة لائم و ان تؤمروا علیاً و لا اراکم فاعلین تجدوه هادیا مهدياً یاخذ بکم الطریق المستقیم [ ۱ ] . »

امام علی افندمن حضرت لردن روایت اولان بوحديث شریفک مال عالیمی « امارته کیمی تعیین ایتلری لزومی علیه الصلاة و السلام افندمن حضرت لردن صورلدی . جواب عالی رسالت پناهیلری شو صورتله ظهور ایتدی . « ابابکر صدیق امارته تعیین ایدرسه کز کندوسنی امین دنیایه قارشو زاهد و آخرته راغب بولورسکز . عمری خلافته تنسیب ایدرسه کز قوی و امین اولقله برابر لوم

[ ۱ ] امام عمر افندمنده حضرت کرار حقه عینله اراده جلیله نبویه موافق بر صورتده بیان مطالعه ایتیش اولدیلری موضعه بیان اولنه قدر .



لائىدن خائف اولماديغنى اكلا رسكز كوررسكز . على بى امامنه نصب و تعيين ايلديككز حالده « بونى ياپه جىكزى مامول ايتيورم » هادى ومهيدى اولدق سزى طريق مستقيمه سوق ايده جكنى كوررسكز »

رواة حديثن جناب « بزار » دخى راويلرى رجالى موثوق اولق اوزره بو حديث شريفى روايت ايتشدر . جناب بىقى دخى اول صورتله روايت ايتشدر .

راويسى بالذات كندولرى اولديغى حالده بو حديث شريف امام على رضى الله تعالى عنه حضرتلرينك خلافته نصب و تعييننه دائر نص جليل نبوى اولمديغنه دليل قطعيدر .

حديثندن جناب بزار وامام احمد و امام ذهبي وانلركى بر جماعت امام على افدمز حضرتلرندن روايت ايتكلرى افاده آتیه دخى حضرت ابوترابك خلافته وباخصوص خلفای ثلاثه متقدمه يه حق رجحان و تقدمه دائر بر نص نبوى و ياعهد جليل رسالتپناهى اولمديغنى ينه صورت قطعيده مثبت اولمسيلاه عيناً درج ايديلور :

حضرت كراړك وفاى ائنده مقام على خلافت ايچون برى تخلص ايتمى لزومى كندولرينه عرض و افاده اولدقده شو جوابى ويرمشلردر « يوق ، بن سرك ايچون تعيين خليفه ايتم عليه الصلاة والسلام افدمز حضرتلرى خليفه نصب و تعيين ايتكميز بن سزى نصل ترك ايتديلرسه بن دخى اثر جليل نبوى يه اقتفاءً تعيين خليفه ايتم و اول صورتله سزى ترك ايدرم »

راويلرى رجالى صحيح اولق اوزره جناب « بزار » طرفندن استخراج اولنان بو جواب على حيدرى عبارۀ آتیه ايله ده وارد اولمشدر :

« ما استخلف رسول الله صلى الله عليه وسلم فاستخلف عليكم »

مال عاليسى

فخر رسالت افدمز حضرتلرى خليفه نصب و تعيين بيورمديلركه بن سرك

ایچون خلیفه و امام نصب و تعیین ایدیم . « امام علی افدمز حضرتلرندن  
ائمه حدیثک استخراج ایتدکلی بالاده تحریر اولنان روایت دار قطنی طرفدن  
دخی استخراج اولمش و طرق روایتک بعضیسنده علاوه آتیه بولمشدر :  
دار قطنیک استخراج ایتدیکی روایتیه نظراً عبارة علیه حضرت کرار  
بوله در :

« دخلنا علی رسول الله صلی الله علیه و سلم فقلنا یا رسول الله استخلف علينا  
قل لا ان یعلم الله فیکم خیراً یول علیکم خیرکم فعمل الله فینا خیراً فولی علينا ابابکر »

## مال منیفی

« علیه اکمل التحیات افدمز حضرتلرینک حضور عالی نبوت پناهیلرینه داخل  
اولدق بزم ایچون بر خلیفه نصب و تعیین ایتملرینی عرض و افاده ایتدک  
بیوردیلرکه بن سزک ایچون خلیفه نصب و تعیین ایتتم . جناب حق سزده خیر  
اولدیغنی بیلورسه خیرلی اولان بریکیزی سزه خایفه ایده جکدر « فی الحقیقه  
جناب حق بزه خیر اولدیغنی بیلدیکی ایچون حضرت صدیقی بزم ایچون خلیفه  
نصب و تعیین ایتدی » .

بوروایتله ثابتدرکه فخر کائنات علیه اکمل الصلاة افدمز حضرتلری  
طرفندن تصریح و تعیین اسم ایه صورت صریحه و قطعیده خلیفه نصب و تعیین  
اولتماش و بالخاصه ذات عالی حیدریلرینه خلافت و امامت عهد و تفویض  
بیورلماشدر .

امام بیهقی امام زعفرانیدن اوده امام شافعی رضی الله تعالی عنه حضرتلرندن  
بوروایتی نقل ایتملردر .

## امام شافعی حضرت تلرینک بیانلری

« اجمع الناس على خلافة ابا بكر وذلك انه اضطرب الناس بعد رسول الله صلى الله تعالى عليه وسلم فلم يجدوا تحت اديم السماء خيراً من ابى بكر فولوه رقابهم »

### مالی

ارتحال جلیل نبویدن صکره خلق دوچار اضطراب اولدیلر . بوقبه دنیا فام سما تحتنده حضرت ابا بکر صدیقن ایسنی بوله مدقلرندن مشار الیه حضرت تلرینک خلافتنه اجماع ورقبه تابعیتلرینی ید اقتدارینه تسلیم و ایداع ایستدیلر .

اسدالسنه ! معاویه بن قره دن بونی روایت ایده یور .

« رسول اکرم صلی الله علیه وسلم افندمن حضرت تلرینک اصحاب کرام معالی اتسبامی حضرت صدیقک خلافتنده شک و اشتباهلری یوغیدی و آنی خلیفه رسول الله دن بشقه بر تعبیر ابله تسمیه ایتملردی . اصحاب کرام باجمعهم خطایه و یاخود ضالته مؤدی - معاذ الله تعالی - بر نقطه ده اجتماع ائمه جککری ده محقق قطعیه دندر . بوندن بشقه ذاتاً امت اسلامیه اوچ ذاتدن برینک صحت و حقیقت خلافتنه اجتماع ایتملردی . ذوات ثلاثه مشار الیه هم حضراتی ابا بکر صدیق امام علی ، عم رسول اکرم عباس بن عبدالمطلب رضی الله تعالی عنهم حضرت انیدرلر . حضرت صدیقک جالس مقام خلافت اولمسبله دیگر ایکی ذات عالی ده کندوسنه بیعت ایستدیلر و خلافت ایچون حضرت صدیق ابله منازعه چیقارمیدیلر . ایشته بو عدم منازعه و مخالفت حضرت صدیقک خلافتنجه کی اجماع امتی اتمام واکال ایتدیکنده شبهه بر اقامشدر . زیرا حضرت صدیقک

خلافت و امامتی حق و صوابه مبتنی اولسه مشار الیهما علی و عباس رضی اللہ تعالیٰ عنہما حضراتی طرفیدن صدیق اکبره قارشو منازعه چیقارلمسی محاربه ایدلمسی لزومی درکار ایدی . »

« امام علی افندمز حضرت تلمری حضرت معاویہ ایله منازعه و محاربه ایتدیکی کبی حضرت صدیق ایله ده منازعه و محاربه ایتدی لازم کلودی بوجه ایله برابر معاویہ نك شوکت و قدرتی و تبعه سنك کثرت و وفرتی و قبیلہ سنك وقع و حیثیتی ایسه حضرت صدیقدن زیاده ایدی . حضرت حیدر کراره قارشو معاویہ نك دعوی خلافت ایتدی حقسنر اولدیغی جهتله امام مرتضی انك نه شوکت و قدرتنه ونده تبعه و عسکرینك و فرت و کثرتنه مبالات ایتمه رك و قبیلہ سنه و وقع و حیثیتنه اهمیت و یرمه رك احقاق حق مقصدیله محاربه و منازعه یه ابتدار و حق سیف ایله مدافعه و محافظه یه اجتسار ایتدی ایکن حضرت صدیقه قارشو منازعه چیقارملمری و محاربه ایتاملری مجرد و مطلق خلافتنك صحتنه و حقیقته اولان اعتقاد و اجتہادندن منبعثدر . بشقه برسیبه جملی غیر قابلدر . ذاتاً حیدر کرار بو حقیقت و صحتی بوجه محرر بالکیز فعلاً اعیانک اف ایتمه کله قالیوب قولاً دخی مکرراً علی ملاء الناس تصدیق و بیان بیورمشلدر »

« علی الخصوص عم رسول اکرم عباس بن عبدالمطلب حضرت تلمری برادر زاده عالیملری بولسان امام علی افندمز حضرت تلمرینه بیعت ایده جکنی افاده و بیان و قبول بیعتی تکلیف و اتیان ایتدیکی حالدہ حضرت حیدر عم مکرملمرینك تکلیفی قبول ایتدکلمری ده محققدر . بعض طوائفک اعتقاد ایتدکلمری وجهله حضرت علینك امامت و خلافتنه دائر بر ائص جلیل رسالتناهی و یاخود بر عهد عالی نبوی موجود اولسیدی عم مکرملمرینك تکلیف ایتدیکی بیعتی تأخر و تردد ایتمکسزین قبول ایتلمری مقتضی ایدی . حضرت کرارک شجاعت خارقه و بسالت فوق العاده مسلمهلریله برابر عشره مبشره دن زیر بن عوام رضی اللہ تعالیٰ عنه حضرت تلمریله بتون بنی هاشم و بعض اصحاب کرام دخی امامت و خلافتی ارزو ایدنلردن و شو مقصدینه خدمت ایتمک اوزره حاضر و مهیا بولنلنلردن



ایدیلر . بونلردن بشقه سقیفه نبی ساعدهده حضرت صدیقه بیعت اولدینی زمان جریان ایدن مباحثات شدیددن و اولبایده کی گفتکودن مستبان اولدینی وجهله انصار کرام دخی بدایه حضرت صدیقه بیعت ایتمکی ارزو ایتیمورلردی وحتی امامت و خلافت مهاجرینه تخصیص قنورسه امام علی افندمرزه بیعت اولتمی بختی ده مذاکرات واقعه جمله سندن ایدی . شو حالده حضرت کرار حقه بناء دعوی خلافتله منازعه ایتمش اولسیدی انصار کرامی ده معاون بوله جغنده شبهه یوغیدی . بشقه بردلیله انصار کرام حضراتنک قوتی امام علی افندمرک قوت و شوکته نسبتله دهها قلیل ایکن حضرت صدیقن وحتی بالجمله مهاجرین کرامدن خوف و خشیت ایتیمه رک ادعای خلافت ایتدیلر و نهایت « منا امیر ومنکم امیر » دعواسنده اصرار ایلدیلر »

«انصار کرام دعوادن خوف و خشیت ایتمدکری حالده حضرت علینک توضیح اولنان اسباب قویه ایله برابر خوف و خشیت ایتمی غیر متصور اولدیغندن امام علی افندمرک حضرت صدیقه قارشو منازعه چیقارمیوب محاربه ایتیموبده بیعت ایلمی حقه اتباعدن منبعث اولدیغنده ذره قدر اشتباه ایدیله مر . »

امام علی ، زبیر بن عوام ، عباس بن عبدالمطلب ، طلحه رضی الله تعالی عنهم حضراتنک بعض امور و خصوصدن طولایی حضرت صدیقه بیعت ایتمکده برمدت تأخر ایتملری دخی خلافت و امامته حاصل اولان اجماع امتی اخلاله قطعاً سبب اوله میه جقدر .

ذوات مشار الیه هم حضراتنک بیعتدن تأخرلری اسبابسندن بری ارباب عقد و حلدن حضوری ممکن اولان ذواتنک حضوریه حضرت صدیقن خلافت و بیعتی قضیه سی اتمام و اکمال اولمنسندن ناشی کندی بیعتلرینه احتیاج قالماسیدر . یعنی انعقاد امامت و خلافتنک کندی بیعتلرینه مفتقر و منحصر اولماسیدر .

سبب دیگر دخی تأخر واقعدن طولایی حضرت صدیقه قارشو بسط و تمهید ایتمدکری اعتذارلردن دخی مستبان اولدینی وجهله کندولری ده ارباب

حل و عقددن اولدقلری حالدہ خلافت حضرت صدیقک انعقادندہ مشورت [۱]  
ایچون دعوت اولندقلرندن و مذاکرہ اداخل ایدلدکلرندن بیعتدہ تأخر  
ایتملیدر . یوقسہ حضرت صدیقک خلافتہ عدم اہلیتدن و یاخود خلافتی  
قبول ایتملرندن ایلری کلامشدر . ذوات مشارالہم حضراتک تأخیر بیعتلرینہ  
مدار اولان بوعدرک نہقدر محق و مقبول اولدینی حضرت فاروق اعظمک  
یوقارودہ عیناً درج اولنان خطبہ مشہورہ سندنہ دخی بیان و تصریح اولدینی  
وجہلہ حضرت صدیقہ ایدیلاں بیعتک الجای ضرورت و مصلحتلہ فجأۃً و بقتہ  
وقوع بولمش اولسیلہ دخی ثابتدر .

اشبو ذوات معدودہ عالیہ نک بیعت حضرت صدیقدن برمدت تأخرلری  
برطرفدن مقبول اولدیغندہ شبہہ ایدلیان بویلہ بر معذرتہ مستند اولدینی  
بدیہیدر . دیگر جہتدن کندولرینہ مشورت و مذاکرہ مبحوثہ جلب و دعوت  
اولناملری سقیفہ بن ساعدہدہ جریان ایدن مذاکرات و مباحثاتک کسب ایتدیکی  
شدتہ نظراً ایشہ درحال نتیجہ ویرلمکسزین و بیعت اولتمکسزین طاعلمنک  
مستلزم اولہ جفی تصور و ملاحظہ اولنان سوء و خامتدر . شو حالہ نقلاً و عقلاً  
ہر ایک جہتک اجتہادندہ کی اصابت ظاہر و نمایاندر دار قطنینک طرق کثیرہدن  
وقوع بولان استخراجنہ کورہ امام علی وزیر بن عوام حضراتک حضرت  
صدیقہ اخیراً بیعت ایتدکلری صرہدہ تأخر واقعدن طولانی بیان ایتدکلری  
معذرت عیناً بودر .

«الا انا اخزننا عن المشورة وانا لنرى ان ابابكر احق الناس بها انه لصاحب  
الغار وثاني اثنين وانا لنعرفله شرفه وكبره»

## مالی

اوت بیعتدہ تأخرمز مشورتہ اداخل اولندیغمزدن منبعثدر یوقسہ بز  
[۱] بوکا دائر اولان مباحثات یوقارودہ مفصلاً بیان اولمشدر .

بیلورز که حضرت صدیق امر خلافت ایچون اچقالباسدر ، صاحب غاردر ،  
ثانی‌انیندر « یعنی حضرت رسول اکرمک غارده ایکنجسیدر » محقق بز  
حضرت صدیقک شرفنی بیوکللیکنی بیلورز »

بیعتده بر مدت تأخر ایدن ذوات عالیهنک اخیراً بیعت ایتدکلی اثناده  
وقوع بولان بواعتدارلرینه مقابل حضرت صدیق دخی قبول خلافت و بیعت  
خصوصنده بیان معذرت ایتش اولدیغندن او معذرت عالییه دخی بوراده  
عیناً درج وتزیر اولنور .

### حضرت صدیقک معذرتی

واللهی ما کنت حریصاً علی الإمارة يوماً قط ولالیلة ولا کنت فیها راغباً  
ولاستأله الله عز وجل سرّاً وعلائیة ولكنی اشفقت من الفتنة ومالی فی الإمارة  
من راحة ولقد قلت امرأ عظیماً الی اخره »

بو معذرتک ترجمهسی نومرولی صحیفهده محرردر . ذوات مشارالیه  
حضراتی صدیق اکبرک بواعتدارنی قرین قبول کوردیلر و بیعت ایتدیلر .  
ینه دار قطنینک حضرت عائشه رضی الله تعالی عنهان استخراج ایتدیکی  
روایتده امام علی افندمن حضرتنری صدیق اکبری کندی سعادتخانلرینه  
دعوت و بودعوته او خلیفه عالیجناب حضرتلریده موافقت واجابت ایدوب  
ابو تراب حضرتلرینک سعادتخانلرینه عزیمت بیوردیلر . اوراده بنوهاشم  
حضراتیده مجتمع ایدیلر . او جمعیتده شاه ولایت حضرتلری بر خطبه او قودیلر  
وبو خطبه ایله صدیق اکبری مدح و ثنا ایتدیلر . مدح و ثنادن صکره  
بیعتده کی تحلف و تأخری حقوقی جمله سندن بولنان مسئله مشورته ادخال  
اولمادیغندن ایلری کلدیکنه دائر بیان معذرت ایلدیلر . حضرت علینک خطبهسی  
عقبنده « جناب خلیفه دخی مقابله بر خطبه ایراد بیوردیلر . بو خطبهده

یوقاروده بسط و بیان اولنان اعتداری در میان ایندیئر طرفیندن بو خطبه لرك بو معذرتلرك تعاطی اولندیغی کونده حضرت کراز طرفدن جناب خلیفه بیعت اولمشدر . حضرت ابوترابك صديق اکبره بیعت ایتملرنده بك زیاده اصابت ایتمکلی اوزمان مسلمانلر طرفدن بالخاصه ذکر و بیان ایدلمشدر . صحیح بخاری شریفده صحیحی متفق علیه اولان بر صورتده شو مادهیه دائر دارقطنینك بالاده کی روایتندن زیاده تفصیلات و ایضاحات مندرج اولمسلیه عیناً نقل اولنور .

« روی البخاری . عن عائشة ان فاطمة ارسلت الى ابا بكر تسأله عن ميراثها من النبي صلى الله عليه وسلم مما افاء الله على رسوله من المدينة وفدك وما بقي من خمس خبير فقال ابو بكر ان رسول الله صلى الله عليه وسلم قال لا نورث ما تركنا صدقةً انما يأكل آل محمد من هذا المال واني والله لا اغير شيئاً من خدمة رسول الله صلى الله عليه وسلم عن حالها التي كانت عليها في عهد رسول الله صلى الله عليه وسلم ولا عملن فيها بعمل رسول الله صلى الله عليه وسلم فابى ابو بكر ان يدفع الى فاطمة منها شيئاً فوجدت فاطمة على ابا بكر في ذلك فهجرتة فلم تكلمه حتى توفيت وعاشت بعد النبي صلى الله عليه وسلم ستة اشهر فلما توفيت دفنها زوجها على ليلاً ولم يؤذن بها ابو بكر وصلى عليها وكان لعلى من الناس وجه حياة فاطمة فلما توفيت استنكر على وجوه الناس فالتمس مصالحة ابي بكر ومبايعته ولم يكن بايع تلك الاشهر فارسل الى ابي بكر ان ائتما ولا يأتينا معك احد كراهية ليحضر عمر فقال (١) لا والله ما تدخل عليهم وحدك فقال ابو بكر وما عسيتم ان يفعلوا بي والله لا آتينهم فدخل عليهم ابو بكر فتشهد على فقال انا قد عرفنا فضلك وما اعطاك الله ولم تنفس عليك خيراً ساقه الله اليك ولكنك استبددت علينا بالامر وكما نرى لقراتبنا من رسول الله صلى الله عليه وسلم ان لنا نصيباً حتى فاضت عينا ابي بكر فلما تكلم ابو بكر قال والذي نفسي بيده لقرابة رسول الله صلى الله عليه وسلم احب الى من اصل قرابتي واما الذي شجر بيني وبينكم من هذه الاموال



فأتى لم آل فيه عن الخير ولم اترك امراً رايت رسول الله صلى الله عليه وسلم يصنعه فيها الا صنعة فقال على ابى بكر موعدك العشيعة فلما صلى ابو بكر الظهر رقى المنبر فتشهد وذكر شان على وتخلفه عن البيعت وعذره بالذى اعتذر اليهم ثم استغفر وتشهد على معظم حق ابى بكر وحدث انه لم يحمله على الذى صنع نفاسه على ابى بكر ولا انكاره للذى فضله الله به ولكننا كنا نرى لنا فى هذا الامر « اى المشورة كما تدل عليه بقية الروايات » نصيباً فاستبد عليه فوجدنا فى انفسنا فسر بذلك المسلمون وقالوا اصبت وكان المسلمون الى على قريباً حين راجع الامر المعروف .

## مألى

ام المؤمنين حضرت عائشة رضى الله تعالى عنها ديمشدركه « فاطمة البتول رضى الله تعالى عنها حضرت تلى فخر كائنات عليه اكل التحيات افندمن حضرت تلى نه احسان جليل ربانى اولان و كندوسنه ارثاً انتقال ايدن مدينه ده كى حصه سنى و فدكى وخيرك خمسنى حضرت صديقدن ايستدير . « بزم متروكاتر ارثه تابع اوله من . صدقه در آل محمد ايسه بو اموال دن حصه آلا جقدر . « مألنده اولان حديث نبوى موجبجه متروكات جليله رسالتپناهى تلى ارثاً انتقال ايدمه جكنه و صدقه رسول اكرمدن هيچ بر شيتى حال اصليسندن تغيير ايتيه جكنه و عهد على رسالتپناهى ده ذات اكل الصفات حضرت نبوتپناهى تلى طرفندن اموال و متروكات مبحوثه نه صورتله صرف و استعمال اولمش ايسه كندوسى دخى اول صورتله صرف و استعمال ايدمه جكنه دائر حضرت صديقك ويردكلى جواب و متروكات مبحوثه نى حضرت فاطمه تلى تسليمندن وقوعه كتيردكلى امتناع مشار اليها حضرت تلى نيك انفعالى موجب اولدى و بناءً عليه وفاتلى نه قدر حضرت صديقه تردد ايتدى و كندوسيله تكلم ايلدى عليه الصلاة والسلام افندمنك ارتحال جليل رسالتپناهى نندن التى اى صكره حضرت بتول دخى وفات ايتدير . وفاتلى نه حضرت صديقدن استيدان اولقمسزىن زوج مكرملرى ابو تراب على بن ابى طالب رضى اه تعالى عنه حضرت تلى طرفندن ليلاً دفن اولندى . و نمازى نه كندوسى ادا ايتدى . حضرت بتولك وفاتندن صكره امام على افندمن

حضرتلری صدیق اکبر ایله مصالحه یی و کندوسنه بیعتی آرزو ایلدی . چونکه او زمانه قدر بیعت ایتمامشدی . حضرت صدیق سعادتحائنه حیدریلرینه دعوت و یالکزجه . کیتیمی آرزوسنی ده اخبار و بیان ایتدی . حضرت صدیق یالکز دعوت ایتمکدن مقصد عالیلری ده حضرت فاروقک خلیفه یه رفاقت ایتمامسی ایدی . امام عمر افندمن یالکزجه سعادتحائنه مرتضی یه عزیمت ایتمامسی لزومنی حضرت صدیقه اخطار ایتمش ایسه ده حضرت صدیق کندوسنه « نه یاپه جقلری ظن اولنه بیلور . » جوابنی ویره رک همان سعادتحائنه حیدر کراره عزیمت و ملاقات ایتدیلر . امام علی افندمن حضرتلری « بز سنک فضلنی و جناب حقک سکا وقوع بولان احسانی بیلورز . اللهک سزه سوق ایتدیکی خیردن طولانی سنکله منافسه ایتمیز شو قدرکه امر مشورتده بزه قارشواستداد ایتدک . حال بوکه رسول اکرم صلی الله علیه وسلم افندمه اولان قرابتزدن ناشی مشورتده حقمن نصیبمن اولدیغنی بیلوردک » دیدی . مشارالیهک بو سوزلری حضرت خلیفه یی کوزلرندن یاش چیقاجق درجه ده متأثر ایتمسیله وجه آتی اوزره جواب ویردی .

« نسم ید قدرته مودوع اولان جناب حقه قسم ایدرم که رسول اکرم صلی الله علیه وسلم افندمن حضرتلرینک اقرباسنه ایلیک ایتمکی کندی افرابه ایلیک ایتمکه ترجیح ایدرم . اقارب عالیئه نبویه یی کندی اقربامدن زیاده سورم . ارامزده متروکات جلیله نبویه اولان امواله دائر عارض اولان احواله کنججه فخر کائنات علیه افضل الصلوة افندمن حضرتلرینک او اموالده اجرا بیوردقلری هیچ بر خیر و عمل ترک ایتمکمزین اثر جلیل نبوتنهایرینه توفیقاً استعمال ایده بورم . کندوسی نه یولده نه صورتله صرف ایتدیلرسه او یولده اول صورتله صرف ایتمکده ییم . »

حضرت صدیقک بو جوابنه مبنی امام علی افندمن حضرتلری کندولرینه بیعت ایده جکنی وعد ایتدیلر . حضرت صدیق او کون نماز ظهیری ادا ایتدکدن صکره منبره چیقدی . امام علی افندمن حضرتلرینک شان عالیلرینی

تقدير و تجليلدن صكره بيعتن تحلف و تاخري اسبابي و كندوسنك مشر ايله  
 حضرت تيرينه قارشو بيان ايتديكي معذرتي افاده و اتيان ايله منبردن ايندي .  
 متعاقباً حضرت حيدر كرار دخي قيام ايدمرك حضرت صديقي تعظيم و تكريم  
 ايتدكن صكره بيعتن تاخري حضرت صديق ايله منافسه دن و ياخود من طرف الله  
 نائل اولديغي فضلي انكار كي احوال دن منبعث اولينوب امر مشور زنده حق و حصه لري  
 اولديغي حالده كندولري مشورته ادخال اولميه رق استبداد اولنديغدن متأثر و منفعل  
 اولديغني ذكر و ايراد ايلدي . حضرت شاه ولايتك بو حالي مسلمانلرجه  
 مستلزم محظوظيت و ممنونيت اوله رق اجراي بيعت خصوصنده كي معامله  
 واقعه سنده اصابت ايتدكلىني افاده و بيان ايتدير .

امام على افندمرك حضرت صديقه بيعتي و خلافتك صحت و حقيقتي متضمن  
 اولان بو حديث بخاري شريفك محتويات جليله صحیحه سندن اولديغي جهته  
 حد ذاته شايان اهميتدر . حضرت ابو ترابك تاخر بيعت خصوصنده بيان  
 ايتدكلى اعتذارده شان على صديقي نه قدر تعظيم و تجليل ايتكمده بولنديغي  
 بالخاصه جالب نظر دقتدر .

بو حديث بو روايت حضرت صديقك خلافتي غير صحيح اولديغنه و خاتمه  
 شرفنامه نبوت افندمزدن صكره خليفه حق امام على اولوب معاذ الله تعالى حق  
 صريحلري حضرت صديق طرفندن غصب اولنديغنه دائر بيان مطالعه ايدنلرك  
 دعوا لريني ابطاله بيوك و مهم بر حجتدر .

بخاري شريفك روايت ايتدكلى بو حديث امام على كرم الله وجهه  
 حضرت تيرينك بيعت حضرت صديقدن بر مدت تاخر ايتديكني موضح  
 و مصرحدر . حال بوكه يوقاروده ابى سعيد الخدرى جنابلرينك روايتنده  
 حضرت صديقك بدايت خلافتده امام على و حضرت زبير طرفلرندن همان  
 بيعت اولنديغي محرر اولمسيه بو ايكي روايت يكدى كرينه ميان كوريلور . تاخر  
 بيعت حقنده كي روايت ابن حبان و سائر محدثين كرام طرفندن دخي تأييد

اولئش ايسهده صحيح مسلمده بيهقي جنابلرندن روايت اولنديغي اوزره بوتاخره متعلق اولان روايت ضعيفدر .

حاصلي محدثين كرام حضرتائيك بوروايته تعلق ايدن اقوالندم نقللرندم في الحقيقه بر درجهيه قدر مبايت كورنيورسهده مبايت واقعهيي بروج زير دفع و تاويل ايتملردر .

حضرت علي و زبير وقعه سقيفيه تي متعاقب حضرت صديقه بيعت ايتديلر ايسهده فاطمة البتول رضاه تعالى عنها ايله حضرت صديق آراسنده متروكات جليله نبويه دائر تكون ايدن اختلاف رايدن متولد احوال اوزرينه امام علي افندمز حضرتلري مشار اليهانك وفاتلرينه قدر حضرت خليفهك يانسه كئمامشار وتردد بيورمامشاردر . ابوتراب حضرتلرينك صديق اكبر افندمزدن وقوع بولان انقطاعلري حقيقت حاله واقف اولميا نلرك افكاريني بيعته خلافتنه عدم رضا و موافقت كي بر قضيهيه سوق ايتمش و بيعت حضرت علينك تاخيريني بيان و روايت ايدنلرك افادهلرينه شو ملاحظه سبب اولمشدر .

فاطمة البتول رضاه تعالى عنها نك وفاتسندن صكره برمنوال محور امام علي افندمز حضرتلرينك مسجد جليل نبويده صديقك منبر اوزرندمكي خطبه سني متعاقب بيعت ايتملري حقيقتده ابتدائي بريعت اوليوب تجديد بيعتدن و اولابده حاصل اولوب مستلزم قيل و قال اولان شهبانك ازاله سي فكرندن منبعندر . حقيقتك شو صورته بياني روايتلرك بربرينه مخالفتلرينه مبايتلرينه ارتق محل و ميدان بر اقامشدر .

حضرت علينك جناب خليفهيه قطع ترددي و بيعته كي تاخري ائساده ابوبكر صديق حضرتلري كندوسنه تصادف ايتمش و ارهلرنده شو محاوره جريان ايتشيدى .

حضرت صديق . بنم خلافت (١) و امارتمى قبول ايتيورميسك ؛

(١) بو حديثده كي خطاب و عتاب انقطاع ترددره معطوفدر . يوقسه اساساً و بدياة بيعت ايتدنك لرينه دليل اولممن . جواب عالي مرتضوى ده شهبه سز بو ملاحظه مزى مؤيددر .



حضرت ابو تراب . خير تأخرم قرأني جمع ايتدكجه نماز ايجون مسجده  
كتمكدن بشقه بر محله كيتهامكه قرار ويرديكمدن منبعندر !

دقت اولونسون كه عذر نه قدر واضددر . شهبائي نه قدر دافعددر .

روايات و اخبارات صحيحه واقعه و متواترمدن صورت واضحدهده تحقيق  
ايدويوركه حضرت صديقك خلافتي صحتنه و حقيتنه و كندوسنه بيعت اولنديغنه  
و بوكا مخالف اولانلرك زعمنه رغماً مقام جليل خلافته اهل و لايق ايدوكنه  
اجماع امت مكملأ حاصل اولمشدر .

حضرت صديقك خلافته دائر كتاباللهدن و سنت سنئه نبويه دن هيچ بر  
نص و اثر عالي اولسه بيله حاصل اولان شو اجماع امت شرعاً و ديناً خليفه  
بالحق اولديغنه دليل كافيدر .

اشاغيده خلافت صديقه دائر نصوص قرأنيه و احاديث جليله نبويه دخي  
ايراد و اتيان اولنه جق ايسدهده تواتراً ثابت اولان شو اجماع امت اشارات  
و دلالتدن عبارت اولان نصوص قرأنيه و احاديث سنئه نبويه به انضمام ايدهرك  
اجماعي تماميله تقويه ايتمشدر .

علمائ اعلام اسلامك خلافت حضرت صديق مسئله سني يك زياده تعميق  
و تحقيق ايتلرينه سبب يوقاروده ديتلديكي وجهيله ابو تراب رضاه تعالى عنه  
حضرتلزينك امر خلافتده حضرت صديقدن احق اولديغنه و غدير خم  
حديث مشهورنده مقيد اولان « من كنت مولاه فعلي مولاه » جمله  
مبجله سني خلافته نصب مرتضوي ايجون نص مخصوص بولنديغنه دائر  
اولان بعض مذاهب اربابنك اقوالني ، مذهبي رد و جرح ايتك مقصد  
عاليسنه مبتنيدر .

امام ثوري حضرتلري اسانيد صحيحه ايله مجتهدين عظامدن « سفيان ثوري »  
حضرتلرينك شو افاده سني نقل و روايت ايدويور .

## حضرت سفیانک افاده سی

« حضرت علینک ولایت و خلافتہ حضرت صدیقن احق و اقدم اولدینی رأینده و افاده سندء بولسانلر خلافتی قبول ایدن حضرت ابوبکر صدیق ایله فاروق اعظمی و آنلرک خلافت و امامتی بالقبول کندولرینه بیعت ایتمش اولان و اوامر ونواهیسنه اطاعت ایدن بتون مهاجرین و انصار کرامی تحظہ ایتمش اوله جقلرندن او کبی اشخاصک هیچ بر عمللرینک سماواته صعود ایتمسی و عندها قرین قبول اولسنی مأمول ایدهم »

بو رساله ده مناسبت دوشدکجه بیان و ایضاح اولدینی وجهه مسئله امامتک و حضرت صدیقک خلافتہ احق والیق اولدیغنک اثباتنه ودلائلنک توضیحنه فحول علمای دینی و اعظم رجال اسلامیہ بی مجبور ایدن حال بروجہ محر بعض مذاهب اسلامیہ اربابنک خلافت اسلامیہ بی امام علی رضی اه عنه حضرتلرینه و آندن صکره خاندان جلیل العنوان نبوتہ حصر و تخصیص ایتمه لرله آنلرک بو حصر و تخصیصی ادله شرعیہ و براهین دینیہ ایله دفع و رفع ایتمک اساسنه مبتنی اولوب او خاندان قدسیت عنوانه منسوب اعظم ذوات کرامک وبالخاصه بعض مذاهب اربابنجه مقدس و معصوم اولمق اوزره اعتراف اولنمش اولان ائمہ اثنی عشردن بعضیلرینک خلافت حضرت صدیقک صحت و حقیقتی معلن بیانات و افادات واقعه لرندن بعضیسی ده عنعنہ سیله زیرده درج اولنور.

## استطراد

ذاتآدین اسلامده ظهور ایدن مهمجه اختلافات مذهبه نک منشائی قطعا احوال دینیہ دکلدرد. حقیقتده او اختلافاتک عامل و مؤثری امور سیاسیہ در. بعض علمای دین امرای حکومتک و رجال سیاسیہ نک افکارینی اوقشامق ایچون مسائل مذهبیہ ده بعض مرتبه تأویلاتی نصلسه مخالف دین و مذهب عد ایتما مشلردرد.

زمان مرور ايتدېکجه واختلافات سياسيې تنوع و تعدد ايلدېکجه تاويلات مذهبيده مع التأسف ايلروليهړک عالم اسلامي او کتله عظيمه دينيه يي پارچېلمش اولديغنه مسلمانلر تقدر آغلاسهلر يريدر . ذاتاً اضمحلالی جالب اولان شو افساداتک ايکي صنف خلقلک تأثير افعالی اولديغی عموماً مسلمدر .

بريسی . امرا

ديکری . علما

کتله عظيمه و واحده اسلاميه يي پارچېليان اختلافات سياسيې و داعيه تفوق و رجحان تاويلات شخصيه ايله علمای تشيت آرايه و اختلافات مذهبيه سوق ايتمش اولديغی تاريخ اسلامک هانکي صحيفه سته دقتله مراجعت اولورسه صورت جليده عيان اولور . عصر اول اسلامده بتون عالم اسلامي دلخون ايدن اهل بيت حقنده کی تجاوزات و تحقيقات شهسز حکومت امويه نك تحکيم موقعه متعلق افکار سياسيېدن منبعثدر . عباسيلرک تأسس خلافتی ينه اوافکار سياسيېنک امت اسلاميه جه عکس العملی اثريدر .

خلافت عباسيه زمانلرنده وقت وقت اهل بيت حضراتنک بعضيمي طرفندن ابراز اولان اختلافات و محاربات و قطعات معلومه ده تشکل ايدن حکومت ينه او اختلافات سياسيېدن نشأت ايتميشدر .

اهل بيتدن اولمقدلری حالده تأسس ايدن ديکې بعض حکومت اسلاميه نك ده صورت ظهور و تشکلی ينه اختلافات مذهبيه نك ايلرو سورلمی و محافظه احکام دينيه کې مسئلهلرک ميدانه آتلمی کې اختلافات سياسيې ثمر ايتدر .

اک صکره ايرانده تشکل ايدن حکومت صفويه حقيقتده صرف سياسي اوله رق بر حکومت تشکيل مقصدينه مستند ايکن بومقصده شيعيلک مذهبک توسیطي ينه او اختلافات سياسيېنک اثری و خصوصات مذهبيه نك منافع ذاتيه ده استخدا و استعمالی نتايجيدر .

حاصلی شيعيلک زیديلک دعوائری کاملاً حکومت و سلطت فکریله تأسس ايتمش و خلقي اغفال ايچون امور مذهبيه امور سياسيېنک تأسيسنه وسيله اتحاد ايتلميشدر .

اعصار اخيرمه افكار بشر كرك اديانجه و كرك سياسياتجه تنور و تعالى ايتديكنه. كوره بين الاسلام تفرقه يي موجب اولان دسايس مذهبيه نك آرتق مقاصد سياسيه ده توسيطي پولتيقه سنه نهايت ويرمك لازم ايكن مع التأسف عالم اسلامجه بوعادت قديمه دن بردرلو صرف نظر اولنه مامقده در .

ايران حكومتى شيعيك اسامسنه مستنداً تأسس ايتمش ايسه ده شمديلك اواسادن تباعد ايتمش وباخصوص شمديكي استيصال حریت اوغرنده ايرانيلىرك كوريلان غير تولىنه نظراً بوكون شو اساس تماميله منهدم ومنقرض اولمشدر . ايرانده كي قاچار خاندان سلطنتي جمله جه معلوم اولديني وجهله اهل بيت رسوله غير منتسبدر .

بناءً عليه حكومت ايرانيه بر حكومت و امامت دينه اولق اوزره مذهب شيعي اربانجه قبول اولنه ميه جنى مذهباً محققدر .

بوندن استدلال اولنوركه شيعيلر زمانمزده كندى مذهبلىرینه موافق بر امامت و خلافتك وجودينه البته قائل اوله مزلىر . شو حاله وله الحمد ايرانده دخی ممالك عثمانیه كبی بر حكومت مشروطه تأسس ايتديكنه كوره بعدما اختلافات مذهبيه نك امور و مقاصد سياسيه يه وسيله اوله ميه جنى محقق اولديغنه و بوكون عالم اسلامك تفرقه مى معاذالله تعالى دين اسلام ايله متدين اولانلرك انقراضنى مؤدى بر حال فجيع حصولى ديمك اولميسنه نظراً بالجمله مذاهب مختلفه اسلاميه نك وبالخاصه يكديكرينى پك فنا بر صورتله محاكه ايدن سنيلىرله شيعيلرك بربرينه قارشو اظهار خصومتى پك نابجادر .

هميز مسلمانز امت محمدن دینز اسلامدر كتابمز قرأندر اصل دينده متحدز . فروعانده بعض مرتبه اختلافاتمز اولسه بيله او اختلافات فرعيه اساس دينزى اخلال ايتمز . لزومسز بر تعصبله اختلاف مذهبي وسيله تنافر ايتمك جمله . مركز محوينى منتج اوله جفنه شبهه ايتاملیدر . علمامز ادبامز وبالخاصه حكوتهين مشروطه مز متفقاً متحداً چالشملى آراده كي ضدتي تباني رفع ايتמידر . سنيلىرله شيعيلرك زیدیلرك و سائر مذاهب اسلاميه اربابنك بربرينه



نظر نفرتله باقلرینی موجب هیچ بر حال موجود دکلدر . بوکون هیچ بر شیعی یوقدرکه حکومات اسلامیهدن برینی لغو ایدوبده اهل بیتدن بر حکومت تشکینی مکرند بولسون هیچ بر زیدی یوقدرکه بویله برحاله قائل اولسون . بناءً علیه ایکی طرفدن برینک امل مذهبیسی ناقابل حصول اولدقدن صکره اوزلاشمق پک قولای دکلدر .

## أمة اهل بیتك اقوالی

— ۱ —

محدثیندن « ابو نعیم » جنابلری سبط جلیل محبتی نجل نجیب مرتضی امام حسن رضی اه تعالی عنه حضرتلرینک مخدوم مکرملری امام حسن مثنی رضی اه تعالی عنه حضرتلرندن روایت آتییهی استخراج ایتشدرد :

سبب خلقت عالم صلی اه علیه و سلم افندمر حضرتلرینک شاه ولایت امام علی افندمرک شان و قدر عالیرینی تعظیم و تجلیل ایدن احادیث جلیله نبویهلرندن بری اولان و بعض مذاهاب اربابخه خلافت و امامته نص قاطع اولمق اوزره تلقی ایدیلان « من کنت مولاه فعلی مولاه » حدیث شریف متواتر و مفصلنک امام علی افندمر حضرتلریچون حقیقه خلافت و امامته دائر نص قطعی اولوب اولمدینی مشار الیه امام حسن مثنی حضرتلرندن سؤال اولمش و مشار الیه سائل اراسنده شو محاوره جاری اولمشدر .

سائل . بوحدیث شریف حضرت ابو ترابک خلافتنی متضمن نص قطعی دکلدر ؟

حضرت حسن مثنی . خیر نص قطعی دکلدر . فخر کائنات علیه افضل الصلوة افندمر حضرتلرینک بو کلامدن مقصد جلیل نبوتناهیلری امام علی افندمره توجیه امامت و سلطنت اولسیدی جناب حقک اسم اعظمه قسم ایدرم که انی ایضاح و افصاح بیبوره جقلردی . زیرا محققدرکه رسالتناه افندمر . حضرتلری

مسلمین و مؤمنین ایچون افادات و بیاناتنده افصح ناسدر . مقصد قدسی  
رسالتناهیتری دیدیککز کی اولسه « ایها الناس بندن صکره امام علی امور  
اداره کزه مأمورد . بنم ولی امرم اودر . کندوسنه اطاعت ایدیکز ، اوامری  
دیکلیکز » دیه مسئلهی تصریح بیوره جقلری شبهه سز ایدی . تکرار ایدرم که  
واللهی « من کنت مولاه » حدیث شریفندن مقصد علوی نبوت پناهی خلافت  
و امارت اولسه والله و رسولی طرفندن خلق اوزرنده ایفای وظیفه امارت  
و خلافت حضرت علی انتخاب و اختیار اولنوبده او وظیفه مقدسه و مهمه امام  
علی افندن جانبندن ترك ایدلمش بولنسه ایدی امام مشارالیه حضرتلری عباداللهک  
اک زیاده کنهکاری اولمق اقتضا ایدردی . چونکه امرالهی و امر رسولی ترك  
ایتمش اوله جقدی . امام علی رضی الله تعالی عنه حضرتلری ایسه حاشا ثم حاشا  
بویله عظیم برکناهی ارتکابدن منزهدر .

سائل . رسول اکرم صلی الله علیه وسلم افندن حضرتلری . من کنت مولاه  
فعلی مولاه . بیورمدیلرمی ؟

حضرت حسن مثنی . اوت بیوردیلر . فقط بوندن مقصدلری امارت  
وامامت اولسیدی واللهی انی ایضاح و نماز و زکاة اموری تبیین ایتدکری مثللو  
بونیده تصریح و افصاح بیوره جقلردی « ایها الناس بندن صکره امام علی ولی  
امر کزدر . بنم امرمه امور اداره کزه مأمورد . امرینه عصیان ایتیکز » دیه  
ایضاحات و تصریحات کافیهی دریغ ایتزلردی .

## — ۲ —

محدثندن . دار قطنی . امام اعظم وهام اقدم ابی حنیفه حضرتلرندن شو  
روایتی استخراج ایتشدر :  
امام مشارالیه حضرتلری مدینه منوره ده ائمه خاندان نبوتدن ابی جعفر الباقر  
حضرتلریله بویله برمشافهده بولمشلردر :

امام اعظم . حضرت صدیق و عمر فاروق ایچون نه بیوررسکمز :

حضرت ابی جعفر . جناب حقك رحمتہ مظهر اولسونلر دیرم .  
امام اعظم . سزك مشارالیهما حضراتندن تبری ایتکده اولدیغکیزی بزده ،  
عراقده سویله یورلر .

حضرت ابی جعفر . معاذالله تعالی صاحب کعبه اولان جناب ذوالجلاله  
قسم ایدرم که یلان سویلرلر . بکا افترا ایدرلر امام علی افندمن حضرت فاطمه دن  
متولد کریمه محترمه نری « ام کلثوم » حضرتلرینی فاروق اعظمه تزویج و انکاح  
ایتدیلر . فاروق اعظم بوکا اهل اولسه انکاح ایدرمی ایدی .  
امام اعظم . سزك ایچون اوکی تفوهات واسناداتده بولسانلره فکرکیزی  
اشعار و اخبار ایتمش اولسه کنز اولمز می ؟

حضرت ابی جعفر . مکتوبلرمله بکا اطاعت ایتمزلر . ام کلثومك حضرت  
فاروقه تزویجی رافضه نك زعنی ابطاله کافیدر . یوخسه زعم فاسدلرینه کوره  
معاذالله تعالی حضرت علی ام کلثومی برکافره تزویج ایتمش دیمک اولور (۱) .

### — ۳ —

محدثیندن . دارقطنی . ائمه خاندان نبوتدن . محض . لقبیه (۲) ملقب اولان  
عبدالله حضرتلرندن روایت آنیه نی استخراج ایتدی :

عبداه محض رضی اه تعالی عنه حضرتلری زماننده بنی هاشمك بیوکی  
ورئسی ایدی . نفس زکیه ایله ملقب اولان اوغلنه خلفای عباسیه دن منصورك  
زمان خلافتنده مدینه منوره ده بیعت اولتمشیدی .

بر سائل حضرت عبداه محضدن خفین اوزرینه مسح ایدوب ایتیه جکینی

(۱) کوریله یور یا امور دنیویه و سیاسیه فکریله خاندان نبوت نامنه اشاعات و مخبرات  
و حتی معاملات و محاربات واقع اولمشدر .

(۲) عبدالله حضرتلرینك محض تلقیب اولمسنك سببی شباب اهل جنك سیدی اولان  
امام حسن و امام حسین رضی الله تعالی عنهما حضراتنك اک ارل ولادلرینی جمع ایتسیدر .  
یعنی پدر و مادری حسن و حسین اولادندن بولان ایلک سید عالی نسب بولتمسیدر .

صوردی . مشار الیه حضرتلری ده فاروق اعظم حضرتلرینک خفین اوزرینه مسح ایتدکاری جهته کندوسی ده مسح ایده جکی جوانی ویردی .

سائل : سز مسح ایده جکیسکز ؟

حضرت عبده : نه قدر سوز آکلامز بر آدمسک . بن حضرت فاروق اعظمک عملی بیان ایده یورم . سن حالا بنم رأیمی حرکتی صوریورسک . امام عمر حضرتلری بندن و بنم کبی دنیا طولوسی آمدنن ایدر .

سائل : بو افاده کز تقیه در .

حضرت عبده : بز ایشته قبر و منبر عالی نبوی آراسنده بولنه یورز . واللہی بنم سرأ و جهراً قولم بوندن عبارتدر . امام علی افندمزک مقهور اولدیغنی و صاحب شریعت خاتمہ شرفنامه نبوت علیه الصلاة والسلام افندمز حضرتلری طرفندن کندوسنه ویریلان امری انفاذ ایتدیکنی کیم سویلر ایسه حضرت علی یه اسناد تقیصه ایچون یالکمز بو افتراسی کافیدر .

#### — ۴ —

دار قطنی : ائمه خاندان نبوتدن اولان و عبده المحضک نجل نجیبی بولنان « نفس زکیه » دن شو راویتی استخراج ایتمشدر :

حضرت شیخین « یعنی ابابکر صدیق و فاروق اعظم » حقنده کندوسنه وقوع بولان برسؤاله « مشار الیهما حضراتی نزدیده امام علی افندمزدن افضالدرلر . » جوانی ویرمشدر .

#### — ۵ —

ائمه خاندان نبوتدن واجله اولاد علیدن امام محمد الباقر حضرتلری « اولاد فاطمه رضی اه تعالی عنهم » شیخین حقنده الک ایی سوز سویلک اوزره اجماع ایتدکارینی افاده و توضیح و خاندان نبوتدن هیچ برینک مشار الیهما حضراتنک فضلنی انکار ایتدکارینی تصریح بیورمشدر .



— ۶ —

دار قطنینک ائمه خاندان نبوتك اعانمندن بولسان امام جعفر صادق  
اوده پدری محمد الباقرن شوروايتی نقل ایدیور: بر آدم پدری زین العابدین [۱۸]  
رضی اه تعالی عنه حضرتلرینه کلهرك شو محاورده بولندی :

سائل : ابي بکردن بکا خبر ویر .

سید سجاد : حضرت صديقدن می ؟

سائل ! صديق تسمیه ایدیهورسکز اوله می ؟

سید سجاد : کال حقارتله سائله توجه ایدیهرك ، رسول اکرم صلی الله  
عليه و سلم افندمزه بتون مهاجرین و انصار کرام حضرت صديق صديق  
تسمیه ایتشلردر . کندوسنی صديق تسمیه ایتیانلرك سوزینی دنیا و آخرتده  
جناب حق تصديق ائمه جکدر . بن ابا بکر و عمر حضراتی سورم . سن  
شورادن دفع اول ، کیت .

— ۷ —

دار قطنینک عروه دن اوده عبداللهدن استخراج ایتدیکی روایت :  
عبده : قلنجی تزیین و تحلیه جائز اولوب اولمديغنی ائمه خاندان نبوتدن  
جعفر صادق پدرلری محمد الباقر حضرتلرندن سوردم . ابوبکر صديق  
رضی اه تعالی عنه حضرتلری سیفلرینی تزیین و تحلیه بیوردقلری جهته تحلیه  
سیف جائزدر : جوابی آلم .

عبده : ابوبکره صديق ديه جکمیسکز سؤالنه دخی شو جوابی تلقی ایتدم :

۱۱۱ حضرت زین العابدین وقع جکر سوز کر بلاده خسته ای جهته محاربه ایدیه میوب  
او واسطه ایله امام حسین افندمرك محافظه حیات ایدن یکانه نجل نجیبیلردر . زیاده سیله  
نماز قلديغی جهته « سید سجاد » لقبیه شهرت شعار اولمشلردر . شاعر اشهر عرب  
فرزدك قصیده مشهوره سنده ممدوح اولان ذات عالی کندولریدر .

محمدالباقر : اوت ، صديق ، اوت صديق ، اوت صديق ديرم . حضرت ابی بکره صديق ديميانلرک دنيا و آخرتده سوزلری جناب حق نزدنده تصديق اولنمسون .

محمدالباقر حضرتلرندن دار قطنينک استخراج ايتديکی بوروايت محدثندن این جوزی طرفندن دخی استخراج اولمشدر . این جوزينک اسخراننده فقره آتیهنک ده روايت مقدمه يه انضمامی لازم کلور .

عبداه طرفندن « صديق ديه جکمیسکز » سؤالی اوزرينه حضرت محمد الباقر همان يرندن فرلايوب قبه يه توجه ايدهرک اوت صديق کلهلرينی بوجه بالا اوچ دفعه تکرار ايتمش و افادات سائره يي اتمام ايشدر : این جوزينک حضرت محمدالباقردن استخراجنه کوره امام مشار اليه حضرتلری « جدم ابو تراب حضرتلرندن هيچ بر شی ایچون هيچ بر شفاعت مأمول ايتم که آنک کبی بر شفاعتی دخی حضرت صديقدن مأمول ايتيميم . چونکه حضرت صديق نخی ایکی دفعه توليد (۱) ايتمشدر .

اعاظم خاندان نبوتدن زيد بن علی (۲) رضی اه تعالی عنه حضرتلری ده بونی بیان ايتمشلدر .

« حضرت شيخیندن (۳) تبری ايتمک الله اعلمدر که امام علی افندمزدن تبری ايتمک ديمکدر . »

ينه حضرت زيد رضی الله تعالی عنه شيخین مکرمين حقنده اطالۀ لسان ايدن شيعيلره ، رافضيلره شو ووجهه جواب ويرمشلدر :

« زمان خلافت حيدر يده ظهور ايدن خوارج ابوبکر صديق و عمر فاروق رضی الله تعالی عنهما حضراتی مادوننده بولنانلره اطلاق لسان ايله انلردن تبری

(۱) حضرت محمد الباقرک والده سی و بيوک آناسی اولاد حضرت صديقدن اولدقلىنه اشارتدر .

(۲) زيدیه مذهبی بو ذات عالی به اسناد اولنور .

(۳) شيخین حضرت صديق ، وفاروقدر .

ایتدیلر سده مشار الیها حضراتنه اطالہ لسانہ اجتسار ایدہ مدیلر . سرظہور  
ایتدیکز . خوارجک جہلہ سنہ تفوق ایدرک انلرک مساوی اقوالنک یتشہ مدیکی  
شیخین حضراتنہ ده ایصال لسان تعرضہ باشا لادیکز مشار الیها حضراتندن  
تبری ایتدیکز . واللہی حضرت شیخیندن تبری ایدنلر ارق تبری ایتدیک کیمسه  
براقامشیر دیمکدر . »

— ۸ —

محدثیدن ابن عساکر سالم بن ابی جعدہ نک امام علی افندمزک مخدوم  
مکرماری « محمد بن الحنیفہ » حضرت تلیہ محاورہ آتیه سنی استخراج ایتشدیر :  
سالم بن ابی جعدہ . ابوبکر صدیق حضرت تلی ہر کسدن اولمی اسلامی  
قبول ایتدی ؟

حضرت محمد . خیر

سالم . او حالده حضرت صدیق نہ ایلہ بتون مسلماننرہ استعلا و مسابقت  
ایتدی . بر درجہ ده کہ حضرت ابی بکردن بشقہ کیمسه ذکر اولنہ میور .  
حضرت محمد . مسلمان اولدیفنی کوندن رحمت حقہ قاوشدیفنی زمانہ قدر  
مسلمانلقجہ مسلمانلرک افضلی بولنمسیلہ اودرجہ عالیہ نائل اولدی .

— ۹ —

دار قطنی . شیعی اولان سالم بن ابی حفصہ ایلہ ائمہ خاندان نبوتدن  
حضرت محمد الباقر اراسندہ جریان ایدن مشافہہ آتیه نی استخراج ایتشدیر :  
سالم شیعی اولمقہ برابر موثوق بر ذاتدر .

سالم بن ابی حفصہ . شیخین ایچون نہ بیورر سکز ؟

حضرت محمد الباقر . شیخین حضرت تلی نہ محبت و مودتی اولمیان و انلری  
سومیانلر دن تبری ایت چونکہ حضرت شیخین عالم اسلامک ایکی امام  
هداسیدر .

ینه دار قطنی بوسالمدن روایت آتیہی استخراج ایتشد .  
 سالم . ابی جعفر محمد الباقر حضرتلینک و بر روایتہ کورہ جعفر بن  
 محمد الباقرک حضورندہ ایدم . بنی ارشاد ایچون اولدیغندہ شہہ ایتدیکم شوافادہ نی  
 اتیان ایتدی . « الہی بن ابی بکر صدیق و عمر فاروق حضراتی سورم .  
 الہی قلمدہ بوافادہ مدن بشقہ برشی وار ایسہ فخر کائنات علیہ افضل الصلاۃ  
 افندمرک شفاعتہ نائل اولمہیم . »

— ۱۰ —

دار قطنی اعظم خاندان نبوتدن ابی جعفر محمد الباقردن اودہ پدری سید  
 سجاد حضرت زین العابدین افندمزدن بورواتی نقل واستخراج ایتشدر :  
 سید سجاد حضورعالیرندہ حضرت صدیق و حضرت فاروق اعظم حقلرندہ  
 سوز سویلیان بر جماعتلہ شو محاورہدہ بولندیلر .

سید سجاد . « والذین اخرجوا من ديارهم واموالهم يبتغون فضلاً من الله  
 ورضواناً وينصرون الله ورسوله اولئك هم الصادقون » آیت کریمہ سی حقلرندہ  
 شرفنازل اولان مهاجرین اولین سزمیسکنر بکا خبر وریکنر ؟  
 جماعت . خیر بو آیت کریمہدہ محررمہاجرین اولین بز دکلز . زمان سعادت  
 نبویہدہ اک اول هجرت ایدنلردر .

سید سجاد . حقلرندہ « الذین تبوء الدار والايمان من قبلهم يحبون من هاجر  
 اليهم ولا يجردون في صدورهم حاجة مما اوتوا ويؤثرون على انفسهم ولو كان بهم  
 خصاصة ومن يوق شح نفسه فاولئك هم المفلحون » [۱]  
 نصل جلیلی وارد اولان سزمیسکنر ؟  
 جماعت . خیر بز دکلز .

[۱] «بو ایکی آیت جلیلهنک برنجیسی مهاجرین ایکنجیسی انصار کرام حضراتنک قدر  
 و شان عالیبرنی ترفع ایچون شرفنازل اولمشدر . »



سیدسجاد . اولیه ایسه حقارنده بوا یکی آیت کریمه نازل اولان ایکی فرقه عظیمه اسلامیه دن « مهاجرین و انصار دن » سز مقبریسکزر . شو حالده حقارنده « والذین جائوا من بعدهم يقولون ربنا اغفر لنا ولاخواننا الذین سبقونا بالایمان ولا تجعل فی قلوبنا غلا للذین آمنوا ربنا انک غفور رحیم » ایت جلیله سنک نازل اولدیغی فرقه اسلامیه دن اولمدیغکزرده بن شهادت ایدرم . [۲]

— ۱۱ —

داور قطنی جنذب الاسیدن شوروا تی استخراج ایشدر :

جنذب . خاندان نبوتک اعظمندن محمد بن عبدالله بن حسنک مجلسنده بولنه یوردم . کوفه و جزیره اهالیسندن برجاعت حضور عالیترینه کلدیله . صدیق اکبر و عمر فاوورق حضراتنه دائر مطالعه سنی ، فکرینی صور دیله . محمد بن عبدالله اندره جواب و یرمه رک بکادی که « مملکتکزرک شو اهالیسنه باق . حضرت شیخین ایچون مطالعه می فکر می صورده یورله . عندمده حضرت شیخین مکرمین جدم امام علی افبدمزدن افصدرله .

احادیث نبویه بی حفظ ایدن و معرفت حدیثده معتمد الیه اولان حفاظ حدیثک اجله و اعظم اهل بیتدن تصحیح و روایت ایتدکری اقوال پک چوق ایسه ده نموته اولمق اوزره بالاده بیان اولنان بردوزینه قریب موادی بیان الیه اکتمفا قلنمشدر . ارتحال عالی حضرت نبوی نی متعاقب سقیفه نبی ساعده ده مهاجرین و انصار کرام اراسنده وقوع بولان مباحثات شدید نتیجه سنده مقام اقدس خلافته اجلاس و بیعت اولنان حضرت صدیقک صحت خلافت و امامتمده اجماع امت حاصل اولدیغی و بوکا ذره قدر اشتباه قالمادیغی شمده یه قدر ایراد اولنان ایضاحات الیه درجه ثبوت و اصل اولمشدر . هر نه قدر ابوتراب الیه زیر بن عوام رضی الله تعالی عنهما حضراتک و اسامیسی معدود ده بعض اصحابک بیعت

[۲] مادامکه مهاجرین و انصار دن اولان اخوانکزرک بوآیت کریمه حکمنجه لمنده بولنمیبولمپنده بولنه یورسکزر آرتق آیت کریمه نک مهاجرین و انصارک غیری اوله رق مدح و ثنا ایتدیکی مسلمانلردن ده دکسکزر دیکدر .

حضرت صدیقہ تأخر لری واقع اولمش ایسہدہ اخیراً انلرک دخی علی ملاء المناس  
 « روایاتک اختلافہ وتأویلہ نظراً ایستر بدایۃً وسقفیۃً نبی ساعدہ وقعہ سنی  
 متعاقباً اولسون ایستر تجدیذاً وتالیاً بولنسون » بیعت ایستکلری جہتلہ بوقضیہ  
 ایلہ حضرت صدیقک خلافتی حقندہ کی اجماع امتہ ہیچ برنقیصہ و خلل عارض  
 اولمدینی ثابتدر . بناءً علیہ حضرت صدیقک خلافتی وضحت و حقیقت امامتی  
 ارکان اربعۃ دینک اوچنجیسی بولنان اجماع امتہ مستند و اساس دینہ بوصورتلہ  
 داخل اولدینی محققدر . بوجملہ ایلہ برابر مقدمہدہ یازلدینی وجملہ مشارالہ  
 حضرتلرینک صحت و حقیقت خلافتلرینہ اشارۃً دلالت ایدن آیات قرآنیہ واحادیث  
 جلیلہ نبویہ دخی مبحث آتیدہ ذکر و ایراد قلنہ جقددر .



## مبحث

۲

---

خلافت حضرت صدیقه دلالۃ ایدن آیات قرآنیہ

— ۱ —

« یا ایہا الذین آمنو من یرتد منکم عن دینہ فسوف یأتی اللہ بقوم یحبہم ویحبونہ اذلہ علی المؤمنین اعزہ علی الکافرین یجاہدون فی سبیل اللہ ولا یخافون لومة لائم ذلک فضل اللہ یؤتیہ من یشاء واللہ واسع علیم » آیت کریمہ سیدر .

محدثین کرامدن جناب بیہقی اجلہ تابعیندن واعظم فقہای دیندن اولان امام حسن بصری حضرت تلمینک بوآیت کریمہ فی تفسیر یولندہ تصحیح وروایت ایتدکلری مطالعہ سی بودر :

امام حسن بصری . واللہی بوآیت کریمہ حضرت صدیق حقنہ نازل اولمشدر . چونکہ عربلر ارتداد ایتدکلرنده کندیلرلہ محاربہ ایدن حضرت صدیق واصحابیدر . حضرت صدیقک مجاہدات ومحاربات شدیدہ لیلہ ارتداد ایدن عربلر تکرار دیانت جلیلہ اسلامیہ عودت ورجوع ایتدیلر .

محدثیندن یونس بن بکر جنابلری دہ حضرت قتادہ دن شور وروایت استخراج ایتمشدر :

حضرت قتادہ . سبب ایجاد عالم نبیؐ محترم ومکرم صلی اللہ علہ وسلم افندمن حضرت تلمینک وفاتلری متعاقب عربلر ارتداد ایتدیلر . حضرت صدیق مرتدلرلہ محاربہ ومجاہدہ ایتسیلہ ارتداددن رجوع ایتدیلر .

اوزمان بوآیت کریمہ نک حکم جلیلی، حضرت صدیق ایلہ اصحاب کرامنہ تطبیق ایتمش ایدک .

اہل ردت حقنہ حضرت صدیقک اصحاب کرام ایلہ مذاکرہ سی ونہایت سائر اصحاب کرامی الزام ایلہ ارباب ارتدادی بالمحاربہ تأدیب ایلمسی وقایع مشہورہ اسلامیہ دندر . ارتداد ایدنلرک بر طاقی اسلامیتی محافظہ

ایله یالکیز زکاة ویرمکدن امتناع و زکاة ویرمامک خصوصنده اضرار و عناد ایتدیلر . حضرت صدیق مانع زکاة اولان مرتدلرله محاربهیه مباشرت ایتدی . روح پرفتوح رسالتیناهی عازم کاشنسرای علین اولدیغنی متعاقب عربدن برحقوق عشایر و قبائلک ارتداد و زکاة ویرمامک اوزره اضرار و عناد ایتلرینه و حضرت صدیق بونلرله محاربهیه تشبث بیوردقلرینه مبنی حضرت فاروق اعظم و سائر اصحاب کرام اوصرده محاربه ایدلمسی مناسب اولدیغندن و باخصوص یالکیز مانع زکاة اولانلرله محاربه ذاتاً غیر جائز بولندیغندن بحسبه ارتداد ایدنلرله محاربه اولنماسی جهتنی حضرت خلیفهیه مصرانه عرض وافاده ایلدیلر .

زمان سعادت نبویهده فخرکائنات افندمز حضرتلرینه ویریلان زکاتدن بر « عقلی » (۱) بیله ویرمکدن امتناع ایدنلرله محاربه ایده جگنی حضرت خلیفه امر و فرمان ایتلریله بومادهیه دائر امام عمر افندمز حضرتلریله شو محاورده بولنملردر .

حضرت فاروق . علیه الصلاة والسلام افندمز حضرتلری « امرت ان اقاتل الناس حتی یقولوا لا اله الا الله وان محمداً رسول الله فمن قالها عصم منی ماله و دمه الا بحقها و حسابها علی الله » بیورمش ایکن « لا اله الا الله وان محمداً رسول الله » دیمکده بولنان و یالکیز اعطای زکاتدن امتناع ایدن خلق ایله نصل محاربه ایده بیلورسک ؟

حضرت صدیق . تمام بن دخی سنک بیان ایتدیکنک شو حدیث شریفک احکام جلیله سنه استناداً محاربهیه ترجیح ایده یورم . حدیث شریفده « الا بحقها » جملهسی یوقیدر زکاة دخی کلمتین شهادتینک حقوق متممه سندنذر . شبهه یوقدرکه زکاة دخی صلات کبی صوم کبی حج کبی اسلامیتک حقوقندنذر .

(۱) عقل دونهک ایقلرینی باغلامق ایچون استعمال اولنان ایدر . عربستانده عربلرک باشلرنده استعمال ایتدکری کفیه و عقل دخی باش باغی اولدیغنه مبنی عقل تسمیه اولنور .



والله زکاتی نمازدن اور وجودن تفریق ایدنلرله محاربه ایدرم . چونکه زکاة مالک حقیدر . فخر رسل افندمن حضرت تلی ده «الابحقیها» بیورمشلردر . صدیق اکبرک بوجواب مصیبلریله حضرت فاروق اعظم ملزم اولمشلر وحضرت صدیقک جناب حق طرفندن ملهم اولدقلرینی سولمشلردر .

حضرت صدیقک اعلم اصحاب کرام اولدیغنه اعظم علما وفقهای اسلامیة بوقضیه ایله حکم ایتمشلردر . کافه اصحاب کرام اسلامیته باقی قلوبده یالکز زکاة ویرمامک ایستیانلرله محاربه جائز اولدیغنی ذکر اولنان حدیث شریفه استناداً بیان وافاده ایتمشلر و اورای ومطالعده بولمشلر ایکن عین حدیثک صوکه جمله سی بولنان «الابحقیها» مآلندن وجوب محاربه بی حضرت صدیق استدلال ایتمشدرکه بواسطه استدلالری مباحثات دورا دورایله اصحاب کرامک جمله سینه بخش قناعت ایتش و بو جهتله شوقضیه حضرت صدیقک اعلم اصحاب کرام اولدیغنه الکمهم بر دلیل اتخاذ اولنمشدر .

محدثندن جنساب بهقی وابن عساکرک ابوهریره رضی الله تعالی عنه حضرتلرندن بوماده ارتداده دائر استخراج ایتدکلری روایتدر :

حضرت ابوهریره . وحدانیت الهیه و ذات واجب الوجوده قسم ایدرم که ابوبکر صدیق حضرت تلی مقام مقدس خلافته جلوس ایتماش اولسیدی جناب حقه عبادت اولنه مزدی .

حضرت ابیهریره شوافاده سنی اوچ دفعه تکرار ایتسیله سامعینک نظر استغرابی جلب ایتش وافادات واقعه سنده تائی وملاحظه ایتسی لزومی کندوسنه اخطار قلمشدر .

سامعینک بو استغراب و اخطارینه ده مشارایله حضرت تلی جواب ویره رک شوصورتله افاده سنه دوام بیورمشلردر .

«حضرت ابوهریره . سبب خلقت عالم صلی الله علیه وسلم افندمن حضرت تلی وفاتلرندن مقدم اسامه بن زید رضی الله تعالی عنه حضرتلرینی یدی یوز نفر دن مرکب بر فرقه عسکریه ایله شام جهتنده جهاده مأمور بیورمشلردی . اسامه

حضرت تری عسکر یله برابر ذی خشب (۱) موقعی اردوگاه اتخاذا ایدرک هنوز اوموقعه ایکن ارتحال جلیل نبوی وقوع بولدی . متعاقباً مدینه منوره اطرافنده کی عربلر ارتداد ایتدی بنابرین اصحاب کرام حضرت صدیق کیدوب مدینه حوالیسنده کی عربلرک ارتدادندن دولایی شام جهتنده محاربه یه مأمور اولان حضرت اسامه نك ومعیتنده کی فرقه عسکر یه نك سوق اولنماسی وتأخیر ایدلمسی لزومی عرض و بیان ایتدیلر . حضرت صدیق اصحاب کرامک بو اخطارینی ردایله برابر عسکرک مأمور اولدقلری شام جهتنه سرعتله عزیمت ایتلرینی اسامه حضرتلرینه امرایتمسینه اصحاب کرام بو فرقه عسکر یه نك کیرو قالمسی لابد اولدیغنه دائر اولان افادات و اخطارات سابقه لرنده پك زیاده اصرار ایلدیلر . بو اخطارات مکرره وشو افادات متفقه و مصرانه یه جواباً حضرت صدیق « وحدانیت الهیه یه قسم اولنورکه مرکز خلافت اولان مدینه منورده مهالك و مخاطرات ملحوظه ومتصوره صوك درجه یه واصل اولسه معاذالله تعالی ازواج طاهرات حضرت نبویه کلابك تسلطی دفع ایدیله میه جك قدر عجز و فتور ظهور ایتسه بیه فخر کائنات افندمن حضرتلرینك مأمور بیوردقلری بر عسکر کی کیرو آلهم وانك عقد ایتدیکی بیراغی چوزم » جواب قطعینی و یردی وعموم اصحاب کرامک رأینه ، سوزینه ، اصرارینه مخالف اولدیغی حالد حضرت اسامه یی فرقه عسکر یه سیله برابر شام جهتنه سوق ایلدی . حضرت اسامه مدینه منورده دن شام جهتنه کتیبه ران جلادت اولدیغی زمان یولده تصادف ایتدیکی عشایر وقبائل عرب « مسلمانلرده بیلمدیکمز بر قوت بر شوکت اولسه بو عسکر کی روم ایمپراطورلغی حکومته مربوط اولان شام جهتنه سوق وروم ایمپراطورلغیه محاربه یه اجتسار ایتزلردی بونلرک روملرله محاربه لرینی کورمه لده تیخه سنه نظراً بزده مسلمانلرله خط حرکت می تعین وتعیب ایدم » دیهرک اظهار ارتداد خصوصنده متردد قالدیلر «

« حضرت اسامه اوآتشپاره جلادت ایه مامور اولدیغی وظیفه عسکر یه سنی

حسن ایضا ایله برابر محاربه ده مظهر موفقیت اولدی . سالماً مظفر آ مرکز خلافته عودت ایتدی . مشارالیه حضرتلرینک سالماً ومظفر آ عودت لری ارتداد ایتکده متردد اولان عشایر وقبایک اداره ناجیه اسلامیه ده دوام وثباتی مستلزم اولدی .»

ابوهریره حضرتلرینک شو ایضاحاتی کتب سیر وتواریخک احکامنه ، مندرجاتنه ، تمامیه مطابق وبو حرکت عسکریه بی رأی صائب منفرد لریله مصر آ وبتون اصحاب کرامک رأی ومطالع لرینه رغماً اجرا ایدن حضرت صدیقک متانت ، شجاعت ! رأینده اصابت ! کبی بین الاصحاب مزیات خارقه سنی اثبات ایله حرکت واقعه سی تأیید وتشید مبانی عالیّه اسلامیه به موافق دوشمشدر [۱]

ذکر اولنان آیت جلیله نک احکامی ارتداد ایدنلره قارشو ابراز شدت ایده جک مسلمانلرک مدح و ثنائی متضمن اولدیغنه وحضرت صدیق دخی ارتدادی اورتدن قالدرنجیه قدر ارباب ارتداد ایله محاربانده بولمادیغنه مبنی آیت کریمه نک تضمن ایلدیکی مدح و ثنا حضرت صدیق ایله اصحاب کرامنه عائد وراجع وبناء علیه حکم جلیلی ضمناً خلافت حضرت صدیقک تحت وحقیقته دلیل قاطعدر .

۲

« قل للمخلفین من الاعراب ستدعون الی قوم بأس شدید تقاتلونهم اوینسمون فأن تطیعوا یؤتکم الله اجرآ حسناً وان تنولوا کما تولیت من قبل یعذبکم عذاباً الیماً » آیت جلیله سیدر .

بو آیت جلیله دخی حضرت صدیقک خلافتی مؤید آیات قرآنیهدندر . محدثیندن ابن ابی حاتمک حضرت جیوردن استخراج ایتدیکی روایت کوره بو آیت کریمه ده بآسی شدید اولمق اوزره تعریف بیوریلان بنوحیفه عشیرتیدر .

[۱] غایت مهم اولان بوقضیه حریبه معجزات جلیله نبویه واوامر نبویه اتباعک مستلزم اولدینی فوائد ومافع دینه وسیاسیه دلائل قاطعه دندر .

بنو حنیفه عشرتی « مسیلمة الکذاب » قبیله سی اولوب نبوت کاذبه سته قائل اولان و حضرت خالد ابن ولید رضی الله تعالی عنه قومانداسیله حضرت صدیقک سوق ایتدیکی عساکر اسلامیه ایله اک شدتلی و قاتلی محاربه ایدن ارباب ارتداد اولدقلری کتب سیر و تاریخ مندرجاتیله مثبتدر .

محدثیندن ابن ابی حاتم و ابن قتیبه و سائر لری خلافت حضرت صدیقک حقیقته بو آیت کریمه ک حجت قاطعه اولدیغنی سویلشدردر . چونکه بو آیت کریمه اعرابی محاربه یه دعوت ایده یور حال بوکه آیت کریمه ک شرفزولندن صکره زمان سعادت نبویه ده هیچ بر محاربه ظهور ایتماشدر . آیتک شرفزولندن صکره ایلک محاربه حضرت صدیقک زمان خلافتنده ارباب ارتداد ایله ظهور ایدن محاربات شیدیده در . بناءً علیه آیت کریمه ک حکم جلیلی اعرابی ارباب ارتداد محارباتنه دعوتدن عبارتدر . بودعوت ایسه بالخاصه و منفرداً و حتی بعض جهاتنده بتون اصحاب کرامک فکرینه خلافاً حضرت صدیق طرفندن کندی رأی ذاتیسیله و وقوعه کیشدر . چونکه اصحاب کرام ارباب ارتدادک مانع زکات اولانلریله محاربه ک و جوبنی حضرت صدیقک ایضا حاتیله اجتهدیله اکلامشدردر . بناءً علیه آیت کریمه حضرت صدیقک وجوب خلافتنده فرضیت طاعتنده صراحةً حجت قاطعه در . زیرا بو محاربات ایچون وقوع بولان دعوته اجابت ایتمیانلرک دوچار عذاب الیم اوله جقلری « یعذبکم عذابا الیم » جمه سیله محقق و حضرت صدیقه اجابت ایتمک دخی موجب اجر و ثواب اولدیغنی مصرح اولوب مشار الیه حضرت لری اولوالامر اولسه و خلیفه بالحق بولنسه امرینه اطاعت مستلزم اجر و مغفرت و عدم اطاعت باعث عذاب و نقیمت اولیه جنی اظهردر .

محدثیندن ابن کثیر دیمشدرکه بو آیت کریمه ده محاربه لرینه اعرابک دعوت اولندیغنی صاحب بأس و شدت اولان قومدن مقصد مسلمانلره اخیراً مناسبات حربیه ده بولنان روملر، عجملر اولدیغنه ذاهب و قائل اولان مفسر لر وار ایسه ده بو ذهابه مستند اولان بوتفسیر فرض محال اوله رق قبول اولنسه بیله کرک سوریه



جهتده روم ایمپراطور لگیله و کرک خطه عراقیه جهتده فرس حکومتیله محاربه ایچون اک اول ترتیات و سوقیات عسکریهده بولنان اعلان حرب ایدن خلیفه ینه حضرت صدیق اولدیغندن واکمال محاربات و فتوحات حضرت فاروق ایله حضرت عثمان زماننده اولسنه مبنی انلرک خلافت و امامتلی ده حضرت صدیقک خلافت و امامتنه متفرع بولندیغندن آیت کریمه یی شو صورتله تفسیر دخی ینه حضرت صدیقک صحت خلافتنه نص قاطع اولور .

روم ایمپراطور لگی و فرس حکومتیله اولنان محاربات اسلامییه معلوم اولدیغی وجهله اولمتلری اسلامه دعوت ایچوندر قبول اسلامیث ایدوب ارتداد ایتملرینه مبنی تکرار اسلامیته ارجاعلری ایچون دکلدرد . ارتداد ایتدکلری جهتله مسلمانلرک مناسبات حربیهده بولندقلری اقوام ایسه عربلردر . ارتداددن و بناءً علیه دین اسلامه اعاده و ارجاعلرندن طولای روملرله و عجملرله برکونه محاربه اولدیغندن آیت کریمهده کی ارتداددن مقصد روملر و عجملر اولیوب عربلره شمول قطعی ایله شمولی بدیمیدر .

طوائف شیعهدن بعضیلری بو آیت کریمهده اعرابی محاربهیه دعوت ایدن داعی حضرت صدیق دکلدرد . یا فخر کائنات علیه افضل الصلوة افندمن حضرتلیدر یا خود خلیفه رابع اولان امام علی کرم الله وجهه حضرتلیدر دیه برادعا درمیان ایتمشلر سهده بوزعم بودعوی دخی کایاً باطلدر . چونکه یوقارودده ایضاح اولندیغی وجهله آیت کریمه نیک شرف نزولندن صکره زمان سعادت نبویهده هیچ بر محاربه ظهور ایتماش و جهاد ایچون سوقیات عسکریه وقوع بولماش اولدیغندن آیت کریمهدن مقصد حربک آمری خاتم النبیین افندمن حضرتلری اولدقلری بداهه مسلمدر .

کذلک حیدر کرار رضی الله تعالی عنه حضرتلری ده زمان سعادت اقتران خلافت بنهایلرنده اسلامیته خلقی دعوت ایچون هیچ بر محاربهیه تصادف ایتماشلردر . زماننده ارتداد ایدنلرده اولدیغندن مرتدلرلهده مناسبات حربیهده بولتماشلردر . خلیفه مشارالیه حضرتلرینک ایتدکاری محاربات امامتی طلبدن و حقوق خلافتی

مدعیلرینه قارشى محافظه مقصدندن عبارت محاربات داخلیه منحصردر .  
بناءً علیه آیت کریمه داعی حرب اولان ذات شعیلر زعنه کوره حضرت  
کرار افندمز اولسی و آیت کریمه حکمنک اورایه صرف وتوجیهی امکانسزلنی ده  
محققدر .

بو آیت کریمه نك حضرت صفدر کراردن صکره کی خلفای امویه حقتده  
اولدیغنی بیان ایتك حکم جلیلی آنلره تشمیل ایلمک ده غیرممکندر . چونکه  
خلفای امویه اهل سنت و جماعت عندنده ظلمه دن و شیعیلر نظرندده « معاذالله  
تعالی » کفره دن معدود اولدقلری مصدق و آیتك حکم منیفی داعینک دعوتنه  
اجابت موجب اجر و ثواب و عدم اجابت باعث الیم عذاب ایدوکنه مبنی امویله رده  
هیچ بر صورتله شمولی اوله میه جغندن حضرت صدیقه انحصار حکم منیفی  
بو محاکمه ایله ده محققدر .

— ۳ —

« و عد الله الذين آمنوا وعملوا الصالحات ليستخلفنهم في الارض كما استخلف  
الذين قبلهم ولم يكن لهم دينهم الذي ارتضى لهم وليبدلهم من بعد خوفهم امناً  
يعبدوني لا يشركون بي شيئاً »

محدثیندن ابن ابی حاتم تفسیرنده عبدالرحمن بن عبد الحمید المهریدن  
استخراج ایتدیکی روایت کوره بو آیت کریمه حضرت صدیق ایله حضرت  
فاروق اعظمک خلافت و ولایتلرینی ناطقدر .

حضرت فخر رازی دخی تفسیر کیرنده بو آیت جلیله ائمه اربعه نك یعنی  
خلفای راشدینک امامته دلالت ایتدیکنی توضیح ایده یور . چونکه حق تعالی  
حضرتلری بو آیت کریمه ده فخر رسالت افندمز حضرتلرینک زمان سعادت  
نبویه لرنده حاضر و موجود اولانلردن ایمانی بولنان و اعمال صالحه اجرا ایدنلره  
استخلاف ارضی وعد ایتمشدر .

آیت کریمه ده موعود اولان استخلاف ارض رسالتپناه افندمزدن صکره کی

مسلمانان را جمع کرد . ارضه استخلافك فخر كائنات افندمن حضرت تندرند  
صكره اولمى لزومى يك بدیدر . حال بوكه علیه الصلاة والسلام افندمن  
حضرت تلى خاتم النبیین عنوان علویسیله معنون اولدقلى جهته كندولرى  
استخلاف ایدهك پیغمبر اولمیدقندن واوله مبه جفندن استخلافك نبوته حمل  
ایدلمى امكانسزدر . بناءً علیه استخلافدن مقصد امامت و خلافت اولدیغنده  
اشباه ایديله من . رسالتیاء افندمن حضرت تندرند صكره بوآیت کریمه نك وصف  
وتعریف استدیكى خلافت ایسه حضرت صدیق اكبر وفاروق اعظم و عثمان  
رضی الله تعالی عنهم حضراتنه مخصوص ومنحصردر . چونكه فتوحات عظیمه  
و حصول تمكین و ظهور دین و اكال امنیت خلفای ثلاثه مشارالیه هم حضراتی  
زماننده وقوعه كمش ومسلمانلك تملك ارض ایتلى فتوحات و استیلاى  
بوخلفای عظام زمانلرنده حاصل اولمشدر .

امام على افندمن حضرت تلى زماننده خلافته قارشو وقوع بولان منازعه لردن  
و محاربات داخلیدن طولانی كفار ایله محارباته و خرجاً فتوحاته میدان  
بوله مامشدر . اراضی اسلامیه بر شى علاوه ایده مامشدر . بوكا مبنی آیت  
کریمه نك حکم جلیلی فخر كائنات افندمنك خلفلى اولان وزمانلرنده فتوحات  
كلیه ظهور ایتسیله مسلمانلى ارضه تملك و استخلاف ایتدین خلفای ثلاثه  
مشارالیه هم حضراتیدر . بوضورتله شوآیت جلیله دخی خلفای راشدین حضراتك  
وبونك اساسی بولان حضرت صدیقك صحت وحقیقت خلافتلرینى مثبتدر .

— ۴ —

« للفقراء المهاجرين الذين اخرجوا من ديارهم واموالهم يبتغون فضلا من الله  
ورضواناً وينصرون الله ورسوله اولئك هم الصادقون » آیت کریمه سیدر .  
بوآیت کریمه اموال غنایمك مهاجرینه مخصوص اولان قسمنه عائددر .  
ایادی كفاردن بالا محاربه ایادی مسلمینه داخل و واصل اولان اموال  
منقوله وغیر منقولیه ( فی ) اطلاق اولنور .

فی اموال غنائمك تعریف اولنان بر قسمیدر .  
 اموال غنائم اساساً ایکی قسم اولوب برنجیسی بالمحاربه اخذ و استیلا اولنان  
 اموال منقوله و غیر منقوله در . بوکا اموال غنائم دینلور . ایکنجیسی بلا محاربه  
 دشمن طرفندن مسلمانلره ترك اولنان و یا بدل صلح اولق اوزره ویریلان  
 اموال منقوله و غیر منقوله در که اموال غنائمك بو ایکنجی قسمنه لسان عربده  
 ( فی ) دینلور .

« فی » فائقی صیغهسندن مشتقد . رد و رجوع معناسنده در . اموال  
 غنیمتک بیان و تعریف اولنان ایکنجی قسمنه اطلاق اولمنی او اموالک دشمن  
 جهتندن مسلمانلر جهته کچمسندن رد وارجاعندن ایلرو کلمشدر .  
 حاصلی آیت کریمه « فی » قسمندن اولان اموال غنائمك مسلمانلره صورت  
 تقسیمنی آمر و موضحدر . بو قسم اموال غنائم مملکتلرندن چیقاریلان  
 و امواللرندن محروم براغیلان و جناب حقندن فضیلت و رضوان امل و انتظارنده  
 وذات واجب الوجودک و رسولک نصرتی خدمتنده بولنان فقرای مهاجرین  
 ایچوند . او مهاجرلری حق تعالی حضرتلری بو آیت کریمهده صادق اولق اوزره  
 تعریف و توصیف بیورمشدر . مهاجرین کرام حضراتی اجماعاً حضرت  
 صدیقه « خلیفه رسول الله » دیمکده ایدیلر . حضرت صدیقه « خلیفه رسول الله »  
 دیدکلری مجمع علیه اولق اوزره ثابتدر . مهاجرینک صادق اولدقلری ده بو آیت  
 کریمهک حکم جلیل ایله ثابتدر . ششو حالد اشبو آیتک حکم منیفی حضرت  
 صدیقک صدیقیتهده صحت خلافتنده دلیل و حجتدر .

« اهدنا الصراط المستقیم صراط الذین انعمت علیهم » آیت جلیله سیدر .  
 فخر المفسرین فخر الدین رازی حضرتلری خلافت حضرت صدیقک صحتنی  
 بو آیت کریمهدن دخی استنباط ایتشلردر .



صراط مستقیمه هدایت طلبنده و آرزوسنده بولنانلر اللهک نعمته مظهر  
اولانلرک طریقته هدایتی استرحام ایده یورلر دیکدر .

اللهک نعمته مظهر اولانلر ایسه « اولئک الذین انعم الله علیهم من النبیین  
و الصدیقین و الشهداء و الصالحین » آیت کریمه سنده ذکر و بیان اولنمش  
اولانلردر .

مظهر نعمت سبحانیه اولدقلری بو آیت کریمه ده تصریح بیوریلان انبیای  
عظام صدیقین کرام شهدا و صالحین کبی صنوف کرام اربعه نلک ایکنیجیی  
« صدیقین » درکه ابابکر صدیق رضی الله تعالی عنه حضرتلری ده رئیس صدیقین  
اکبر صدیقین اولدقلرنده شبهه یوقدر . شو حالده صراط مستقیمه طلب هدایت  
ایدن ره یوان طریق استقامت حضرت صدیقک و سائر صدیقین کرامک سالک  
اولدقلری طریق هدایتی طلب و استرحامه مسارعت ایدرلر . اکبر حضرت  
صدیقک خلافت و امامتی حق و صواب اولیوبده معاذ الله تعالی خلافتی غاصب  
و بناءً علیه ظالم اولسیدی انک طریقته اقتدا جائز اولماق لازم کلوردی .



## مبحث

۵

حضرت صدیقك خلافتی مثبت اولان احادیث جلیله<sup>۱</sup> نبویه کثیر ایسه ده  
بر قسمی بوراده بیان وتوضیح اولنور .

— ۱ —

فخر المحدثین شیخ بخاری و شیخ مسلم حضراتی جبرین بن مطعم رضی الله  
تعالی عنه حضرتلرندن روایت آتیه بی استخراج بیورمشلردر .

جبرین مطعم . بر مصلحت ضمنتده حضور فائض النور حضرت نبویه شرف  
مثوله نائل اولان بر قادین افاده<sup>۲</sup> حال ایتدکدن صکره نبی<sup>۳</sup> محترم و مکرم افندمن  
حضرتلری تکرار نزد معالی وفد حضرت رسالتپناهی<sup>۴</sup> به کلمی لزومی او قادینه  
امرو فرمان بیورلدی . قادین « تکرار کلوبده سزی بوله مزسه<sup>۵</sup>م » دیه وفات  
جلیل حضرت نبویه<sup>۶</sup> به اشارت ایتدی . کندولرینی بوله مزسه حضرت صدیقه  
مراجعت ایتسی لزومی اراده بیوردیلر .

محدثندن ابن عساکر ابن عباس رضی الله تعالی عنهما حضرتلرندن بو  
روایتی شو صورتله استخراج ایتمشدر .

بر مصلحت ضمنتده حضور معالی موفور رسالتپناهی<sup>۷</sup> به کلن بر قادینه بشقه  
وقت عودت و رجوع ایتسی لزومی امر و فرمان بیورلمسینه<sup>۸</sup> مبنی قادین « عودت  
ایدوبده سزی بوله مزسه<sup>۹</sup>م » دیه وفات عالی<sup>۱۰</sup> حضرت نبویه<sup>۱۱</sup> به اشارت ایتدی .  
« کلوبده بنی بوله مزسه<sup>۱۲</sup>ك بندن صکره خلیفه اولان حضرت صدیق نزدیک<sup>۱۳</sup>کل »  
امرینی ویردیلر .

— ۲ —

محدثین ابو القاسم بغوی عبدالله بن عمر رضی الله تعالی عنه حضرت تدرندن  
شو حدیثی روایت ایتمشدر.

عبدالله بن عمر . علیه الصلاة والسلام افندمن حضرت تدرندن ایشتمدم که  
بندن صکره اون ایکی خلیفه اولور . ابوبکر آزمدت دوام ایدر .  
بوحدیث شریف طرق عدیده دن روایت اولمش و علمانک تاویلات  
کثیره سنه مهم بر مبنا تشکیل ایتمشدر خلافتک مدتیه و احوال سائر سنه تعلق  
ایدن شو تاویلات و ایضاحات و دوچار اولدیغی اختلافات رساله مزک صددی  
خارجنده اولایغندن یالکیز حضرت صدیقک خلافتنی مؤید اولان فقره سیاه  
اکتفا قلمشدر .

— ۳ —

محدثین احمد و ترمذی و ابن ماجه نك استخراج وینه محدثین جناب  
حاکمک حذیفه رضی الله تعالی عنه حضرت تدرندن تصحیح ایتدکبری حدیث  
شریفده « بندن صکره ابوبکر و عمره اقتدا ایدیکیز » امر و فرمانی صادر اولمشدر .  
محدثین طبری جناب لرینک « ابی الدردء » رضی الله تعالی عنه حضرت تدری  
حایتندن و حاکمک ابن مسعود رضی الله تعالی عنه حضرت تدری حدیثندن و احمد  
ترمذی ایله ماجه و ابن حبان دخی حذیفه رضی الله تعالی عنه حدیثندن روایت  
و تصحیح ایتدکبری بوحدیث شریفک مال منیفی وجه آتی اوزره روایت  
بیورلمشدر :

« بن سزکله برابر نه قدر قاله نجفی بیلیمورم بندن صکره ابی بکر و عمره  
اقتدا و عمارک هدایتنه تمسک ایدیکیز ابن مسعودک سویلدکارینه اینانکیز »  
امام ترمذی ابن مسعود رضی الله تعالی عنه حضرت تدرندن و « رویانی »

دخی حذیفه رضی الله تعالی عنه حضرت تارندن و ابن عدی انس حضرت تارندن  
بو حدیث شریف وجه آتی اوزره روایت اولمشدر .  
« بنندن صکره ابی بکر وعمره اقتدا وعمارك هداسیه اهتا ایدیکز ابن  
مسعودك عهدنی طوتکنز » .

— ۴ —

رئیس المحدثین حضرت شیخ بخاری و جناب مسلم ابی سعید الخدری رضی الله  
تعالی عنه حضرت تارندن روایت آتی بی نقل ایتمشدر:  
ابی سعید الخدری . رسول اکرم صلی الله تعالی علیه وسلم افندمن  
حضرت تارینك ایراد ایتدکری بر خطبه ده « جناب حق جل شانہ حضرتلری بر  
عبدی دنیا ایله جوار جلیل سبحانیلرندن برینی اختیار ایتدک اوزره تحیر بیوردی .  
او عبد دخی جوار عالی الوهیتی دنیا به ترجیح ایلدی . » فخر کائنات افندمن  
حضرت تارینك خطبه ده او قودق لری شو حدیث شریف اوزرینه ابوبکر صدیق  
رضی الله تعالی عنه حضرتلری آغلامغه باشلا دیلر . « بابالرمزی آنالرمزی سکا  
فدا ایدرز » دیدیلر . بو اخبار جلیل نبوی به فارشو حضرت صدیق کړك  
آغلامسنه وکړك افاده واقعه سنه تعجب ایتدك . حال بوکه دنیا و عقبا دن برینی  
ترجیح ده تحیر بیوریلان عبدك فخر کائنات افندمن حضرتلری اولدینی تحقیق  
قلندی . بناءً علیه امر جلیل نبوی بی تفهمده اعلممن حضرت صدیق اولدیغی  
تبیین ایتدی . سبب خلقت عالم صلی الله علیه وسلم افندمن حضرتلری ینه  
بیوردیلر که « بنی محبتیه مالیه اك زیاده متدار ایدن ابابکر در . اللهمذا باشقه  
خلیل اتخاذا ایتسیدم ابابکر ی خلیل اتخاذا ایدرم . لکن اخوة ومودت  
اسلامیه من موجوددر . ابابکر قپوسندن بشقه بتون قپولر سد اولمشدر .  
دیگر بر لطفنه کوره « مسجده ابی بکر قپوسندن بشقه بر قپو بر اقلما ملیدر . »  
عباده بن احمد دن وقوع بولان بشقه بر روایت کوره « ابوبکر صاحبمدر غارده  
مونسمدر مسجده ابوبکر قپوسندن بشقه بتون قپولری باغلا یکنز » حضرت



بخاریدن وقوع بولان دیگر روایت کوره « خلق ایچنده نفسیه مالیه ابن ابی قحافه دن زیاده بنی متدار ایدن یوقدر . اگر خلیل اتخا ایتسه یم ابی بکری خلیل اتخا ایدردم . لکن خلة اسلام افضلدر . بومسجدده ابوبکرک قبوسندن بشقه بتون قبولری بدن باغلایکز » ابن عدی جنابلرینک روایت کوره « مسجده شارع وواصل اولان بوقبولردن ابابکرک قبوسندن بشقه سنی باغلایکز » حاصلی بو حدیث شریفک طرقی کثیردر . طرق وارده سی جمله سندن حذیفه و انس و عائشه رضی الله تعالی عنهمک وابن عباس و معاویه بن ابی سفیان رضی الله تعالی عنهم حضراتنک روایتلریدر . بو احادیث شریفهده حضرت صدیق خلافتنه اشارت جلیله نبویه واقع اولدیغنه علما قائل اولمشلردر . چونکه مسجد نبویه بعض قبولر آچلمشیدی آنلرک سدی مقتضای امر جلیل رسالتپناهی ایدی . خلیفه نک مسجد قربنده بولنمی لازم اولدیغنه مبنی یالکز حضرت صدیق قبوسی استثناء آچیق براغیلوب دیگر قبولرک باغلا نمی حقنده کی امرلری انک خلافتنه دلالت ایدر .

— ۵ —

حاکم اخراج و حضرت انس دن تصحیح ایتدیکی روایتدر :  
حضرت انس . کندولردن صکره صدقه (۱) لرینی کیمه تسویه و اعطایتملری لزومنک مفخر موجودات افندمن حضرتلردن صور مق ایچون « بنو مصطلق » بنی مأمور واعزام ایتدیلر . حضور فیوضات موفور حضرت نبویه شرف مثوله مظهر اولدم . بنی مصطلقک ذات اکل الصفات حضرت رسالتپناهی لردن صکره صدقه لرینی کیمه ویرملری لازم کله جکنی عرض واستیدان ایتدم . « صدقه لرینی ابوبکره ویرملری لزومنی » امر و فرمان بیوردیلر .  
بوحدیث شریف حضرت صدیق خلافتنه دائر عادتاً نص قاطعدر

چونکه اموال امیریه دن اولان زکاة و صدقاتک استیفاسنه و قبضنه متولی انحق  
خليفة وامام اوله بيلور .

— ۶ —

صحيح مسلم کتاب شريفنک مؤلفی . امام مسلم حضرتلری . ام المؤمنین  
حضرت عائشه رضی الله تعالی عنہان استخراج ايتديكى روايتدر :

ام المؤمنین . عليه الصلاة والسلام افندمن حضرتلری خسته لقلرنده بکا  
بوامری ویردیله . « پدریکى برادریکى بکا چاغرکه برمکتوب یازیم . بن  
قورقارم که ارزوایدن بر آرزوکش اولویت افاده سنده (۲) بولنور . حال بوکه  
جناب حق و مسلمانلر ابا بکردن بشقه سنی ایسته مزله . »

امام المحدثین حضرت احمدایله بشقه لری دخی طرق سائردهن بو حدیث  
شریفی حضرت عایشه رضی الله تعالی عنہان استخراج ایتمشلدر .

بو طریق لک بک بعضیسنده مشار الیه حضرتلری شو صورتله روایت ایتدکلری  
کورنمشدر .

ام المؤمنین . مرض موتنده فخر کائنات افندمن حضرتلری « بکا عبدالرحمن  
بن ابی بکری چاغرکز ابی بکر ایچون بر کتاب یازیم . اکا هیچ بر فرد اختلاف  
ایتمسون » امرینی ویردیله . متعاقباً « براق معاذ الله تعالی مسلمانلر ابی بکر  
حقنده اختلاف ایتزلر » بیوردی .

عبدالله بن احمد دن وقوع بولان دیگر بر روایت کوره « یا ابابکر جناب حقده  
مؤمنلرده سنک علیهمکده اختلافی ایسته مزله » دیه فرمان بیورمشلدر .

— ۷ —

رئیس المحدثین شیخ بخاری و شیخ مسلم حضرتانک « ابی موسی الاشعری »  
رضی الله تعالی عنه حضرتلردن استخراج ایتدکلری راویتدر .

(۲) امر خلافته حضرت صدیق دن اولی بولنه جفنی ادعا ایدنلرده بولنور دیمکدر .

ابوموسی الاشعری . رسول اکرم صلی الله علیه وسلم افندمن حضرت تلی  
خسته لیدیلر . مرضلری مشتداولدی . « ابابکره امرایدیکز خلقه نماز قلدیرسون »  
امرینی ویردیلر . حضرت عائشه رضی الله تعالی عنها بوامر جلیل نبوی به قارشو  
« یارسول الله ابابکر رقیق بر آدمدر . مقام قدسیت اتسام رسالتپناهیلرند  
طورمغه وخلقه نماز قلدیرمغه استطاعتی یوقدر » دیمسلیه علیه الصلاة والسلام  
افندمن حضرت تلی « ابابکره امرایت خلقه نماز قلدیرسون » امرینی تکرار  
بیوردیلر . بوایکنجی امرعالی نبوتپناهی به مقابل حضرت عایشه ینه اولکی  
افاده ومدافعه ینی بیان وایراد ایتسمیله « ابابکره امرایت خلقه نماز قلدیرسون . سر  
حضرت یوسفک صاحب لری سکز » دیه امرسابقلرینی مع التوبیخ تکرار ایتدیلر .  
بوامرقطعی به مبنی ابابکر حضرتلرینه کلوب تبلیغ فرمان رسالتپناهی ایلدیلر .  
حضرت صدیق دخی امروفرمان نبوی موجبجه نبی اعظم افندمن حضرتلری  
حیاتده ایکن بالوکاله خلقه نماز قلدیردی .

حضرت عایشه . نبی بوبابده کثرت مراجعتیه مجبور ایدن شی فخر کثرات  
علیه اکل التحیات افندمن حضرتلرندن صکره مقام عالی نبوتپناهیلرند قائم  
اوله جبق ذاتک ابدیاً توجه عامیه مظهر اوله میه جفی مطالعسی ایدی .  
مقام قدسیت اتسام نبوتپناهیلرند هر کیم قائم اولورسه آکا قارشو خالق  
اظهار تشام ایده جکلرینی ظن ایدردم . بو ملاحظه ینی اماتک ابابکرندن  
تحویل وانصرافی آرزو ایتمش ومراجعتمی تکرار ایشیدم .

« زمعة » رضی الله تعالی عنها حضرتلرینک روایتیه کوره مفخر موجودات  
صلی الله علیه وسلم افندمن حضرتلری حضرت صدیق طرفندن ادای نماز اولتمسنی امر  
ایتدکلرند حضرت ابابکر غائب وغیر موجود ایدی . بناءً علیه حضرت عمر تقدم  
وامامته مباشرت ایتدی . حضرت فاروقک سسنی استماع بیورمش اولان علیه الصلاة  
والسلام افندمن حضرتلری « لا . لا . لا . جناب حقده ، مسلمانلرده ابی بکردن  
بشقه سنی ایسته مزلر . ابوبکر خلقه نماز قلدیرسون » بیوردیلر .

ینه « زمعة » رضی الله تعالی عنها حضرتلرندن وقوع بولان دیکز برروایتیه

کوره « حقیقکز خلقه نماز قلدرمسنی ابا بکره سولیکز » دیه تلقی ایتدیکی امر جلیل رسالتپناهی اوزرینه حضور فیوضات موفور جناب نبویدن حیققارق حضرت صدیق اوراده بولمدينی و حضرت فاروقی جماعته برابر قپوده کوردیکی جهته نماز قلدرمسنی حضرت عمره تبلیغ ایلدی . وقتا که حضرت عمر نمازه مباشرت ایتدی . سسی یوکسک اولدیغندن تکبیرینی فخر کائنات افدمز حضرتلری ایشیدیلر . بوکا مبنی « جناب حقدده ، مسلمانلرده ابا بکر دن بشقه سنی ایسته مز لر . جناب حقدده مسلمانلرده ابا بکر دن بشقه سنی ایسته مز لر . » بیوردیلر .

دیگر برروایت کوره حضرت عایشه نك مراجعتی رسالتپناه افدمز حضرتلری قبول بیورمیبوده حضرت صدیق نماز قلدرمسنی تکرار امر ایتدیکی زمان عایشه حضرتلری بالذات مراجعتی تکرار دن تحاشی ایدهرک زوجات طاهرات نبویه دن وامهات مؤمنیندن حضرت فاروق اعظمک کریمه محترمه لر ی بولان حضرت « حفصه » رضی الله تعالی عنهایه حضرت عمرک خلقه نماز قلدرمسی چون عرض وافاده ایتسی لزومنی اخطار ایتدیلر . حضرت عایشه نك بو اخطارینه مبنی حضرت حفصه نماز قلدرمقی ایچون فاروق اعظمه امر ویرملرینی رسالتپناه افدمز حضرتلرینه عرض وافاده ایتدی . فخر کائنات افدمز حضرتلری حضرت حفصه نك افاده سنی قبول ایتماکله برابر غضبناک اولدقلری جهته « انتن ویا انکن ویا لانن صواحب یوسف مروا ابا بکر » بیوردیلر .

سبب خلقت عالم صلی الله علیه وسلم افدمز حضرتلرینک مرض موتنده حضرت صدیقک خلقه نماز قلدرمسی حقنده اولان امر جلیل نبوتپناهی لرینی موضع اولان اشبو حدیث شریف معلوم اولسون که متواتردر . بو حدیث شریف حضرت عایشه رضی الله تعالی عنهادن وابن مسعود وابن عمر و عبدالله زمعه و ابی سعید و علی ابن ابی طالب و حضرت حفصه رضی الله تعالی عنهم حضراتندن وارد اولمشدر .

ابن عمر رضی الله تعالی عنهما حضرتلری روایت کوره نماز قلدرمقی ایچون حضرت عمرک تکبیرینی علیه الصلاة والسلام افدمز حضرتلری استماع



بیوردقلرنده رأس مبارکترینی جبره دن چیقاردیلر و غضبناک اولدقلری خالدہ  
« ابن ابی قحافه نرہدہ در » دیہ امر و فرمان بیوردیلر .

ابابکر صدیق رضی اللہ تعالیٰ عنہ حضرتلری علی الاطلاق اصحاب کرامک  
افضلی اولدیغنه و جملہ سندن زیادہ خلافتہ احق و امامتہ اولی والیق بولادیغنه  
بو حدیث شریفک اک واضح بر صورتہ دلالت ایتدیکنی فحول علمای اسلام  
بیان ایتمشلردر .

امام ابوالحسن اشعری . مهاجرین و انصار کرام حاضر اولدقلری خالدہ  
فیخر کائنات علیہ افضل الصلاۃ افندمن حضرتلرینک نماز ایچون حضرت صدیقہ  
امر ویردکلری بدییات و ضروریات درجه سنده تعین ایتمشدر، جماعتہ امامت  
ایده جک ذات ایسہ او جماعتہ کتآب الہی اک ای قرائت ایتسی لزومی ده  
حدیث شریفہ وارد اولمشدر . حضرت صدیقک امامتہ امر ویرملری  
منار الہیک قرائت قرأئہ و عہ قرأئہ اقرأ و اعلم اولدیغنه دلملدر .

فیخر کائنات افندمن حضرتلرینک حضرت صدیق امامتہ ترجیح و انتخاب  
بیورملرندن اصحاب کرام خلافتہ احق اولدیغنی استدلال بیورمشلردر . بوقضیۃ  
جلیلہ دن بالاستدلال خلافتہ احق والیق اولدیغنه قائل اولان اجلہ اصحاب  
کرامدن بری فاروق اعظمدرکہ سقیمۃ نبی ساعدہدہ وقوع بولان بیعت  
اثناسندہ کی افادات و ایضاحاتی یوقارودہ محل مخصوصندہ مفصلاً ذکر و بیان  
اولمشدر .

دیگری اسماء الغائب علی بن ابی طالب حضرتتیریدرکہ بن عبد کرک  
استخراج ایتدیکی روایتہ کورہ بروجہ زیر اداء کلام ایتمشلردر :

حضرت ابوتراب . بن حاضر اولدیغ و خستہ بولمندیغ خالدہ علیہ الصلاۃ  
والسلام افندمن حضرتلری نماز قلدیزمق ایچون حضرت صدیقہ امر ویردیلر .  
مفخر موجودات افندمن حضرتلرینک دینز ایچون انتخاب و ترجیح  
بیوردقلری ذاتی بز دخی امور دنیویہ من ایچون انتخاب و ترجیح ایتدک .

زمان سعادت اقتران حضرت نبویده دخی صدیق اکبرک امامته اهلیتیه معروف اولدینی علمای اسلام طرفندن عموماً اعتراف اولمشدر .

محدثندن احمد و ابو داود و سائرلرینک سهل بن سعد رضی الله تعالی عنه حضرتلرندن استخراج ایتدکلری روایتیه کوره « عمر و بن عوف » اولادی اراسنده وقوعه کلن برقتالدن طولایی اصلاحلری ضمننده علیه الصلاة والسلام افندمز حضرتلری یا ندرینه عزیمت بیوردی . و بلال حبشی رضی الله تعالی عنه حضرتلرینه شوامری و بردی .

« یا بلال نماز وقتی حلول ایدوبده عودت ایتماش اولورسه م خلتیه نماز قلدیرمسی لزومنی ابابکره امرایت » ایکندی نمازینک وقتی حلول ایتدی . فخرکائنات افندمز حضرتلری هنوز عودت بیورمامش اولدقلرندن حضرت بالاک تبلیغ ایتدیکی امر جلیل نبوییه توفیقاً حضرت صدیق ایفای وظیفه امامت ایلدی .

نماز ایچون امامت مادهسندن خلافته احقیق و اهلیتک استدلالی بحثیه کلنجه اهل و عالم اولان امامک نصب و تعیینندن مقصد حقیقی و ذاتی شعائر دینه نک اقامه و اجراسیدر، واجبات شرعیه نک ایفاسیدر، محرماتک ترکیدر ودها بونوره مماثل پک چوق امور دینه نک رؤیتیدر . امامت عظمی ایسه امامت دینه اولدیغندن رسالتپناه افندمز حضرتلرینک امامت عظمی ایچون حضرت صدیقی انتخاب و ترجیح بیورملری امور دنیویه ده اهلیتنی مثبت اولدیغنه اجماع امت حصولنه واسطه و سبب اولمشدر .

— ۸ —

محدثندن ابو سفیانک ابن جاندن انک دخی « سفینه » دن استخراج ایتدکلری روایتدر .

سفینه . مسجد قدسیت مورد حضرت نبوینک وضع اساس مصون الاندراسی اثناده علیه الصلاة والسلام افندمز حضرتلری هرکسدن اول ید

مؤید رسالتناھلیہ اسسہ برطاش وضع ایتدیله . بو طاشك ياننه برطاش  
وضع ایتسنی ده حضرت صدیقہ امرایلدیلر . حضرت صدیقك وضع ایتدیکی  
طاشك ياننه برطاش براقسنی حضرت فاروقه و آنك طاشی ياننه برطاش  
وضعی ده حضرت عثمانہ ! مروفرمان و ذوات ثلاثہ مشار الیهمك کندوسندن  
صکره خلفا اولدقلرینی تصریح و اتیان بیوردیلر .

ابوذرعہ حضرتلری بو حدیثك اسنادنده بآس اولدیغنی سویلشلدردر .  
محدثندن حاکم جنابلری دخی بو حدیثی مستدرک نام کتابنده استخراج  
ایتشدردر .

ینه محدثندن جناب بیقی دلایل نام اثرنده بو حدیثی تصحیح ایتمش  
و محدثین مشار الیهمدن بشقه محدثین سائر طرفلرندن دخی حدیث شریف  
مباحوث بیان و ایضاح قلمشدد .

بعض علما بو حدیث شریفده صرہ سیله وضعی امر و فرمان بیوریلان  
طاشلك اساس بنایه ترتیب محرر موجبجه وضعی حقنده کی امر جلیل  
قدسیت دلیل رسالتناھلی بعدالوفات خلفای راشدینك مرقد مبارکارنده  
ظہور ایدن ترتیبه محمول اوله بیله جکنی سویلشلدردر و اول صورتله تأویل  
ایلمشلسرہده مطاف قدسیان اولان مرقد غفران مورد فخر کائنات افندمزك  
جوار مسعدت مدارنده یالکیز شیخین معظمین حضرتاتك قبر شریفلری  
بولنوب حضرت عثمانك مدفن مبارکلرینك اوصریه تصادف ایدہ مامسی و بشقه  
برمحلده بولنمی بوتأویلی رد و ابطال و ترتیب مباحوثك خلافت و امامت صرہ سنه  
اشارت و دلالتی درجہ وضوحه ایصال ایدہ یور . بونکله برابر حدیث شریفك  
آخرنده کی عبارہ ترتیب واقعك خلافت ترتیبی اولدیغنی تصریح بیورمشدد .

محدثین کرامدن دارقطنی و خطیب وابن عساكر حضرتاتك امام علی  
رضی اللہ تعالی عنہ حضرتلرندن استخراج ایتدکوری حدیثدر .

حضرت ابوترابك روايت ايتديكي حديث « سنى تقديم ايجون اوچ دفعه جناب حق حضرتلرينه نياز ايتدم . واجب تعالى حضرتلرى ابا بكرى تقديم ايتدى » مآلندهدر .

## ۱۰

محدثين كرامدن حضرت بزار اتي برسندله امين الامه لقب على قدسيسته مظهرت سعادته نائل اولان ابو عبیده بن الجراح رضى الله تعالى عنه حضرتلردن شو حديث شريفى روايت ايتمشدر :

ابو عبیده حضرتلرى . عليه الصلاة والسلام اقدمن حضرتلرى بيورديلر كه « دينكيزك بدايتى نبوت و رحمتله باشلادى . اندن صكره خلافت و رحمت اوله جقدر . »

بو حديث شريفدن حضرت صديقك صحت خلافتى استدلال اولمشدر . چونكه نبوتدن صكره كى خلافتك رحمته مقرون اولدينى فرمان بيوريله يور . معاذ الله تعالى نبوتدن يعنى ارتحال على نبويدن صكره تأسس ايدن خلافتكه حضرت صديق ايله انك خلافتنه تفرع ايدن حضرت فاروق و حضرت عثمان خلافتلريدنر غير محق و غير مشروع اولسه او خلافتلره رحمتك اقتران ايتمى غير ممكن اولديغندن خلفاى راشدين مشار اليهمك خلافتلرى رحمته مقرون اولان خلافت اولمسيه صحت و حقيقتلرى بو حديث ايله صورت قطعيده ثابتدر .

يوقاروكى اوچنچى دردنچى بشنچى ميخلرده ويريلان ايضاحات خلافت و امامت اسلاميه نك صورت تأسسى و خليفه اول اولان حضرت صديق رضى الله تعالى عنه حضرتلرينك صحت خلافتى هم اجماع امته هم ده آيات جليله قرآنيه واحاديث شريفه نبويه دلالتيله ثابت اولمش و بناء عليه تأسس خلافت و امامت ارکان اربعة دينك اهملردن بولنان كتاب و سنت و اجماع امته اقتران ايتمشدر .

حضرت صدیقك خلافت جلیلہ لری بوصورتله اساس دینه من كل الوجوه داخل اولدقن صكره مشار الیه حضرت تدرینك حضرت فاروق اعظمی استخلاف ایتملرینه واستخلافك دخی عموماً اصحاب كرام طرفندن بلا اعتراض قبول اولمسنه نظراً خلیفه وامامك موافق مصلحت كوره جـكـی و آرزو ایدہ جـكـی ذاتی ولی عهد انتخاب وتعیین ایتمكہ حق وصلاحيـت مشروعـسی دخی اركان اربعہ دیندن اولان اجماع امته كذاك اقتـران ایـشـدر .

خليفةـكـ نصب وتعیین ایـتـدیـكـی ولی عهدك مقام مقدس خلافتـه اجـلامـی و كندوسنه اطاعت اولمسی اجماع امته وجایب دینهـدن وشو وجوبك اساسی ده بـروجه محرر حضرت صدیقك حضرت فاروق ولی عهد ایتمسـیـله و كندوسـنـه عـمـوماً بیعت قانمسـیـله ثابت اولدیغـی كـی خلیفه وامامك ولایت عهدی برذاته منحصر ایتمهرك صرہ سیه برقـاچ ولی عهد تعین ایتمـی و یاخود ایچلرندن برنی انتخاب ونصب ایتمك اوزره اشخاص عیدیه تفویض ایتمـی دخی وجایب شرعیه دندر . چونكه حضرت فاروق ولایت عهدی برذاته حصر وتخصیص ایتمدیلر . ایچلرندن برنی انتخاب وترجیح ایتمك اوزره التی ذاته ولایت عهدی تفویض بیوردیلر . ذوات مشارالیهـم حضراتی بونلردر :

حضرت عثمان ، حضرت علی ، عبدالرحمن بن عوف ، زبیر بن عوام ، سعد بن ابی وقاص ، حضرت طلحه . ذوات مشار الیهـمك انتخاب وترجیح ایتمكـلری حضرت عثمانه عموماً بیعت و اطاعت اولندی وهیچ برفرد طرفندن مخالفت اولمندی . بوصورتله ولایت عهدك اشخاص عیدیه خلیفه طرفندن تفویض اولمسی ماده سی ده اجماع امته اقتـران ایـشـدر .





بورایه قدر ویریلن ایضاحات ایله ثابت اولمشدرکه امامت و خلافت اسلامیه دین مبین احمدینک الهمم اساسلرینه مبتیدر .

ینه شو ایضاحات ایله ثابت اولمشدرکه تأسس ایدن خلافت اسلامیه مشورت و اجماع امت نتیجه سیدر . خلافت اساساً مشورتله مؤسس اولدینی و ایلك خلیفه نك ایلك امر و نطقنده دخی « کوتیلک ایدرسهم بنی طوغر ولدیکز » دیه امر مشورتك ملت اسلامیه ده تأسس حکومتله برابر دیناً تأسس ایتمش اولدینی ثابت اولور .

خلیفه اوله جق ذوات ایچون وجودی شرعاً مقتضی اولان صفات لازمه کتب سیاسیة دینیّه ده محرر اولوب اوصفاك مفردتی بیان و توضیح رساله مركز مقصدی خارجنده در . خلافتك بالکمز صور انتقالیه سی حقنده اجماع امته اقتران ایدن مقررات و معاملاتدن برنبذه بحث ایتك « اسلامده خلافت » نامنده کی بوائزك مقصدی خارجنده صایله مر .

خلفای اسلام شروط معتبره و صفات لازمه نی حائز اولانلری تخلیف ایتدکری یعنی برولی عهد نصب و تعیین ایلدکری تقدیرده شرعاً جائزدر . بوجواز شرعی بشنجی مبحثك نهایتلرنده توضیح اولندیغی وجهله اجماع امت انعقاديله ثابتدر و صحیحی متفق علیهدر .

نصب ولی عهد خصوصنده حاصل اولان اجماع امت و اتفاق مسلمین ایکی وقعه نك صورت جریانه و همیچ برطرفدن دوچار انکار و اعتراض اولمامنه مستنددر .

برنجی وقعه برنجی خلیفه اولان حضرت صدیق اکبرك فاروق اعظم امام عمر حضرتلرینی ولی عهد نصب ایتسیدر .

ایکینچی وقعه حضرت عمرؓ حین وفاتنده ایچلرندن برینی انتخاب ایتک اوزره ولایت عهدی آلتی ذاته تودیعی ایلسیدر. بوایکنجیسنه مسئله شورادنیلورکه دین اسلامده جریان ایدن وقایع عظیمه ومهمه واحکام شرعیه وفقهییه صرهنه کچیش امور دندر.

خلیفه وامام مشروع طرفندن ولی عهد نصب وتعیین اولندیغی تقدیرده حنی تغیر وتبدیل ایتدیکجه او ولی عهدی عزل ایله یرینه دیکرینی نصب وتعیینه خلیفنهات حق وصلاحیتی اوله مز. نته کیم بالاتخاب خلیفه نصب اولان ذاتی خلافت ایچون انتخاب ایدنلر کندوسنه بیعت ایتدکدن صکره آنی عزل وتبدیله حق وصلاحیتلری اولمادیغی واولامیه جنی کبی خلیفنهات دخی ولی عهدی عزله حقی اوله مز. هر حالده ولی عهدک نصب وتعیینندن صکره وزرا، امرا ولایه سائر کبی خلیفه طرفندن عزل ایدملری شرعاً ممکنمزدردر.

چونکه حضرت خلیفه وزرا، امرا، ولایه وسائر مأمورین دولتی کندی حقی ورؤیتی شخصنه مودوع وموکل اولان امور وخصوصی رؤیت وایفا ایتک اوزره نصب وتعیین ایتیش اوله جغندن هر زمان آنلری عزل ایتمی کندی حقوقی مقتضیاتندردر. فقط نصب وتعیین ایلدیکی ولی عهد کندی حقوق شخصه سنی ووظائف مأموریتی رؤیت ایچون اولیوب عمو مات ایچون اولدیغندن برکره نصب وتعیین اولندقدن صکره آنی عزل وتبدیله صلاحیتدار اوله میور. حکم شرعی ایشته بوندن عبارتدر.

دیانت جملیه اسلامیده وجایب شرعیدن واساس دین مقتضیاتندن اولان خلافت بروجه محرر انتخاب صورتیله تأسس ایتدیکی جهته حکمدارلری انتخاب ایله تعیین ایدن بعض حکومت مشروطه نك اصول وعاداتنه وحقی رئیس انتخابی آرای عمومیهیه تابع اولان حکومتلرک اصولنده مخالف دکلدردر. حضرت صدیقک انتخابی کبی.

اراده یالکز بر فرق مهم واردردر. اوده حکمدار ورئیس حکومت انتخاب وتعیینی معتاد اولان حکومتلرده حکمدار ورئیسک موقت ومدت معینه ایله

مدتی محدود اولدیغه مقابل امامت و خلافت ایچون انتخاب اولنهجق ذواتک غیر موقت ومدت معینه ایله غیر محدوددر. فقط احوالی تغیر وتبدل ایدنجه عزل وتبدیلده جائزات شرعیه دندر .

ایلاک خلیفه نك امام عمر حضرتلرینی ولی عهد نصب ایتدیکی وبوکاده اجماع امت حاصل اولدینی جهته آراء عمومیهیه مراجعته محتاج اولمقسزین خلیفه ضرفندن توجیه ولایت عهد صورتیهده امام و خلیفه نصبی جائزدر و اجماع امتی حائزدر حضرت عمرک خلافتی کی .

آرای عمومیهیهده مراجعت اولمقسزین و امام و خلیفه طرفندن شخص واحدک ولی عهد نصبی دخی بولمقسزین خلیفه و امامک اشخاص معدوده آراسنده ینه او اشخاص معدوده طرفندن ایچلرندن برینی انتخاب ایتلری اصولی ده مشروعدر. و امام عمرک بوحرکتی اجماع امته مقروندر. حضرت عثمانک خلافتی کی .

دیك اولورکه خلافت و امامت دینه وتشکیل حکومت اسلامیه ایچون هانکی امر وجهت موافق مصلحت عامه اولورسه او اصولک اتخاذه بزجه جواز دینی و شرعی موجوددر .

خلفای راشدین رضوان الله تعالی علیهم اجمعین حضراتندن صکره سبط جلیل حضرت نبوی ، نجل نجیب حیدری امام حسن رضی الله تعالی عنه حضرتلرینک خلافتدن کف ید ایتلریله و شروط مخصوصه ومعلومه دائره سنده معاویه حضرتلرینه بیعت ایللریله امر خلافت خاندان اموییه و خاندان عباسیه طرفدارلری جانبندن وقوع بولان محاربات شدید و خونریزانه نتیجه سی اوله رق خلفای اموییه نك مغلوبیت قطعیه سیله آنلردن صکره ده خلفای عباسیه و خاندان جلیل العنوان آل عثمان حکمداران ذیشانندن سلطان سلیم اول طاب ثراه حضرتلری زماننده صو ک خلیفه عباسی اولان ذاتک بر ریاست روحانیه درجه سنده قالان خلافته نهایت ویرلمسیله ده حکومت اسلامیه وخزانة رسمیه نك مقامی خاندان معالی نشان عثمانیده تقرر ایتشددر .

کرك امويلىر كرك عباسيلىر زماننده خلافتك افراد خندانہ انتقائى على الاكثر اصول شرعيہ دائرہسندہ خليفہ اولان ذاتك ولى عهد نصب وتعيين ايتسيلاه واقع اولمش وحمداً ثم حداثاً سلاطين عظام عثمانیہ ولایت عهد مادۀ مهمۀ فوق العادہسنی ده بر اصول مخصوصه وقاعدۀ سالمۀ معینیه ربط ایله عباسیلىر، امويلىر زمانلرنده انتقال خلافت مادہسندن دولایى بعضاً وقوع بولان فناقلرك او یغونسلرقلرك اوکی آلمشدر . باخصوص عصرمزده انتقال خلافت مسألهسندن تولد ایدہ یلدهك كافۀ محاذیر و ملاحظاتہ محل ومیدان قلمیہ حق درجهده اصول وراثت کسب متانت ایشدر .

وراثت سلطنت سنیہ اوتهدن بری ولى عهد اولان اکبر وارشد اولاده منحصر وبواصول محاسن شمولك لايتغير برقاعدۀ مضبوطیه مربوطیتی جهتهه عصرلردن بری فوائد ومنافع مادیه ومعنویهسی مادۀ وفعللاً اظہردر .

اخیراً نشر اولنان قانون اساسینك اوچنجی مادہسیله اصول وقاعدۀ مضبوطه وقدمه برقات دها تأیید وتأکید ایدلمش وآرتق هیج بر صورتله سوز کوتورر محل بر اقامهشدر .

معلومدرکه خلفای راشدیدندن صکره اوچ عدد خاندان خلافت تاسیس ایدوب بونلرك برنجیسی امويلىر ايکنجیسی عباسیلىر صره اعتباریله اوچنجیسی فقط حسن اداره وحسن سیاست وتمادی زمان وشوکت اعتباریله برنجیسی خاندان خلیل العنوان سلطنت سنیۀ عثمانیهدر .

واقعا عباسیلىرك خلافتی زماننده عبدالرحمن اموی اندلسده وینه عباسیلىر دورنده فاطمیلىر ونام دیگر عییدیلر آفریقاده ومصرده وادریسبیلىر اقضای غربده خلافتلر امامتلىر تشکیل ایتمشلر وخلافت وامامت نامی ویریلان بو حکومتلر عصرلرجه دخی دوام ایتمشلر سدهده بو خلافت وامامتده خلافت وامامت مشروعه نظریله باقی امکانمزددر . چونکۀ خلافت وامامت اسلامییه واحدددر . تعدد ایدہ مز . تعددی مشروع اوله مز .

سقیقۀ بنی ساعدهده مهاجرین وانصار کرام آراسنده امر خلافت وامامت

خصوصند جریان ایدن مذاکرات و مباحثات شدید و متنوعه اثنا سنده انصار کرام « منا امیر و منکم امیر » دیه خلافتک ایکی به انقسامی لزومی ادعا ایتدکلری حالده بودعوالری رد و ابطال اولتمش وارکان اربعه دیندن اولان اجماع امته اقتران ایدن امامت و خلافتک واحدیتی و تعدد خلافتک عدم جوازی بو صورتله اجماع امت و بنابرین اساس دیانت اقتضاسنددر .

بوقاعده اساسیه دینییه ابتناء دیرزکه عباسیلر علیمهنده خروج صورتیه تأسس ایتمش اولان اندلسده کی امویلر افریقا و مصرده کی فاطمیلر . اقصای غربده کی ادریسیلر ، یمنده حجازده سلطنت سنیه دن اولکی زمانده حکمفرما اولان مستقل امامتیلر حکومتیه اسلامیه اطلاق اولنه بیلورسده بونلره خلافت مشروعه اطلاقی غیر ممکندر .

خلافت اسلامیه نك اساساً تأسسنجه کی مشروعیت شرعاً و خلافت عباسیه نك سلیم اول طرفدن ختامه ایردریلوب حقوق و وظایف خلافتک خاندان سلطنت سنیه عثمانیه به عباسیلردن انتقالی دخی فعلاً ثابت اولوب الیوم مقام قدسیت اتسام خلافت خاندان معالی نشان آل عثمانده مقرردر خلافت و حکومت اسلامیه نك وجودی شرایطندن بری و فعلاً اک اهمی حصول سطوت و شوکت اولوب و شوکت و سطوت ایسه بتون حکومت اسلامیه ایچنده سلطنت سنیه عثمانیه ده بولندیغی جهتله مقام جلیل خلافت مقام سلطنت سنیه عثمانیه ایله متحددر . بوجهت شبهه سز ثابت اولدقدن صکره کره ارض اوزرنده ساکن عامه موحدین و بالجمله مؤمنین و مسلمین مقام شوکت اتسام سلطنت سنیه به اتباع و انقیاده و ایقای وظائف و اطاعته « اطیعوا الله و اطیعوا الرسول و اولی الامر منکم » آیت کریمه سنه و لایعد و لایحصا احادیث شریفه نبویه احکامنه توفیقاً مأموردرلر . کافه مسلمینک شو و وظیفه مفروضه سی مقتضیات دینییه دن و تأسس خلافت و حکومت اسلامیه احواله و قوفی اولان کافه مسلمینک تحت اعتراف و تسلیمنده بولتمق ضرورت قطعیه دندر .

بجمله خلافت و سلطنت اسلامیه وراثت مشروعه و اصول معروفه و مرعیه



دائرة سنده امير المؤمنين خليفه زوى زمين پادشاه اول مشروطيت صاحب مرحمت السلطان ابن السلطان سلطان محمد خان خامس افندمز حضرت ترينه انتقال ايتديكى وقانون اساسى اينده تآيد ايدن اصول مرعيه وراثت موجبجه ولايت عهد دخی ولى عهد مشروع سلطنت دوللو نجابتلو يوسف عز الدين افندى حضرتلرنده تقرر ايتديكى والى الابد شواصول محاسن شمول وراثت حكى جريان ايتك موافق مصالحت عموميه بولندينى جهتله بوقاعده واصوله دخی امت عثمانيه جه اجماع حاصل اولمشدر . حتى ماده تابعيت سلطنت سنيده بولميان مسلمانلرك دخی كافه ومعناً او مقام قدسيت اسام عظمايه ارتباط دينه لرى شرعاً وعقلاً ميدانده در بوارتباط دينى ومعنوى ايجاباتندندر كه هندده اقصاى شرقده والاحاصل كافه ممالك و بلاد اسلاميه ده نام نامى حضرت خلافتناهى به خطبه او قومتمده و او مقام قدسيت اسامك قدسيتها معناً اولسون سرفرو برده اطاعت و انقياد مجبوريتندن هيچ بر فرد مسلم قور تلامقده در . بوده اثبات ايدركه مقام خلافتك مقام سلطنت سنيه اولديغنه يالكز عثمانيلرجه دكل عموماً مسلمانلرجه اجماع حاصل اولمشدر .

اره صره يمنده اوفق بر دائرة محدوده ايجنده ادعاى امامت و يا خود فاسده واقصاى غربده بر حكومت و امارت طرفندن درميان اولنان دعواى خلافت ، وامامت ايجون مقتضيات دينيه دن اولان شرائطك اهمى بولنان شوكت وسطوت فعلييه نى حائز اولمديلرندن ، شرعاً و ديناً براهميتى حائز اوله مز .

دولت عايمه عثمانيه مز خلافت و امامت اسلاميه مقامه قائم اولديغى و بر حكومت مشروعه دينيه سنيه ديناً مجبور اولديغىز الماعى ايتكلكمىز و جايب دينيه مزدن بولنديغى تعريفدن آزاده ايكن سلطنت سنيه طرفندن اجكام دينيه موافق اولان اصول مشورتى اعلان ايدن قانون اساسى و مجلس مبعوثانى التزام ايجون عصرمرك مابه الافتخارى اولان محررين عثمانيه دن عطوفتلو احمد مدحت افندى حضرتلرينك طقسنان اوچ تاريخنده تأليف ايتدكلى « اس انقلاب » نام اثرنده :

« کمال اهميت له دقت اولته جق احوال دندرکه دولت عليه عثمانیه صرف بر دولت اسلامیه کې تشکل ایتمامشد (۱) » جمله سندن عبارت اولان بر فقره ایله خلافت جلیله اسلامیه و سلطنت سنیه عثمانیه حقنده غریب و عجیب بر تعریفده بولمشر در . اثرک موضوعندن مستبان اوله جغی و جهله بو تعریفلری هر نه قدر قانون اساسی و مجلس مبعوثانی تشکیل ماده سنی ترویج مقصودینه مبتنی اولسه یله فقره مذکور مؤداسنک خلافت دینه و حکومت اسلامیه ایله قابل توفیق اوله میه جغی پک بدیدر . مکرکه سلطنت سنیه عثمانیه نك خلافت اسلامیه جهتی کلیاً و قطعاً و حکومت اسلامیه جهتی ده قماً انکار ایدلسون .

مدحت افندی حضرت تلیرنک بو فقره دن مقصودلری دولت عليه عثمانیه نك ملل غیر مسلمه حقنده بدایت تشکیل سلطنتدن بری مبذول اولان نامتناهی عنایاتی اتیان ایسه بو عنایات نامتناهی بی بیان و اتیان ضمننده مسئله بی سلطنت سنیه دن سلب خلافت و اسلامیه مؤدی اوله جق و حکومتک صرف بر حکومت اسلامیه اولدیغنی کو ستره جک بر صورتله افاده ایللری هر حالده بر افراط اثری اولدیغنده شبه یوقدر .

سلطنت سنیه عثمانیه نك بدایت تشکلندن بر و ملل غیر مسلمه حقنده صرف ایتدیکی مدحت افندی نك ده اعتراف یوموردقلری عنایات دیانت اسلامیه نظر ند یامشروعدر و یا خود غیر مشروعدر . مشروع ایسه دیانت اسلامیه نك حکمی و خلافت و حکومت اسلامیه نك وظیفه سی اجرا قلنمش اولدیغندن بو حکمک انقادی بو وظیفه نك اجراسی سلطنت سنیه و دولت عليه عثمانیه بی « صرف بر دولت اسلامیه کې تشکل ایتمامش » سوزینی سونیه جک بر درکده تنزیله لزوم یوقدر . عنایات مبذوله دیانت اسلامیه احکامنک خلاقی و حکومت و خلافت اسلامیه به ترتب ایدن وظائفه منافی ایسه سلطنت سنیه بی وظائف دینه سنده مبالا تسمزلقله اتهام معناسنی اشراب ایدر . حالوکه دولت علیه و سلطنت سنیه عثمانیه مصرده کی خلیفه عباسینک وفاتیه نهایته ایرن خلافت و امامت مقامنه

قائم اولدیغنده شبهه اولدیغندن و ذاتاً اساس اعتبار یله ده تشکّل ایدن حکومت سنیّه بر حکومت اسلامیّه اولمق اوزره تأسّس ایتیش و مفاخر عثمانیه مرک اعظمی مجاهدات دینیّه و نبیّ دین دائره سنده او امر دینیّه و شرعیّه محیطنده تبعه غیر مسلمنه تک محافظه سی خصوصنه صرف اعتنا و غیرت اولنیش اولمسنه نظراً میدانده حکومتی صرف بر حکومت اسلامیّه دائره سندن چیقارمحق بر حال اولدیغی بالتأمل تبین ایدمحق و ارسته ایضا حدر . مدحت افندی حضرت تالری تک فقره مبعوثه لری مآلیله خلافت و حکومت اسلامیّه اراسنده سلامت توفیق و تطبیقه مانع بر بون عظیم موجود در .

ملل غیر مسلمیه ایدیلان عنایات ایچون دولت علیه عثمانیه یی خلافت و حکومت اسلامیّه دن تجرید و تحریمه قطعاً و قاطبۀ لزوم و احتیاج اولمیب انلرک کافۀ حقوقی افراد مسلمنه تک حقوقی کبی دیانت مقدسه احمدیه و بناءً علیه خلافت و حکومت اسلامیّه محافظه ایتشدر . ملل غیر مسلمیه یی حقوقلرندن طولایی تمامیه و کآلیله محافظه وصیانت دین مبین احمدینک هیچ بر نقطه سنه مخالف اولدیغندن کندولری یی محافظه وصیانت و حقوق مشروعه لرینه رعایت ایچون دولت علیه عثمانیه تک صرف بر دولت اسلامیّه کبی تشکّل ایتماش اولمسی هیچ بر زمانده مستلزم اولمیز . همده کمال اهمیته دقت اولنه حق احوال دندرکه صرف دولت اسلامیّه کبی تشکّل ایتماش سوزی فرض محال اوله رق بعض حکومت اسلامیّه (۱) ایچون تجویز اولنسه بیله خلافت و امامت اسلامیّه مقامنه قائم اولان دولت علیه عثمانیه ایچون قطعاً تجویزینه امکان بولنه مز . مدحت افندی حضرت تالری تک او ادیب شهیرک ، اوفاضل بی نظیرک افکار عمومیّه اسلامیّه یی قانون اساسی و مجلس مبعوثان لپنه اماله ایتمک ملاحظه سیله شو فقره یی یازمش اولدیغی اثرک مندرجات سائره سندن دخی استنباط و استفهام

(۱) دنیاده بویه بر حکومت یوقدر مکرکه حال حاضرده تبعه مسلمه لری بولمق جهتیله اکثره و روسیه و یافرانسه دولتریله و یا خود تبعه مسلمه سی بولنلر چین ایمپراطورلرینه بونام و برلرک المره تطبیق ایدیه .

اولنہ پہلہ جکی بدیہی ایسہده لفظاً و کلمۃ پک موافق و معنا پک بیوک ظن ایتدیکی اوفقره لر افکار عمومیۂ اسلامیہ یی مأمول ایتدیکی قدر مقصدینہ جلب وائالہ ایدہ مدیکی وایدہ میہ جکی مثللو ملل غیر مسلمہ یی دہ متقدار ایدہ مامشد . چونکہ اوفقرہ یی هرو قوفلی و معلوماتلی بر فرد مسلم دیانت احمدیہ ایچون شرعاً و عقلاً ملجأ و پناه و غیر مسلم بتون تبعہ سی ایچون استنادکاه اعظم بولنان خلافت و حکومت اسلامیہ یہ تعرض عد ایتکے حقلی اولدینی کی افراط درجہ دہ کی بونوازش تبہ عثمانیہ دن ملل غیر مسلمہ نک ارباب وقوف و معلوماتی طرفندن دہ نظر استخفاف و استہزا ایلہ تالق اولمسی بدیہی وطبیعیدر .

### بحث

۷

### مشورتک مشروعتی

شرف مشورتک منافع عمومیۂ سی و علو مرتبہ و نتیجہ سی قابل انکار اولیوب دیانت جلیله اسلامیہ دخی « مشورتی » مہم بر صورتلہ امر ایدہ یور . خلافتک اساس ، بناسی انقاض مشورتدن مؤسس اولدینی بو کتابدہ مفصلاً بیان اولندی و خلافت اسلامیہ نک مشورتلہ بر توام اولہرق متولد اولدینی یوقارودہ ایضاح قلندی مع مافیہ مشورتک مشروعتی حقندہ نصوص دینیہ مزیدہ بر از ایضاح ایدہلم « وما ینطق عن الہوی ان هو الاوحی یوحی » آیت کریمہ سیلہ قدر قدسی رسالت پناہیلری اوج اعلای علیہ نہ واصل اولان سبب خلقت عالم رسول اکرم صلی اللہ تعالی علیہ وسلم افندمن حضرتلری بالوجوہ مشورتدن مستغنی اولدقلری حالہ ینہ امر الہی ایلہ ایفای مشورتہ مأمور اولدقلری « وشاورہم فی الامر فاذا عزمت فتوکل علی اللہ » آیت جلیلہ سیلہ ثابتدر .

بشقہ هیچ بر سبب ودلیل اولسہ یالکمز بو آیت جلیلہ مشورتک منافع غالبہ و محسنات عظیمہ سنی ملت مرحومۂ اسلامیہ یہ تعریف ایچون کافیدر . بوامر

جلیل ربانی مشورت و اسلامی بر بردن افتراق ایده مامک اوزره یکدیکرینه  
ربط ایدن جبل متین قرآنیدر مشورتک مشروعتنه الهمهم وعظیم بر نص  
قرآنی اولان بوآیت کریمه نك تکمله سی بودر :

« فبما رحمةٍ من الله لنت لهم ولو كنت فظاً غليظ القلب لانفضو من حولك  
فاعف عنهم واستغفر لهم وشاورهم في الامر فاذا عزمت فتوكل على الله ان الله  
يحب المتوكلين »

بوآیت کریمه جوار شرف مدار مدینه منوره ده کفار قریش ایله فرقه  
ناجیه محمدیه اراسنده وقوع بولان واصحاب کرامدن بعض ذواتک ترتیبات  
وتنبیهای جلیله جناب نبوی به مخالف حرکتلرندن طولانی انزام ایله نتیجه لمان  
« احد » محاربه سنی متعاقب شرفزول ایتشدرد .

« انك لعلی خلقٍ عظیم » نص جلیل سبحانیسی دخی شهادت ایتدیکی وجهه  
مکارم اخلاقك اعظم مراتبی حائز اولان فیخر رسالت نورهدایت افندمن  
حضرتلری احد انزامدن طولانی رأى مصیب نبویلرینه مجرد ارزوی حرب  
واشتیاق ظفرله مخالفت جهتی التزام ایدن بعض اصحاب کرامی مؤاخذه  
بیورمدقلری ومعاتبه ده بولمدقلری جهته جناب حق و فیاض مطلق شفقت جلیله  
نبویه بی بوآیت کریمه مدح و ثنایله برابر منزه اولانلری عفو ایتلرینی وانلر  
ایچون عفودن فضله اوله رق درگاه علوی الهیدن مغفرت دخی طلب و رجایلرینی  
امرا اتمکله برابر کندولریله مشورت اولنسی لزومی ده علاوه اراده و فرمان  
بیورمشلردرد .

آیات ونصوص سائره قرآنیه واقوال عدیده نبویه وآثار کلیه دینییه اولسه  
یا لکنز بوآیت کریمه اصول مشورتی دیناً وعقلاً تأسیس ایتمک کفایتی ارباب  
عقول نظرنده محققدر . شو اساسه ابتنا ایدیلان بر دینك مشورتی نه صورتله  
ونه حق و صلاحیتله رد وانکار ایده جکنی ادعا ایدنلره شامهاق ، اوکی  
اشخاصك اقواله تحیر ایتامک امکانسزدر .



آیت کریمه نك سبب نزولنی موردینی بوقدر جق نصریح و بیان کافی اولدیغندن بوراده رساله مزك مقصدی اولان یالكز « وشاورهم فی الامر فاذا عزمت فتوكل علی الله ان الله یحب المتوكلین » نص جلیلی حقنده مفسرین کرامك وعلی الخصوص فخر المفسرین فخر الدین رازی حضرتلرینك تحقیقات واقفانه لرینی تشریح ایدلم :

حق تعالی حضرتلرینك اصحاب کرامیله مشورت ایتمی لزومنی نبی محترم رسول اکرمه امر ایتمی فوائد و محسنات عدیده یی مستلزم اولدیغندن بوفوائد و محسناتك بعضیلری بوجه زیر تعداد اولدور :

۱ — رسول اکرم صلی الله علیه وسلم افندمن حضرتلرینك اصحاب کرامیله مشورت ایتمی اصحابك علوشانی ، رفع مراتب ودرجاتی موجب و بوده انلرك جانب قدسیت جالب حضرت رسالینهاییه محبت و اخلاصلرینی و فرط (۱) اطاعتلرینی مستوجبدور .

معلوم اهل سیر اولدینی وجهله « احد » محاربه سنده فخر کائنات افندمن حضرتلری مدینه منوره ده تحصن ایدوب مدافعه صورتیله محاربه ایتك فکرنده بولندقلری حالد اصحاب کرامدن بعضیلری تحصنه و مدافعه یه لزوم و احتیاج اولدیغندن بحثله خارجده میدان محاربه سننه ابتدار اولتمسی لزومنه دائر بیان رأی و مطالعه ایتدکلرینه و اول صورتله ایدیلان محاربه نك نتیجه سی ده انهمزای موجب اولدیغنه منی بعدالانهمزام مشورتی آمر شو آیت جلیله نازل اولسه یدی و یاخود فخر رسل افندمن حضرتلری بووقعدن صکره ارتق اصحاب کرام ایله مشورت بیورمامش اولسه یدی اصحابه اهانت ایدلمش و بوده انکسار قلوبی استلزام ایتمش اولوردی .

بووقعه یی متعاقب صاحب خلق عظیم اولمقله مبشر اولان حبیب خدا شفیع روز جزا افندمن حضرتلری رأیلردن طولایی اصحاب کرامنی لطفاً و کرماً

(۱) افرداك فرط اطاعتی هیئت اجتماعیه نك شوكت و قدرتی داعی اوله جفنده

شهه بوقدر .

مؤاخذه ایتدکدن بشقه عفو اولمهلرینی وفضله اوله رق کندولریچون طلب مغفرت ایتلرینی سبحانه وتعالیٰ حضرتلری امر ایتمکه اکتفا اولغیوب ضمیمهٔ انلرله مشورت بیورملری لزومی ده خاصهٔ اراده بیورملری ده بروجہ محرر مؤمنین وموحدینک ترفیع قدر و شائنی ونبی محترم افندمره تشدید وتزید محبت واطاعتلری کبی فوائد عظیمه یی تأمینہ مبتنیدر . (۱)

۲. حبیب خدا علیه الصلاۃ والسلام افندمر حضرتلری عقلاً اکمل ناس اولمقله برابر مخلوقک علومی هر حالده متماهیدر . مشورتک امر اولمقی بوتناهیکی اخطار ایله برابر وجوه مصالحدن بعضیسنک خاطر قدسی مظاهر نبوتناهیلرینه تبادر ایتامسی وعلی الخصوص امور دنیویه ده افعاله تعلق ایدن بر شینک بشقه سی خاطرینه خطور ایتسی غیر مستبعددر . « اتم اعرف بامور دنیا کم وانا اعرف بامور دینکم » حدیث شریفی بوتوجیهی مؤیددر .

### مذکور حدیث شریفک مال منیفی

« امور دنییه کنزی بن سزدن زیاده بیلورم امور دنیویه کنزی سز دها ائی بیلورسکنز » ایشته بوسببه مبنیدرکه « مشورت ایدن هیچ بر قوم یوقدرکه طریق هدایتی بولما مشلدر » منطوقنده دیگر بر حدیث شریف دخی وارد اولمشدر .

۳. امام حسن بصری وسفیان بن عینه حضراتی تأویلنه کوره بوآیت کریمه ده مشورتک امر واراده بیورملسی مسلمانلرک نبی دیشانه اقتدا ایتلری وامت مرحومهٔ احمدیه ده مشورتک سنت اولمسی مقصدینه مستنددر .

ایشته قرآن ایشته حدیث وسنت هپ مشورتی امر ایدیور . مشورت دینرک

۱۱۱ احزاب مشورتک رأینده بر دفعه لک خطا ظهوری ترک مشورتی مستلزم اوله میه جغنی جاب حق نبی دیشانه امر ایدیور بواسر مشورتک اهمیت عظمه یی ندرجه لزه ترفیع ایتمکه اولدیغنه قارئین کرامک نظر دقتی نظر جلب ایدرم .

الکھمہم اساسرندن برینی تأسیس ایله یورده مشورت مشروعیدر دکلیدر ،  
جائز میدر دکلیدر سوزلری ینہ ین الناس دوراندن خالی قالمیور . فسبحان الله

۴. مشورتک امر اولمسی فخر کائنات افندمن حضرتلرینک رایاً ویاعلماً  
اصحاب کرامک مشورتندن استفاده ایتلری مقصدندن منبعث اولمیوب مشورت  
واسطه سیله اصحابک فہم وعقولی مقدارینی اوکرنمک و محبت و اخلاصلری  
واطاعتلری درجاتی تقدیرہ مدار اولق وفاضل ومفضول اولانلری بیلنوب  
ہر برینک مرتبہ سنی کندیسنہ طانتدیر مق ایچوندر . اعلم ناس اولان فخر عالم  
افندمن ایچون بو تاویلہ محل واردر . فقط خلفاسیچون شو تاویلہ محل  
اولمادیغی ده معلومدر .

۵. اجرای مشورتک ارادہ بیورلمسی سبب خلقت عالم صلی الله علیہ وسلم  
افندمن حضرتلری اصحاب کرامک رایئہ احتیاجی اولدیغندن ایلری کلامشدر .  
برمستہیہ دائر مشورت اولدیغی حالده ہیئت مشاورہ نک ہربری مشورت اولنان  
مسئلہیہ متعلق اصلاح وجوہ ہانکی جہت ایسہ انی استخراج واستنباطہ صرف جد  
واجتہاد ایدہ جکلری بدیی اولدیغنے نظراً موضوع مجلس مشورت اولان  
مسئلہدہ وجہ اصلحی تحصیل ایچون مجداندہ ساعی اولان ارواح ونفوس عدیدہ  
وکثیرہ نک تطابق دخی اونقطہدن مطلوب اولان مقصدک حصولی تعینہ مدار  
اولور . ارواح ونفوس طاہرہ نک برنقطہدہ اجتماعندہ کی فوائد ومحسنات عظیمہ  
مسلماندرک جماعتلہ ادای صلاۃ ایتلرندہ اولان سرعظیمیہدہ تشکیل ایدہ یور .  
جماعتلہ ادای صلاۃ اولمسنک منفرداً نماز قیلیمقدن افضل اولدیغی سری ایشتہ  
بواجتماع ارواح ونفوسک تأثیرات نافعہ سیدر . چونکہ برجماعتک نماز ودعاسی  
شخص منفرددن زیادہ قرین اجابت اولمسی مأمولدر . شو بشنجی تاویل مشورت  
ایچون ملت اسلامیہ نک مبعوثان مجلسی صورتندہ اجتماع ایتسنک محسنات عظیمہ سنی  
پک کوزک ، پک مشروع بر صورتلہ اثبات ایدیور . « فلیتأمل المتأملون »

۶. اصحاب کرامک مشورتہ دائر بو امرک شرف صدور ایتسی عند باریدہ

قدر و قیمت لری اولدیغنه دلالت ایدر بنام علیہ اصحاب کرامک عندالله و عندالرسول  
قدر و قیمت لری بو آیت کریمه ایلده ثابتدر .

۷. وحی الهیه مستند اولان کافه امور و خصوصده علیه الصلاة والسلام  
افندمن حضرت لری طرفندن افراد امت ایله مشورت ایتملری غیر جائز اولدیغی  
متفق علیهدر . چونکه نص جلیل سبحانی وارد اولتیجه نوع بشرجه ارتق  
ایراد رأی و قیاس بالطبع باطل اولور .

وحی الهیه مستند اولمان و حقنده نص جلیل سبحانی بولمیان امور  
و خصوصاتک کافه سنده مشورت جائز اولوب اولمادیغنده یعنی نص قرآنی  
بولمیان اموردده مشورت سز رؤیت مصالح مسلمین تجویز ایدیلوب ایدیه میه جکندده  
علمای امت ، مقتدای ملت بعض مرتبه اختلاف ایتمشلردر . حضرت کلپی  
ایله علمانک اکثری مشورت حقنده اولان بوامر جلیل ربانی امور حربیه به  
مخصوص و منحصر اولدیغی رأینده بولتمشلردر .

بونلرک مشورتی یالکز امور حربیه به حصر و تخصیص ایتملری  
خصوصنده کی دلیل و حجت لری ده بودر :

آیت کریمه نك « فی الامر » لفظ جلیلنده اولان الف و لام استغراق ایچون  
دکلدر زیرا بوالف و لام استغراق ایچون اولسه وحی جلیل سبحانی به مستند  
امور و خصوصده دخی اجرای مشورت اولنسی لازم کلور حالبوکه وحی الهیه به  
مستند اولان خصوصاتده مشورتک عدم جوازی اظهاردر . بنابرین بولفظ جلیلده کی  
الف و لامک استغراق دکل بر معهود سابقه حمل ایدلمسی واجبدر آیت کریمه نك  
تعلق ایتدیکی معهود سابق ایسه محاربه و دشمنله مقابله و مقاتله اولمادیغندن  
« و شاورهم فی الامر » نص علویسی بو صورتله امور حربیه به مخصوص و منحصر  
قاله جفی درکاردر .

آیت کریمه ده مشورت حقنده اولان امرک امور حربیه به حصر و تخصیصی  
خصوصنده بعض علمای اسلامک فکر و رأیلرینی تأیید و تشیید ایده جک

آثار و سنن سنیه حضرت نبوتپناهی دخی موجود اولدیغنه دائر بعض دلایل و براهین ده بوراده ایراد و تذکار اولنور .

اولا . بدر کبری محاربه سنده فخر کائنات افدمن حضرتلری بر موقعی معسکر ظفر اثر هایون اتخاذ بیوردقلری حالدۀ فن حربۀ توفیقاً او موقعک تأمین موفقیت و مظفریت ایدمه جکفی تدقیق و تفرس ایدن اصحاب کزیندن و انصار کرامدن « حباب بن المنذر » [۱] رضی الله تعالی عنه حضرتلری صاحب هدایت خاتمه شرفنامه نبوت افدمن حضرتلرینه شومعروضاتده بولنمشلردر :

حضرت حباب . یا رسول الله اردوگاه ایچون بو موقعک انتخاب بیورلسنی غیر قابل التّغیر « بر امر الهی به مستندمیدر و بشقه بر محاک اردوگاه ایدلسی غیر جائز میدر یوقسه حرب ایچون بر رأی و مطالعة ذاتیه دن عبارتیدر ؟  
علیه الصلاة والسلام افدمن حضرتلری : خیر حرب ایچون رأیدن عبارتدر .  
حضرت حباب . او یله ایسه بو موقع حرب ایچون الوریشلی دکدر .  
فلان موقعی اردوگاه اتخاذ ایتک فن حرب نقطه نظر نجّه ده موافقدر و دهّا زیاده تأمین موفقیت و مظفریت ایدر .

حضرت حباب شو رأیلرینی و مطالعة حربیه لرینی اسباب موجه سیاه توضیح و تشریح ایتدیکی جهته افاده سی قرین قبول نبوتپناهی اوله رق بیان و اشارت ایتدیکی موقع معسکر هایون اتخاذ بیورلدی و او موقعده محاربه ایدیلهرک اردوی هایون نبوی مظهر موفقیت و مظفریت اولدی .

ثانیاً . خندق محاربه سنده اردوی هایون رسالتپناهی خندق ایچنده محصور اولدیغی و دشمن طرفدن فرقه موحدین کرکی کبی دوچار تضییق بولندیغی بر زمانده رؤسای اعدا عقد مصالحه ضمننده مدینه منوره نک خرماقلری حاصلاتندن ایکی ثلثک بدل صلح اولمق اوزره کندولرینه تسویه و اعطاسی شرطیه عقد مصالحه تکلیفنده بولندیلر . دشمنک بو تکلیفنه مقابل رسول رب العالمین محمد الامین علیه صلاة المعین افدمن حضرتلری اصحاب کرامدن سعد بن

[۱] وقعة نبی سقیفه حضرت انصاریک خطیب معروف بولان زاندر .



معاذ وسعد بن عباد و سعد بن فزاره رضی الله تعالی عنهم حصراتیله استشاره بیوره جقلری جوابی ویردیله و مشار الیه مشورت بیوردیلر. ذوات ثلاثه مشار الیه شرایط و تکالیف واقعتهنک عدم قبولی رأینده بولندقلری جهتله دشمنه مصالحه و تکالیف واقعیه دائر جواب رد ویرلدی. حائر علوم اولین و آخرین اولان ذات عالی نبوتپناهی طرفندن او مهم مسئلهده مشورته توفیق حرکت بیوردلدی.

ثالثاً. بدر کبری محاربه سنده ایادی موحدینده کرفتار قید اسارت اولان اسراحقننده ایدنی اقتضا ایدن معامله یه دائر علیه الصلاة والسلام اقدمن حضرتلری حضرت صدیق اکبر و فاروق اعظم ایله استشاره ایدوب رأی و مطالعه نیرنی استفسار بیوردیلر. حضرت صدیق اسیرلردن فدیله اخذیله عفو ایدلملرینی و حضرت فاروق فدیله التیه رق قتل اولملرینی بیان ایتدیلر. حبیب کبری علیه اکمل التحایا اقدمن حضرتلری صدیق اکبرک رأینده توفیق معامله بیوردیلر.

نمونه سی اراه اولسان اشبو سنن سنیه جناب رسالتپناهی آیت کریمه ده کی مشورتک امور حرییه یه مخصوص و منحصر اولدینی رأینده بولنان بعض مفسرین و علمانک دلائلدر.

علمانک دیکر بعضیسی نه کوره «فی الامر» نظم جیلینده کی امرک لفظی عام اولوب الف و لام جهتیله وحی و یا خود نصل جلیل سبحانی ایله تخصیص اولنان امور و خصوصاتده خاص اولقله برابر نصه و وحیه مقرون اولسان بالجمله مواد و مسائلده عمومیتی محافظه ایتش اولدینی رأینده بولنمشادر. یعنی وحی و نص جلیل سبحانی یه مستند اولان خصوصاتده حکم جلیل خا صدر و او خصوصاتک غیر یسنده حکم منیفی عامدر.

شو حاله کوره مشورتک یالکنز امور حرییه یه تخصیصی کی بر تحدیده محل اولمادینی ظاهر در. علی الخصوص رسالتپناه اقدمن حضرتلری و خلفلری بولنان خلفای راشدین حضراتی امور حرییه یه متعلق

مسائلک غیریسنده دخی پک چوق مشورتلر اجراسنده بولندقلری جهته وجوب مشورت مصالح عامه مسلمینه عائد اولوب مصالح عامه دن یالکز بری اولان امور حربیه منحصر اوله میه جنی بدیدر. اکثریت واصابت شومطالعہ دائرہ سنده اولدیغی ده امر جلیدر بوندن بشقه بر هیئت اجتماعیه نك امور حربیه سی دیمك نتیجه اعتباریله كافه معاملات دیمكدر چونكه ترقیات مملكت محافظه سلامت ملت وتقویة معاملات دولت كاملاً امور حربیه نك نتایجیدر. بر ملتك بر هیئت اجتماعیه نك سلامتی عظمتی هرشیدن اولملتینی محافظه یه و بوده قوه حربیه یه متوقفدر .

آیت کریمه ده بولان « فاذا عزمت فتوكل على الله » نصل جلیلی دخی مشورت ایدیلوبده بر نقطه ده اتفاق ارا حاصل اولسه بیله مطلقاً او رایه اونقطه یه اعتماد اولنجیوب هر حالده جناب حقك عنایتمه ، معاونتنه توكل (۱) ایتك وجوبی آمردر . بو نص جلیل عبدك كندی رأینیه اعتماد ایتمه سنی و هرشیده حقك لطفنه توكل و اعتماد ایلمسی لزومی بشقه جه مؤیدر .

### مشورتی آمر اولان ایکنجی آیت کریمه

« والذین استجابوا لربهم واقاموا الصلاة وامرهم شوری بینهم ومما رزقناهم یفقون » نصل جلیلیدر .

اشبو آیت کریمه مؤمنلرك بعض صفات ممدوحه واحوال مستحسنه سنی موضح ومبین اولوب او صفات ممدوحه دن و احوال مستحسنه دن بری ده امور و خصوصات واقعه لرینی كندی ارالرنده مشوره استناداً واستشاریه ابتناء رؤیت ایتلریدر. بناءً علیه آیت جلیله مؤمنین وموحدینك كندی ارالرنده كندی مصلحتلرینه متعلق خصوصاتده مشورت ایتلری خالق خیر و شر اولان جناب ذوالجلال طرفندن استحسان بیورلمش اولور . بو آیت کریمه نك حکم جلیلنده

(۱) توكل و جزء اختیار نامیله بر ائرم درست طبع و نشردر .

بر معهود سابقه اشارت اولدیغندن وجوب مشورت صورت مطلقهده امر وافصاح بیورلمش و بناءً علیه مسلمانلر اراسنده مصالح عامه مسلمین ایچون مشورتک وجوبی ذره قدر تأویل و تردده محل قلامق اوزره تحققی ایلمشدر .  
 شارع شرع مبین رسول رب العالمین علیه صلاۃ المعین افندمز حضرتلری پک چوق مواقعده استشاره بیورمشلر و بیان رأی ایتملرینی اصحاب کرامنه امر و فرمان ایتمشدرکه کتابده ، سنتده ، آئارده ، اجماعده کاملاً بین المسلمین مشورتک فرضیتی ، وجوبی اثبات ایتمکده بولمشدر .

« حزم » دینلن شیئک نه دن عبارت اولدیغنه دائر وقوع بولان بر سؤاله جواباً فخر کائنات افندمز حضرتلری « حزمک استرشاد اولدیغنی » اراده بیوردیلر . طلب رشد دیمک اولان استرشاد مشورته مراجعتدر .

ینه اعلم الانبیا افندمز حضرتلری « ماخاب من استخار ولاندم من استشار » بیوردیلرکه منطوق منیفی استخاره ایدنلر خائب و خاسر و استشارهده مراجعت ایلیانلر متأسف و نادم اولمیه جقلرینی امر و فرماندن عبارتدر .

بو احادیث شریفه دن صکره آرتق مشورته شرعاً تردد امکاننه محل بولنورمی ؟ حاشا

دیگر بر حدیث شریفده دخی « هیچ بر قول اجرای مشورتله شقی و مشورتدن استغنا ایله سعید » اوله میه جغنی اراده بیوردیلر .

خاتم النبیین افندمز حضرتلریک بالذات امور حربیهده استشاره بیوردقلری و « وشاورهم » آیت کریمه سنک تفسیر و تشریحی بحثده بیان اولندیغنی وجه ایله بدر کبرا اسیرلرینه و انتخاب موقع حربیه و خندق محاربه سنده کی مصالحه ماده سنه و سائر و سائریه دائر اصحاب کرام ایله استشاره بیوروب استحصال اولنسان رأی و مطالعه نرینه ده توفیق معامله بیوردقلری محققدر . اثر جلیل نبوییه و سنت سنیه رسالته نهاییه اتباعدن تباعد آرتق تجویز اولغلی میدر ؟

خندق محاربه سنده فخر عالم علیه السلام افندمز مشرکین طرفدن بر بدل مقابلنده تکلیف صالح اولندیغنی حالده کیفیتی اصحاب کرامدن سعود ایله مشاورهده

تعلیق بیورمشلردر . سعود . سعدك جمعیدر بوسعوددن مقصد یوقاروده بیان اولندیقی وجهله اجله احباب وانصار کرامدن سعد بن معاذ وسعد بن عبادہ وسعد بن فزاره رضی الله تعالی عنہم حضراتیدر . بونلر عادتاً بر ویرکو حکمنده طلب اولسان بدل صلح ایله صلحك عدم قبولی بیان ایتدکلرینه مبنی خاتم الرسل افندمن انلرك رأى و مشورتلرینه اتباع بیورمشلردر .

مشورتك محسنات عظیمه و منافع مهمه سی غیر قابل الانحصار ایسه ده خلقای راشدیندن اسدالله الغالب علی ابن ابی طالب رضی الله تعالی عنه حضرتلری مشورتدن باشلیجه یدی فائده عظیمه استخراج و ایضاح ایتمشلردر .  
برنجیمی . صوابك استخراج واستنباطیدر .

ایکنجیمی . موضوع موقع استشاره اولان ماده یه دائر رأيك [۱۶] اکتسابیدر .  
اوچنجیمی . افعاله و معاملاتده غلطاتدن و سقطاتدن تحصن و تحفظدر .  
دردنجیمی . استشاره ایدندن لوم و ملامتك اندفاعیدر .  
بشنجیمی . ندامتدن قورتلقدردر .


آلتنجیمی . ارباب مشورتك یعنی استشاره ایدیالانلرك تألیف قلوبنه خدمتدر .

یدنجیمی . سنت سنیه رسالتپناه یه اتباعدر .  
انسانك محتاج اولدیقی مسائله بشقه سنك عقلنی کندی عقلنه علاوه ایتمی یعنی عندالحاجه امورده استشاره اولنمی حضرت لقمانك وصایای مؤثره سنندردر .

افعال و اعمالنده صوابی کثیر و خطاسی قلیل اولان دهابة عربدن « احنف بن قیس » نام ذاته حرکاتنبده کوریلان کثرت صوابك سببی صورمشلردر . بوجوابی ویرمشدر :

احنف « ارباب تجارب ايله مشورت ايتمك و موضوع بحث اولان بر مسئلهده برچوق رايلىرى بربرينه اورمق صوابى استخراجه سبدر . »  
 « بارقة حقيقت تصادم افكاردن چيقار » حكمت مشهورهسى برنجى عصر  
 حجرينك دهائة عربدن اولان احنك ايشته بوحوابندن استنباط اولنهيلور .  
 بونى بعض ادباى عثمانيه من ابوالاحرار وياخود بيلم هانكى اوروبالى بر ادبيه  
 اسناد ايتلى احنك بوسوزينه مطلع اولماقدن واحوال ومعاملات عربييه  
 تبعنده قصور ايتمكدن منبئدر .

بالاده ذكر وبيان اولان آيات جليله قرآنيه وافعال واقوال سانيه نبويه  
 مشورتك وجوبى مشروعتنى اثبات ايدهيورسدهده مشورته كسب استحقاق  
 ايتك ايچون صفات لازمه اهليتهده دقت اولتمى ينه موجبات شرعيه دن وستن  
 سانيه احديه اقتضاسنددر . بناءً عليه برمشورت لزومى حس اولنور اولنمز  
 مشورت ايدهجكلرك داخل دائرة مشورت اوله جق ذواتك حال وشانلىرى دخی  
 درحال نظر دفته آلتق لازم كلور . مشورتك شرط اعظمى بولان واستشاره  
 ايچون لوازم ضروريه دن اولان صفتلر ، حائلر مشاورك صفوت فكره ،  
 جودت فېمه ، تجارب مسبوقه جهتييله قوت نفسه ، صحت حسه ، امور مختلفه يه  
 اطلاع ، قول زورودن اجتناب كې احوال وصفات شرايط اساسيه استشاره  
 ايچون اسباب اهليت وكفايت جمله سبنددر . شو حقايقه نظراً مجلس مشورت  
 اولان مجلس مبعوثانه انتخاب اوله جق ذواتك صفات سائرۀ لازمه ايله برابر  
 بيان اولنان صفتلرينكده نظر دفته آلتنى مشورتك حسن نتايجى ايچون  
 مقتضيات طبيعیه دندر وبوندن بشقه داخل مجلس مشورت اوله جكلرك صدق  
 افاده وجديت وباخصوص تمامى امنيت كې اوصافى حائر اولنرىده لابددر .  
 مبعوثان ملتك بوصفات ايله متصف اولنرى مقتضاي مصلحت امتدر . برنجى  
 مجلس مبعوثانمرك انتخابتنده كوريلان مساعى شهبه سز بو صفاتى تحريه  
 معطوف ايدى .





دین اسلامده مؤسس خلافتله توأم اولان ومقتضیات دینه دن بولنان مشورتک مشروعیتی یوقاروکی مباحثده بسط و بیان اولنان دلایل قرآنیه وبراهین شرعیه ایله ثابت اولدینی کی مقام قدسیت اتسام خلافتده بولنان ذواتک کافه امور ومصالح دولت وملتک یالکمز باشنه بالذات رؤیته غیر مقتدر اولدقلری جهتله وزیر استخدام ایتملری ده جواز شرعی دائره سنده در . خلافت وحکومت اسلامیه ده استخدام وزرا ایجابات سیاسیه و اداره در و حقوق اساسیه اسلامیه دن اولدینی مثللو دیناً و حکمة دخی احکام جلیله شرعیه به موافق در .

فخر الانبیاء افندمن محضر تلمری شیخین معظمین حضراتی « حضرت صدیق وفاروقی » وزارت مقامنده استخدام بیورمشلدر در .

حضرت صدیق دخی حضرت فاروقه وظائف وزراتی کوردیرمشلدر در .

حضرت فاروق امام علی کرم الله وجهه حضرت تلمری وسائر اصحاب کرامی وزارت امورنده قولانمشلدر در . حاصلی خلفای راشدین رضوان الله تعالی علیهم اجمعین حضراتی وزرا استخدامندن کندیلرینی مستغنی کورمدکلری کی خلفای امویه زماننده ده هر خلیفه نکل وزیر ی ویا وزراسی بولنمشدر . شوقدر که خلفای عباسیه به قدر وزرای اسلامیه رسمی ومقرر بر منصب مخصوص اولوق اوزره مسند صدارتله ایفای وظیفه ایتملری واقع اولمامش ووزرات خدمتی رسماً وخصوصاً توجیه اولنقمسزین فعلاً وعملاً اجرا قلنمشدر .

خلافت عباسیه زماننده اووقته قدر غیر رسمی ویالکمز فعلی وعملی اوله رق موجود اولان وزارت مسند مخصوص اولوق اوزره رسماً تأسس ایتمش و وزیر نصبی ورسماً توجیه منصب وزرات اولنمشی خصوصنه ارتق اعتنا قلنمشدر .

خلفای عباسیہ دن ہارون الرشید زمانندہ مسند صدارتدہ بولنان آل برمک رجالک اعتلای شان و شہرتلری او درجہ یہ واردی کہ بالذات خلیفہ دخی اکا تحمل ایدہ میہرک نہایت اوخاندان فضل و عرفانی ، اوخاندان جود و سخاوتدہ نہ صورتلہ محو وافنا ابتدکی تاریخلردہ محرردر . ہارون الرشیدک آن برمک حقندہ کی معاملہ سنہ تاریخلردہ پک چوق اسباب مختلفہ وحتی اسباب مخیلہ ذکر اولنمش ایسہدہ تاریخ اسلامی تتبع ایدن وبخصوص فلسفۂ تاریخہ واقف اولانلر جہ معلومدرکہ ہارون الرشیدک معاملہ واقعہ سی ایجابات سیاسیہ مملکتندن منبعثدر . چونکہ آل برمک حکومت منقرضۂ فرسک رجالندن اولدقلری وپک زیادہ کسب نفوذ و حیثیت ایتدکلری جہتلہ زوال خلافتہ چالشملری ملاحظاتی زواللرینہ سبب اولدینگی شہہ سزدر .

وزارت حکومت و خلافت اسلامیہنک لوازم حقیقیہ سندندر و شرع شریف ایجاباتندر . وزارتک مشروعیتی بروجہ محرر افعال سنۂ نبویہ ایلہ و خلفای راشدین حضراتنک آثار مبعجلہ سیلہ مثبت اولدینگی کی وجوب و لزومی فرقان عظیم الشان ایلہدہ ثابتدر .

حضرت کلیم اللہ قصہ سندنہ « واجعل لی وزیراً من اہلی ہارون اخی اشددبہ ازری اشرکہ فی امری کی نسبک » نص جلیلی وارد اولمشدرکہ پیغمبران عظام ایچون نص عالی فرقان موجبنجہ وزیر نصب و تعینی لازم اولنجہ خلافت و حکومت اسلامیہ ایچون بولزوم اولی بالطریق ثابت اولور .

ینہ حضرت کلیم اللہ ایچون طرف ربانیدن « لقد آتینا موسی الکتاب وجعلنا معہ اخاہ ہارون وزیراً » آیت کریمہ سندنہ ارادہ و بیان بیورلدینگی وجہلہ وزیر نصب و تعیین بیورلمشدرکہ وجوب وزرات بوآیت جلیلہ ایلہدہ قرین رتبۂ نبوتدر .

وزارتک لزوم و وجوب شرعی سی بوآیات کریمہ ایلہ تحقق ایتکلہ برابر بوبادہ حدیث شریف نبویہ موجوددر .

« من ولی شیئاً من امور الناس واراد اللہ بہ خیراً جعللہ وزیراً صالحاً »

ان نسی ذکره وان ذکر اعانه واذاراد غيرذلك جعلله وزير سوء ان نسی لم يدکره وان ذکر لم یعنه » حدیث شریفی وزارتک لزوم ووجوبی موضحدر .

### بو حدیث شریفک مال عالیسی

« عهده سنه خلقک اموری مقوض اولانلرک خیره موفقیتلری اراده الهیهیه توافق ایدرسه اوپله صالح بروزیره مقارن اولورلرکه اونوتدقلری اموری کندولرینه اخطار وتذکارده وتذکاردن صکردهده مقتضیاتنی اجرا ایچون معاوننده بولنورلر . خیره موفق اوله میانلر سوء احوال اصحابندن اوپله بروزیره نائل اولورلرکه اونوتدقلرینی تذکار واطار واطارنده بولنانلری اجرا ایچون معاونته کندولرینی اقدار ایتمزلر »

وزیر کله سنک اشتقاقده علماء سیاست شرعیه اوچ نوع اوزره بیان مطالعه ایتملردر .

برنجیسی : آغراق معناسنده اولان « وزر » دن مشتقدر . بو فکرده بولنانلر پک آغر اولان امور حکومتی درعهده ایدن خلیفه و امامک ویا پادشاه وسلطانک یوکنی بار ثقیل مسئولیتی معاونتیه رأی وتدیریه جناب وزیر تخفیف ایتمش دیمک اولور .

ایکنجیسی : ملجأ وپناه معناسنده اولان « وزر » دن مشتقدر . « کلا لاوزر » نص جلیل فرقانیسی « وزر » کله سنک ملجأ وپناه معناسنده اولدیغنی میندر . شواشتقاقه نظراً خلیفه یاخود پادشاه وسلطان امور عباد ایچون امور حکومت ایچون وزیرک رأی ومعرفته وتدابیر صائبه سنه التجا ومراجعتده بولنش ووزیر دخی حکمدارک معاونی وتسویة مصالح عمومیه خصوصنده ملجأ وپناهی اولمش اولور .

اوچنجیسی : وزیر کله سی « ازر » دن مشتقدر ازر ظهر معناسندهدر .

«اشدد به ازری» نص فرقایسی ازرك ظهر معناسنده اولدیغنی موضحدر .  
شو حالده پادشاه وحکمدار وزیرك رأی ومعرفتی وتدابیر حسنه سیاه تسویه  
امورده قوی الظهر اولور .

وزیر اوله جق ذواتك شرعاً و سیاستاً صفات لازمه سی و شرائط استحقاقی  
یدیدر . بوصفات لازمه یی و شرائط استحقاقیه یی حائز اولاندردن وزرا  
انتخابی اقتضا ایلر .

صفات لازمه و شرائط استحقاقیه شونلردر :

برنجیسی : شروط جامعه شرعیه سی شامل اولان عدالتدر . شروط جامعه  
شرعیه موجبیه عدالتی حائز اولمیلر منصب وزارتیه (۱) نائل اولهنر .  
ایکنجیسی : امور و خصوصیاتك اجرای احکامنده و علی الخصوص دولته  
عارض اوله جق مواد معظمه فوق العاده ده اجتہاده کفایت ایده جك مرتبه ده  
احباب علم و وقوفدن اولمسیدر . زیرا امور معظمه ده وزیرك بر خطای  
اجتهادیسی دولتك باشنه بیوک بلالری دعوت ایدر . نته کیم زمانمزدده وزرانك  
اوکی خطایسی دولت عثمانیه نك باشنه پك چوق بلالر جلب ایتمشدر .  
و خطایای وزرا بر چوق دفعه لر ملت عثمانیه یی ازمشدر . جناب حق دولت  
وملت عثمانیه مزری وزراسنك رأی خطا الودلرندن تولد ایدن شر ومضرتدن  
محافظه بیورسون .

اوچنجیسی : لسان ، کوز ، قولاق کبی اعضاء بدنده وزیرك سلامتی  
شرطدر . زیرا بواعضاده بر نقیصه اولورسه ایفای وظیفه وزارتیه مقتدر اولمز .  
دردنجیسی : سرعت سیر و حرکته مانع اوله جق درجه ده اعضاء سائر  
بدنییه نقیصه سندن سالم اولمسی لازمدر .

بشنجیسی : مصالح عمومیه سیاسییه و تدابیر احوال رعیه یی حسن اجرا  
ایچون رأی متین صاحبی اولمسی ایجاب ایدر .

(۱) وزارتدن مقصد بوکونکی تمبیراته و حقوق اداره مزه کوره فعلاً صدارتدر .  
مشروطیت ایجابجه مسؤولیت وکلا اعتباریه ده سائر وکلای دولتدر . یوقه بالفعل اشغال  
مقام وزارت ایمان وزیر رتبه لی ذوات ورتبه وزارت دکادر .

التنجیسی : ممالك محروسه اسلامیه فی حایت و محافظه و اعدای دولته  
مجاهدیه مقتدر اوله جق نجات و شجاعته مالاک بولنجی شرطدر . (۱۱)  
یدنجیسی : بالخاصه امور حربیه ده و خصوصات مالییه ده صاحب کفایت  
و حصافت اولمی شرط مهم استحقاقد ر .

خلفای عباسیه دن مأمون الرشیدک اوصاف لازمه وزارت حقمنده بر نطقی  
وارد رکه پک چوق کتب سیاسیه اسلامیه ده و وزارتیه متعلق مباحث اداره ده قید  
و تدکار اولنسیله بورایه ده عیناً قیدی تنسیب قلندی .

« انی التمت لاُموری رجلاً جامعاً لحِصال الخیر ذاعفۃً فی خلائِقِه و استقامۃً  
فی طرائِقِه قد هذبته الآداب و حنکته الوقیع التجارب ان اوتمن علی الامر  
قام بها وان قد مهمات الامور نهض فیها یسکنه الحلم وینطقه العلم یکفیه اللخظة  
وتغنیه للمحه له صولة الامراء و اناة الحکماء و تواضع العلماء و فهم الفقهاء ان  
احسن الیه شکر وان ابتلی بالاساءة صبر لا یمیع نصیباً من یومه بحرمان غده  
یسرق قلوب الرجال بحلابة لسانه و حسن بیانه »

فی الحقیقه دولتک امور معظمه داخلیه و خارجیه سنی درعهده ایدن وزرا  
بالاده بیان اولنسان صفات لازمه و شرائط مخصوصه فی حائر اولنزلرسه حال  
و حرکتمری دائماً دولت و ملت باشنه جالب بلا اولور .

بر دولتک امور مهمه داخلیه سنی درعهده ایدنر مهمام خارجیه سنی عهدۀ  
حصافتنه آلانر پک اغر یوکمری تحمل ایتمش اولور لر . اختلال اموریه میدان  
ویر ماملری و دائماً اصلاح حاله چالیشوب آثار فعلیه کوسترملری لازمدر .  
هله امور داخلیه ده امن و آسایشه چالشمملری ، محافظه افرادملتیه صرف مقدور  
ایتملری ، واردات دولتی تزید و موجودینی حسن استحصال و حسن استعمال  
ایلمملری ، کفایتی و وقوفی مأمورلر استخدام ایتملری ایجاب ایدر .

(۱۱) ادفه جق بر باطردی ایله مقامنی ترک ایدوب فرار ایتامک ایچون نوشرطک اهمیت  
کبرزمناه کوردیکمز دینه اندندر .



بالجمله مستخدمین دولتی طریق حق و عدله سوق و کفاه امورده اجرای عدالتله احقاق حق ایتملری لازم کلیر .

بالجمله ولایه و مأمورین دولتی ظلم و استبداددن منع ایله برابر جاده عدل وانصافدن خروج ایدنلری جزای شدیدایله مجازاة ایلملری لوازم وزارتنددر . دائماً مأمورین و مستخدمین دولتک احوالی ، افعال و اعمالی تفتیش ایتک وجیهه ذمتلریدر . حسن خدمته مکافاة ، سوء حرکاته مجازاة ترتینده قصور ایتملری فریضه ذمت مأموریتلریدر . خاطر و کوهه باقاملری ، اقارب و تعلقاتی واسباب و صورسائرله ایله منسوباتی ارباب درایت و کفایت تقدیم کی خودکاملقدد بولناملری وظیفه لری وجابنددر .

وزیر اوله حق ذواتک تعبیرات حاضرهمزه کوره وکلای دولتک حائز اولملری لازم کلن صفات مسروده نک نقایصی اولورسه اونقصان نسبتنده امور داخلیه و خارجیه حکومت دوچار تزلزل و اختلال اوله جغنده شبهه یوقدر .

وزارت حکومت اسلامیده بوجه محرر و جاب ویا جائزات شرعیه دن اولدیی کی بو مأموریت و وظیفه مهمه شرعاً و اساساً ایکی نوعدر :

برنجیسی : وزارت تفویض .

ایکنجیسی : وزارت تنقیددر .

وزارت تفویض وزیرک و شمدیکی حقوق اداره سلطنت سنیده کوره صدر اعظمک حکومته متعلق کفاه امورده مفوض اولسنه اطلاق اولنور . تعبیروشمیزجه « وکالت مطلقه » ایشته بو وزارت تفویضدن مقتبس اولدیی ظن اولنه بیلور . وزارت تفویض ویا وزیر مفوض پادشاهک یا بهیلجه کی کفاه اموری رفیت و تسویه مآذون دیمکدر . تعیین ولایه و مأمورین و تدویر امور مالییه و سائر خصوصات داخلیه و خارجیه ده رأی و تدبیر ذاتیسله کفاه مهمات دولته مباشرت ایدر . وزیر مفوضک کفاه امورده مقام خلافت و سلطنته معلومات ویرمسیده لازمدر . جریان ایدن حالات و معاملاتی عرض عتبه علیا ایتسی مقتضیدر . بعض معاملات و اجرا آتی مقام سلطنتجه قرین قبول اولمز ایسه اراده سنیه

ایله تعدیل اولنور . چونکه خلیفه ویا سلطان بالذات کنديسنگ اجرا ايتديكي امور و خصوصاتی ایجاب حال و مصلحته و اجتهدینه کوره تعدیل ایده بیه جکنه نظراً « هر نه قدر مفوض اولورسه اولسون » وزیرینک معاملات واجرا آتی ده تعدیل ایده بیلیمسی اولویتده قالور .

وزیر مفوض ویا خود وزارت تفویض طرفدن یا بیه جق و وظیفه سی خارجنده قاله جق اولان مواد پک محدوددر . اوچ مسئله دن عبارتدر .

خلیفه ویا سلطان دولتی ایچون شرعاً ولی عهد نصب ایده بیلورسده وزیر مفوض ولی عهد نصب و تعیین ایده من . خلیفه ویا پادشاه سلطنتدن استعفا ایده بیلورسده پادشاهک ویا خلیفه نك سلطنتدن ویا خلافتدن استعفا سی وزیر مفوض درمیان ایله من . وزیرک نصب و تعیین ايتديكي ولایه و مستخدمین دولتی خلیفه ویا پادشاه عزل ایدرسده خلیفه ویا پادشاهک نصب ايتديكي مأمورلری وزیر مفوض عزله مقتدر اوله من .

وزارتک برنجی نوعی اولان وزارت تفویضک وظایفی حقوق اداره اسلامییه تحریر ایدن علمای دین بالاده بسط و بیان اولندیغی وجه ایله تعیین و تقریر ایتشلرر .

وزارتک ایکنجی نوعی بولسان وزارت تنفیذک حکمی وزارت تفویضیه نسبتله پک ضعیفدر و شروط و صفات لازمه و معتبره سی پک قلیلدر . وزارت تنفیذ پادشاه ایله تبعه سی ویا پادشاه ایله مستخدمین و مأمورین دولت آرہ سندہ اجرای و ساطتدن عبارتدر . تدویر امور دولت و تسویه مهام مملکت بالذات پادشاه ویا خلیفه یه عائد و راجع اولوب وزارت تنفیذ اوامرلری ایجاب ایدنلره تبلیغدن بشقه بروطفه ایله موظف اوله من .

حاصلی وزیر تنفیذ مقام سلطنتدن صادر اولان اراداتی و دولتک مأمورین و مستخدمینی طرفندن و تبعه و رعایا جانبندن واقع اوله جق معروضاتی عرض و تبلیغه متعلق بروطفه محدودده اولدیغنه مبنی اهمیت وزارت تفویضدن پک دوندر . وزیر تنفیذ ایچون شرائط سبعه مسروده دن حریت و علمک لزومی یوقدر .

چونکه امور ومهام دولتی رؤیت و تمشیت خصوصند کندی رأی واجتهادینی استعماله غیر مقتدر و اوایله بر وظیفه ایله غیر موظفدر و اجرای احکامه غیر مأمورد. بناءً علیه وزارت تنفیذ وظایفی حریت وعلمه مقتدر اوله من. وزیر تنفیذك بتون وظیفه سی ایکی امره منحصردر. بریسی خلیفه عراض معلومات ودیکری خلیفه نمئه اجرای تبلیغاتدر. معافیه وزیر تنفیذ ایچونده شرائط لازمه انتخاب علمای سیاسیة دینیّه من طرفدن بروجه آتی تعیین و بیان قلمشدر.

۱ — عهدۀ امانته تودیع ایدیلن امر تبلیغه خیانت ایتمک ایچون حائز امنیت اولسی لازمدر. (۱)

۲ — طوغرو سوزلی اولسی شرطدر زیرا تبلیغاتده افادانه وثوق واعتماد اولنسی اقتضا ایدر.

۳ — ارتش ایتامسی وتمایله میدان قلاماق ایچون طمعکار اولماسی مقتضید.

۴ — کیمسه ایله عداوت وغرضی (۲) بولنمایددر. چونکه اغراض شخصیّه و عداوت ذاتیه انتصاف واعطافه مانعدر.

۵ — خلیفه یه وقوع بوله جق معروضاتی وخلیفه دن صادر اوله جق اوامرك تبلیغاتی متباین متخالف اولمامق اوزره حافظه صاحبی اولسی شرطدر. چونکه معروضات واراداته خلیفه نك لهنده وعلیه نه برشاهد مقامنده در.

۶ — امور وخصوصك التباس واشتباهه میدان قلاماق ایچون ذکا وفطنت صاحبی اولسی ایجاب ایلر.

وزیر تنفیذ امور ومهام سلطنتده رأی وتدبیر ایله فی الجمله اشتراکی اولورسه صحت رأیه وتدبیر صوابه موفقیتانی تأمین ایده جك تجربه صاحبی اولسی ده

(۱) خلاف حقیقت معروضاتده بولنقی پادشاهدن صادر اولمیان اراداتی تبلیغ ایتمک امانته مخالفدر که بو حال باخصوص دور سابقده پك چوق وقوع ولدیفی امارتیه له میدانده در.

(۲) تقدیر ممددر.

شرط اوله بیلور. رأی وتدیرده اشتراکی بولنه مزسه بوصفت زائده دهه احتیاجی اوله من .

سلطنت اسلامیه ده وزارت یالکز بروزیره منحصر اولیوب ایکی ودها زیاده وزیر تعیین واستخدام نه ده جواز ویرلمشدر .

وزارت ووزیر ایچون ایجابات ومقتضیات سیاسیة شرعیة بو مبحنده بورایه قدر ایضاح اولنان خصوصاتدن عبارتدر . وزرا حقنده حقوق اداره سلطنت سینه نك شوا حکام سیاسیة دینییه تطبیقی حقنده ده بر ایکی سوز سویله بیلور . بدایت تأسس سلطنتده سلطان اورخان حضرتلرینك دادری وچاندارلی خلیل وزیر ایدیلیر ووزیر مفوض ایدیلیر ووزارت رتبه وفلا یالکز صدراعظم لره منحصر ایدی . وزارتك یالکز صدر اعظم لره انحصاری یعنی دولته یالکز بروزیرك وجودیله اکتفا اولنمی دولت علیه عثمانیه مزده برچوق زمان دوام ایتمشدر .

فتوحاتك تكثری وممالك سلطنت سینه نك توسعی اوزرینه شرق وغربه سرعسكرلك وظیفه سیله قوماندانلر تعیین قلمسنه و بیوک قوماندانلرک رتبه وزارتی حائز اولملری تزید وتقویه نفوذ اسبابندن عد اولنسنه مبنی صدراعظم قائم مقامی نامیه بروزیر ده علاوه اولنمشدر. ده صکره لری عزل ونصب وزرا اقتضا ایتدیکنه واسفار بعیده سرعسكرلك وظیفه سیله وزرا اعزامی لازم اولدینی کبی مهم امور دوشونمک وتدایر مقتضیه اتخاذ ایتمک اوزره ارباب وقوف واعتماددن برهیتك مرکز سلطنتده بولنمی قاعده سی ده قبول ایدلیکنه مبنی شمديکی هیئت وكلا مقامنه قائم اوله رق « قه نشین وزرا » نصب وتعیین قلممشدر. دولتك امور داخلیه وخارجیه سی بو هیئته رؤیت اولنوردی. صدر اعظم لره سرعسكرلر اکثریا بو هیئتدن انتخاب وتعیین قنوردی. دور انحاطمز باشلا دقدن صکره تعیین وتحید وزرا خصوصنده کی قواعد مضبوطه قدیمه دخی تبدل ایدرک وزرانك عددی چوغالمش ونهایت وزارت منصب ومأموریت دائره سندن چیقاریله رق رتبه

حاله ا فراغ ایدلشدر . دولجه تلطیفی اقتضا ایدنلره رتبه وزارت احسان اولنه یور . رتبه وزارت توجیه ایدیلن ذوات یا بالقوه صدر اعظم و وکلا دیمک اولور یا خود هیچ اولمزه بومنصلره نامزد طانیلور .

حقوق اداره اسلامیده وزارتک و عثمانلی حقوق اداره مزه کوره صدارتک و وکلانک تعددی جائزدر . حقوق اداره اسلامیده شعبات اداره دولت باشلوجه یکرمی قسمه منقسمدر . تاریخ هجرتک دردنجی عصرنده و بغدادده کی خلافت عباسیه زماننده قاضی القضاة « شمیدیکی تعبیر مزه کوره شیخ الاسلام » اولان اجله مفسرین و محدثین و مشاهیر افاضل اسلامیدهن امام ماوردی حضرتلرینک حقوق اداره اسلامییه متضمن تألیف ایتدکلری « احکام سلطانیه » نام اثر عالینده شعبات اداره دولتک اشبو یکرمی قسمی بیان و ایضاح ایتشلردرکه حقوق اداره حاضر مزه بونلرک شمیدیکی نظارتلره و مأموریتلره تطبیق ممکندر . رساله منرک مقصدی حقوق اداره تألیفی اولدیغین اولباید اعطای ایضاحات تألیف منرک مقصدی خارجنده قالور .




















3 1761 07295086 8